



**საქართველოს სასამართლოებში
მიმდინარე სამართალწარმოების შეფასება**

**ევროპული სასამართლოს მიერ
მიღებულ გადაწყვეტილებები**





ევროპული სასამართლოს მიერ საქართველოსთან მიმართებით მიღებული გადაწყვეტილებები მართლმსაჯულების კონტექსტში

თბილისი
2025

კვლევის ხელმძღვანელები: ნონა ქურდოვანიძე
თამარ ონიანი

ავტორები: მარიამ ოქრუაშვილი
თამაზ პირტაგა

რედაქტორი: ხათუნა ყვირალაშვილი

ტექ. რედაქტორი: ირაკლი სვანიძე

მადლობას ვუხდით საიას ანალიტიკოსებს, **ნინო ნოზაძესა** და **იოსებ ედიშერაშვილს**, ასევე, თანამემწეებს, **ნინო ყარაღაშვილსა** და **ნიკა ამირანაშვილს** კვლევაზე მუშაობაში შეტანილი წვლილისთვის.

აკრძალულია აქ მოყვანილი მასალების გადაბეჭდვა, გამრავლება ან გავრცელება
კომერციული მიზნით, საქართველოს ახალგაზრდა იურისტთა ასოციაციის
წერილობითი ნებართვის გარეშე.

ჯ. კახიძის ქ. №15, თბილისი, საქართველო
(+995 32) 295 23 53, 293 61 01
www.gyla.ge

© 2025, საქართველოს ახალგაზრდა იურისტთა ასოციაცია

ს ა რ ჩ ე ვ ი

შესავალი	5
კვლევის მეთოდოლოგია	7
1. კვლევის კონტექსტი	8
საქართველო და ევროპის საბჭოს სისტემა	8
სქემა N1: საქართველოს მიერ დარღვეული (ევროპული) კონვენციური უფლებები	9
საქართველოს ევროკავშირში ინტეგრაცია	9
მართლმსაჯულების სისტემის ინსტიტუციური გამოწვევები საქართველოში ...	11
2. ევროპული სასამართლოს მიერ საქართველოსთან მიმართებით მიღებული გადაწყვეტილებები მართლმსაჯულების კონტექსტში	12
1. მე-6 მუხლთან დაკავშირებული საქმეები	12
(1) ხარიტონაშვილი საქართველოს წინააღმდეგ (2009)	12
(2) კობელიანი საქართველოს წინააღმდეგ (2009)	13
(3) გახარია საქართველოს წინააღმდეგ (2017)	13
(4) სტურუა საქართველოს წინააღმდეგ (2017)	14
(5) ქართველიშვილი საქართველოს წინააღმდეგ (2018)	15
(6) მერაბ ტურავა და სხვები საქართველოს წინააღმდეგ და თამარ ლალიაშვილი საქართველოს წინააღმდეგ (2018)	16
(7) ჭოხონელიძე საქართველოს წინააღმდეგ (2018)	17
(8) ბართაია საქართველოს წინააღმდეგ (2018)	18
(9) როსტომაშვილი საქართველოს წინააღმდეგ (2018)	19
(10) კობიაშვილი საქართველოს წინააღმდეგ (2019)	20
(11) კერესელიძე საქართველოს წინააღმდეგ (2019)	21
(12) სვანიძე საქართველოს წინააღმდეგ (2019)	22
(13) გელენიძე საქართველოს წინააღმდეგ (2019)	23
(14) მეგრელიშვილი საქართველოს წინააღმდეგ (2020)	24
(15) მჭედლიშვილი საქართველოს წინააღმდეგ (2021)	25
(16) შრადე საქართველოს წინააღმდეგ (2021)	26
(17) ტლაშაძე და კაკაშვილი საქართველოს წინააღმდეგ (2021)	27
(18) კალანდია საქართველოს წინააღმდეგ (2021)	28
(19) შუბითიძე საქართველოს წინააღმდეგ (2021)	28
(20) კიკაბიძე საქართველოს წინააღმდეგ (2021)	29
(21) გლოველი საქართველოს წინააღმდეგ (2022)	30
(22) რუსიშვილი საქართველოს წინააღმდეგ (2022)	31
(23) მამალაძე საქართველოს წინააღმდეგ (2022)	32
(24) ხავშაბოვა საქართველოს წინააღმდეგ (2023)	33
(25) უგულავა საქართველოს წინააღმდეგ (No. 2) (2024)	35
(26) ხაჭაპურიძე და ხაჩიძე საქართველოს წინააღმდეგ (2024)	36
(27) წულუკიძე და რუსულაშვილი საქართველოს წინააღმდეგ (2024)	37

(28) კუზერაშვილი საქართველოს წინააღმდეგ (2024)	38
(29) ზაალიშვილი საქართველოს წინააღმდეგ (2025)	38
(30) ღლონტი და სხვები საქართველოს წინააღმდეგ (2025)	39
II. საქმეები, რომლებზეც მე-6 მუხლთან ერთად სხვა დარღვევებიც დადგინდა	40
(31) ჭიჭინაძე საქართველოს წინააღმდეგ (2010)	40
(32) კაკაბაძე და სხვები საქართველოს წინააღმდეგ (2012)	41
(33) მოლაშვილი საქართველოს წინააღმდეგ (2014)	43
(34) ჭანკოტაძე საქართველოს წინააღმდეგ (2016)	44
(35) მინდაძე და ნემსიწვერიძე საქართველოს წინააღმდეგ (2017)	45
(36) ბოხონკო საქართველოს წინააღმდეგ (2020)	46
(37) მაქარაშვილი და სხვები საქართველოს წინააღმდეგ (2022)	47
III. საქმეები, რომლებშიც მართლმსაჯულების ხარვეზებმა გამოიწვია ადამიანის უფლებების სხვა სერიოზული დარღვევები	48
(38) ენუქიძე და გირგვლიანი საქართველოს წინააღმდეგ (2011)	48
(39) მიქიაშვილი საქართველოს წინააღმდეგ (2012)	50
(40) დვალიშვილი საქართველოს წინააღმდეგ (2012)	50
(41) A და B საქართველოს წინააღმდეგ (2022)	51
(42) ფერაძე და სხვები საქართველოს წინააღმდეგ (2022)	52
(43) უგულავა საქართველოს წინააღმდეგ (2023)	53
(44) ოჩიგავა საქართველოს წინააღმდეგ (2023)	54
(45) ჩხარტიშვილი საქართველოს წინააღმდეგ (2023)	55
(46) გაიდუკევიჩი საქართველოს წინააღმდეგ (2023)	56
(47) ბაქრაძე საქართველოს წინააღმდეგ (2024)	57
(48) რომანჩენკო და ხარაზიშვილი საქართველოს წინააღმდეგ (2025)	58
3. ეროვნულ დონეზე საქმეთა განხილვაში მონაწილე მოსამართლეები	60
4. ძირითადი მიგნებები	67
გადაწყვეტილების დაუსაბუთებლობა	67
მხარეთა თანასწორობისა და მეჭიბრეობის დარღვევა	67
გაჭიანურებული მართლმსაჯულება	68
უდანაშაულობის პრეზუმფციის დარღვევა	69
ადმინისტრაციული სამართალდარღვევისთვის პასუხისმგებლობის დაკისრება სათანადო დასაბუთების გარეშე	69
ადვოკატით სარგებლობის უფლების დარღვევა	70
მოსამართლეთა დანიშვნასთან დაკავშირებული გამოწვევები	70
დისციპლინური პასუხისმგებლობის გამოყენება მოსამართლეების წინააღმდეგ	71
მოსამართლის თანამემწეთა მიუკერძოებლობის გარანტიები	73
მოსამართლეთა მიუკერძოებლობა და დამოუკიდებლობა	73

შესავალი

საქართველოში დემოკრატიის ბოლოდროინდელი უკუსვლის, მათ შორის, ადამიანის უფლებების და სამოქალაქო ჩართულობის წინააღმდეგ მიმართული კანონმდებლობის¹ მიღებისა და ძალაღობრივი პრაქტიკის² გაძლიერების ფონზე, დამოუკიდებელი, ადამიანის უფლებების პერსპექტივაზე დაფუძნებული მართლმსაჯულების ნაკლებობა კიდევ უფრო დაუცველს ტოვებს ინდივიდს. პრობლემურია და გაუმჯობესებას საჭიროებს როგორც სასამართლო სისტემის მიუკერძოებლობა და დამოუკიდებლობა, ასევე მისი ხარისხი და ეფექტიანობა.³ მართლმსაჯულების პროცესში ადამიანის ძირითადი უფლებების დაცვის კუთხით, განსაკუთრებით მნიშვნელოვანია, შეფასდეს ადამიანის უფლებათა ევროპული სასამართლოს მიერ წლების განმავლობაში გამოვლენილი პრობლემები და ხარვეზები, რომლებმაც სამართლიანი სასამართლოს ან სხვა უფლებების დარღვევა გამოიწვია. აღსანიშნავია, რომ ეროვნული სამართალწარმოების შესაბამისობა ადამიანის უფლებათა ევროპული სასამართლოს პრაქტიკასთან მნიშვნელოვანია საქართველოს ევროინტეგრაციის კონტექსტში.⁴

კვლევის მიზანია, ადამიანის უფლებათა ევროპული სამართლის შუქზე, მართლმსაჯულების სისტემის ძირითადი გამოწვევებისა და დარღვევების გამოკვეთა. დოკუმენტში ყურადღება გამახვილებულია ევროპული სასამართლოს მნიშვნელოვან გადაწყვეტილებებზე, ასევე, განხილულია ამ საქმეების ფარგლებში გამოკვეთილი საკითხები, რომლებიც პრობლემური იყო ეროვნულ დონეზე მართლმსაჯულების კონტექსტში. ***აღსანიშნავია, რომ, ზოგ შემთხვევაში, მოსამართლეები, რომელთა მიერ მიღებულმა გადაწყვეტილებებმა საფუძველი დაუდო კონვენციის განსაკუთრებით მნიშვნელოვან დარღვევებს, კვლავ სასამართლო სისტემაში საქმიანობენ, თანაც, ზოგიერთი მათგანი - მაღალ პოზიციაზე. წინამდებარე კვლევაში იდენტიფიცირებულია ეს საქმეები და ასეთი მოსამართლეებიც.***

გარდა ცალკეული საქმეების მიმოხილვისა, კვლევის მიზანია, მიგნებების გენერალიზებით გამოკვეთოს საქართველოს სასამართლოში არსებული სისტემური პრობლემები, რაც მათი მოგვარების საფუძველი უნდა გახდეს. ეს არსებითია, ვინაიდან ადამიანის უფლებათა ევროპული სასამართლოს გადაწყვეტილებების აღსრულება მნიშვნელოვანი გამოწვევებით ხასიათდება. გადაწყვეტილებების აღსრულების სტატისტიკის მიხედვით, საქართველო ბოლოდან მეოთხე ადგილზეა. მას ამ სიაში მხოლოდ ალბანეთი, აზერბაიჯანი და რუსეთის ფედერაცია მოსდევნ.⁵

კვლევა 4 თავისგან შედგება. პირველი თავი შეეხება მართლმსაჯულების სისტემის გამოწვევებს, ასევე, ევროპული სასამართლოს გადაწყვეტილებების აღსრულების კუთხით არსებულ კონტექსტს და ამ საკითხების ბმას ევროინტეგრაციის პროცესთან.

¹ მაგ. რუსული სტილის კანონი „უცხოური გავლენის გამჭვირვალობის შესახებ“, ცენზურის დამწესებელი ჰომოფობიური/ტრანსფობიური კანონი „ოჯახური ღირებულებებისა და არასრულწლოვანის დაცვის შესახებ“.

² მაგ. იხ. საია, საქართველო: ადამიანის უფლებები რუსული კანონის პირისპირ, ადამიანის უფლებათა მდგომარეობა უცხოური გავლენის გამჭვირვალობის კანონპროექტის რეინციფირებიდან 60 დღის განმავლობაში, 2024.

³ COMMISSION STAFF WORKING DOCUMENT Georgia 2024 Report, SWD(2024) 697 final, Brussels, 30.10.2024, 33-35, https://neighbourhood-enlargement.ec.europa.eu/document/download/7b6ed47c-ecde-41a2-99ea-41683dc2d1bd_en?filename=Georgia%20Report%202024.pdf [04.11.2024].

⁴ 2022 წლის 17 ივნისს საქართველოსთვის ევროკავშირის წევრის კანდიდატის სტატუსის მისაღებად ევროკომისიის მიერ განსაზღვრული 12 პუნქტიდან ერთ-ერთი სწორედ ქართული სასამართლოების მიერ ადამიანის უფლებათა ევროპული სასამართლოს გადაწყვეტილებების პროაქტიულ გამოყენებას შეეხებოდა. <https://www.consilium.europa.eu/en/policies/enlargement/georgia/> [27.04.2023].

⁵ 2024 წლის 4 ნოემბრის მონაცემები. იხ. <https://www.coe.int/en/web/execution/georgia> [03.10.2024].

მე-2 თავში მოცემულია ევროპული სასამართლოს მიერ საქართველოსთან მიმართებით მიღებული რეგულაციური გადაწყვეტილებები. კვლევის მიზნებიდან გამომდინარე, ეს თავი ფოკუსირებულია განხილული საქმეების იმ ასპექტებზე, რომლებიც მართლმსაჯულების სისტემის გამოწვევებს უკავშირდება და არა - საქმეში არსებულ ყველა მნიშვნელოვან ასპექტზე.

მართალია, სამართლიანი სასამართლოს უფლება ევროპული კონვენციის მე-6 მუხლით არის დაცული, თუმცა მართლმსაჯულების პროცესში არსებული ხარვეზები ხშირად ადამიანის სხვა ძირითად უფლებებთან იკვეთება. კვლევის მიზნებისთვის არასაკმარისი იქნებოდა მხოლოდ იმ საქმეებზე ფოკუსირება, რომლებზეც ევროპულმა სასამართლომ მე-6 მუხლის დარღვევა დაადგინა. მართლმსაჯულების სისტემის სრულყოფილი შესწავლისთვის, საჭიროა, ასევე, იმ საქმეების განხილვა, რომლებშიც უშუალოდ კონვენციის მე-6 მუხლი არ დარღვეულა, თუმცა, კონტექსტის გათვალისწინებით, ამ საქმეებში სწორედ მართლმსაჯულების სისტემის გამოწვევები იკვეთება. ამასთანავე, იმ საქმეთა ნაწილში, რომელშიც მე-6 მუხლის დარღვევა დგინდება, შესაძლოა, დარღვეული იყოს კონვენციის სხვა მუხლებიც, რაც, გარკვეულ შემთხვევებში, შეიძლება მიუთითებდეს, რომ სასამართლო ვერ ახერხებს საკუთარი ფუნქციის შესრულებას და პირისთვის დარღვეული უფლების აღდგენას.

შესაბამისად, მე-2 თავი გაყოფილია სამ ქვეთავად. პირველში გაანალიზებულია ადამიანის უფლებათა ევროპული სასამართლოს 27 გადაწყვეტილება, რომლებშიც დადგინდა კონვენციის მხოლოდ მე-6 მუხლის დარღვევა, მეორე ქვეთავში მოცემულია 7 გადაწყვეტილება, რომლებშიც, მე-6 მუხლთან ერთად, დადგინდა კონვენციის სხვა მუხლით დაცული უფლების დარღვევაც, ხოლო მესამეში განხილულია 10 საქმე, რომლებშიც მართლმსაჯულების ხარვეზებმა გამოიწვია ადამიანის უფლებების სხვა მნიშვნელოვანი დარღვევები. მე-3 თავში მოცემულია ინფორმაცია იმ მოსამართლეების შესახებ, რომლებიც მართლმსაჯულების ეფექტიან ფუნქციონირებასთან მიმართებით მნიშვნელოვან გადაწყვეტილებებში ფიგურირებენ და საქმიანობას აგრძელებენ სასამართლო სისტემაში. ბოლოს, მე-4 თავში, შეჯამებულია კვლევის ძირითადი მიგნებები.

კვლევის მეთოდოლოგია

წინამდებარე დოკუმენტის მოსამზადებლად ჩატარდა სამაგიდე კვლევა, გაანალიზდა ადამიანის უფლებათა ევროპული სასამართლოს პრაქტიკა, რელევანტური ლიტერატურა, ასევე, საერთაშორისო და სამოქალაქო საზოგადოების ორგანიზაციების ანგარიშები და რეკომენდაციები, კონკრეტულად: ადამიანის უფლებათა ევროპული სასამართლოს მიერ საქართველოსთან მიმართებით გამოტანილი ყველა გადაწყვეტილება მე-6 მუხლთან (სამართლიანი სასამართლოს უფლება) დაკავშირებით (2025 წლის 31 მარტის მდგომარეობით). ამ გადაწყვეტილებებიდან დაიდენტიფიცირდა ისეთი საქმეები, რომლებიც უშუალოდ სამართალწარმოების სისტემაში არსებულ გამოწვევებს/ხარვეზებს შეეხებოდა, შესაბამისად, რელევანტური იყო წინამდებარე კვლევის მიზნებისთვის. ამასთანავე, იქიდან გამომდინარე, რომ მართლმსაჯულების სისტემასთან დაკავშირებული საკითხები, მე-6 მუხლის მიღმა, ასევე განხილულია სხვა მუხლების ფარგლებში, დაიდენტიფიცირდა ისეთი გადაწყვეტილებები, რომლებშიც განსაკუთრებით მნიშვნელოვანი უფლებების, ასევე, ინსტრუმენტული უფლებების დარღვევები (მაგალითად, შეკრების და გაერთიანების თავისუფლების კონტექსტში) დაკავშირებული იყო მართლმსაჯულების სისტემაში არსებულ გამოწვევებთან. ამგვარი გადაწყვეტილებები გაანალიზდა მათში ასახული სამართალწარმოების ხარვეზების გამოვლენის მიზნით. იმავდროულად, ყურადღება გამახვილდა ისეთ საქმეებზე და მათთან მიმართებით გამოვლენილ გარემოებებზე, რომლებიც, გარდა ევროპული სასამართლოს პრაქტიკისა, ასევე, სხვა რელევანტური ლიტერატურის, საერთაშორისო ორგანიზაციებისა და სამოქალაქო საზოგადოების შეფასებების/ანგარიშების მიხედვით, გამოწვევაა ქართული მართლმსაჯულების სისტემისთვის.

კვლევის ფარგლებში ასევე მოძიებული იყო იმ მოსამართლეთა ვინაობა, რომლებიც დღესაც მოსამართლის პოზიციას იკავებენ და მათ მიერ ეროვნულ დონეზე განხილულ საქმეებში ევროპულმა სასამართლომ მართლმსაჯულების მნიშვნელოვანი ხარვეზები გამოავლინა. მოსამართლეების იდენტიფიცირებისთვის შეირჩა ისეთი საქმეები, რომლებიც სენსიტიური ან გახმაურებული იყო, ხოლო ეროვნულ დონეზე განხორციელებული მართლმსაჯულების ხარისხი სასამართლოში არსებულ სისტემურ პრობლემებზე მიუთითებდა, მათ შორის, სასამართლოს დამოუკიდებლობის და მიუკერძოებლობის კუთხით. ამ საქმეების მოსამართლეთა შესახებ ინფორმაცია მოძიებული იყო როგორც ღია წყაროებიდან, ასევე, იმ იურისტებთან კომუნიკაციის შედეგად, რომლებიც აღნიშნულ საქმეებს ეროვნულ ან საერთაშორისო დონეზე აწარმოებდნენ. აქედან გამომდინარე, ზოგ შემთხვევაში, გამოწვევა იყო საქმეზე მომუშავე იურისტებთან დაკავშირება. გარდა ამისა, იმის გათვალისწინებით, რომ საქმეთა ნაწილზე გადაწყვეტილების გამოტანიდან წლებია გასული, იურისტებს ზოგჯერ უჭირდათ ამ მოსამართლეების ვინაობის გახსენება/მოძიება და ამის შესახებ ინფორმაციის მოწოდება.

1. კვლევის კონტექსტი

საქართველო და ევროპის საბჭოს სისტემა

1999 წლის 27 აპრილს საქართველო შეუერთდა ადამიანის უფლებათა ევროპულ კონვენციას (*კონვენცია*), რომლის რატიფიკაციაც განხორციელდა იმავე წლის 20 მაისს.⁶ დღევანდელი მდგომარეობით, 46 სახელმწიფოა ევროპის საბჭოს წევრი.⁷ ადამიანის უფლებათა ევროპული სასამართლოს (*ევროპული სასამართლო*) გადაწყვეტილებებმა მნიშვნელოვანი წვლილი შეიტანა ადამიანის უფლებების სტანდარტების განვითარების კუთხით კონვენციის ხელშემკვრელ სახელმწიფოებში,⁸ მათ შორის, საქართველოში.

2023 წლის პირველი იანვრის მდგომარეობით, საქართველოს წინააღმდეგ ევროპულმა სასამართლომ განიხილა 6496 საჩივარი და განაგრძობს 155-ის განხილვას.⁹ ამავე თარიღის მონაცემებით, ევროპულმა სასამართლომ საქართველოსთან მიმართებით 143 გადაწყვეტილება გამოიტანა, რომელთაგან 118-ში დაადგინა დარღვევა.¹⁰ საქართველო, როგორც ადამიანის უფლებათა ევროპული კონვენციის მაღალი ხელშემკვრელი სახელმწიფო, ვალდებულია, დაემორჩილოს ევროპული სასამართლოს საბოლოო გადაწყვეტილებას იმ საქმეებზე, რომლებშიც ის მხარეს წარმოადგენს.¹¹ ევროპული სასამართლოს გადაწყვეტილებები აღსასრულებლად გადაეცემა მინისტრთა კომიტეტს,¹² რომელიც აღსრულების პროცესს ზედამხედველობს.¹³

მიუხედავად იმისა, რომ სასამართლო პროცესების სამართლიანობის გაზრდის მიზნით წლების განმავლობაში გაუმჯობესდა საპროცესო გარანტიები, რაც მოიცავს სასამართლოს უფრო მეტ ხელმისაწვდომობას და შეჯიბრებითობის პრინციპის გაძლიერებას,¹⁴ სავალალოა, რომ საქართველო ბოლოდან მეოთხე ადგილზეა¹⁵ ევროპული სასამართლოს გადაწყვეტილების აღსრულების სტატისტიკური მონაცემებით. ამ ოთხეულში, საქართველოსთან ერთად, ალბანეთი, რუსეთი და აზერბაიჯანი შედიან.¹⁶

სისტემური რეფორმები, რომლებიც სახელმწიფოს უნდა გაეტარებინა, კვლავაც აღსასრულებელი დონის ძიებების ჩამონათვალშია. მათ შორისაა აუცილებელი ცვლილებები, რომლებიც შეეხება წამებას, არაადამიანურ, დამამცირებელ მოპყრობას ან სიცოცხლის უფლების ხელყოფას (მაგალითად, დამოუკიდებელი საგამოძიებო

⁶ ადამიანის უფლებათა ევროპული კონვენცია (მიღების თარიღი: 27.04.1999, ძალაში შევიდა: 20.05.1990).
⁷ იხ. <https://www.coe.int/en/web/portal/46-members-states> [27.04.2024].

⁸ ადამიანის უფლებათა ევროპული კონვენცია, მუხლი 19 (მიღების თარიღი: 27.04.1999, ძალაში შევიდა: 20.05.1990).

⁹ The ECHR and Georgia, Facts and Figures, 2023, https://www.echr.coe.int/documents/d/echr/Facts_Figures_Georgia_ENG [03.10.2024].

¹⁰ The ECHR and Georgia, Facts and Figures, 2023, 3, https://www.echr.coe.int/documents/d/echr/Facts_Figures_Georgia_ENG [03.10.2024].

¹¹ ევროპული კონვენცია სახელმწიფოებთან სამართლის შესახებ (მიღების თარიღი: 23.05.1969, ძალაში შევიდა: 08.07.1995), მუხლი 26.

¹² მინისტრთა კომიტეტი - ევროპის საბჭოს წარმომადგენელი ორგანოა, რომელიც შედგება ევროპის საბჭოს წევრო სახელმწიფოს საგარეო საქმეთა მინისტრებისგან. ევროპის საბჭოს წესდება (მიღებულია 1949 წლის 5 მაისს, ძალაში შევიდა 1949 წლის 3 აგვისტოს), მუხლები: 13 და 14.

¹³ ადამიანის უფლებათა ევროპული კონვენცია (მიღებულია: 27.04.1999, ძალაში შევიდა: 20.05.1999), 46.1-2 მუხლები.


¹⁴ The ECHR and Georgia, Facts and Figures, 2023, 5, https://www.echr.coe.int/documents/d/echr/Facts_Figures_Georgia_ENG [03.10.2024].

¹⁵ 2024 წლის 20 სექტემბრის მონაცემები. იხ. <https://www.coe.int/en/web/execution/georgia> [03.10.2024].

¹⁶ იქვე.

სამსახურის მანდატის გაძლიერება),¹⁷ სიძულვილით მოტივირებულ დანაშაულებს,¹⁸ ფემიციდს,¹⁹ რომელთან დაკავშირებითაც ასევე მნიშვნელოვანი და არსებითი მართლმსაჯულების სისტემის როლი. ამასთანავე, სამართლიანი სასამართლოს უფლება არის ის უფლება, რომელიც, საქართველოსთან მიმართებით მიღებული გადაწყვეტილებების მიხედვით, ყველაზე ხშირად არის დარღვეული.

სქემა N1: საქართველოს მიერ დარღვეული (ევროპული) კონვენციური უფლებები



საქართველოს ევროკავშირში ინტეგრაცია

ადამიანის უფლებებთან დაკავშირებული საკითხები, მათ შორის, ევროსასამართლოს გადაწყვეტილებების პროაქტიული გათვალისწინება საქართველოს სასამართლოების მიერ, მართლმსაჯულების სისტემის დამოუკიდებლობასა და მიუკერძოებლობასთან ერთად, ის საკითხებია, რომლებიც საქართველოს ევროკავშირში ინტეგრაციის მიმართულებით მნიშვნელოვან როლს ასრულებს.

საქართველოს კონსტიტუციით განმტკიცებულია ევროკავშირში ინტეგრაციის საგარეო კურსი.²⁰ თუმცა, ამჟამად ეს პროცესი შეჩერებულია, რაც ქვეყანაში „უცხოური გავლენის გამჭვირვალობის შესახებ“ რუსული სტილის კანონის²¹ მიღებასა და სამოქალაქო საზოგადოების წარმომადგენლების, პოლიტიკური ლიდერების, სამოქალაქო აქტივისტებისა და ჟურნალისტების მიმართ დაშინების, მუქარისა და ფიზიკური თავდასხმის მზარდ შემთხვევებს უკავშირდება.²²

წინარეისტორიის კუთხით, აღსანიშნავია, რომ 2022 წლის 3 მარტს საქართველომ ევროკავშირში გაწევრიანების განაცხადი წარადგინა, ხოლო ამავე წლის 17 ივნისს

¹⁷ 1492nd meeting (12-14 March 2024) (DH) - H46-14 Tsintsabadze group v. Georgia (Application No. 35403/06), nb. <https://hudoc.exec.coe.int/#%22fulltext%22:%22tsintsabadze%20group%22,%22execdocumenttypecollection%22:%22CEC%22,%22execidentifier%22:%222004-5830%22>] [08.10.2024].

¹⁸ 507th meeting (17-19 September 2024) (DH) - H46-9 Identoba and Others group v. Georgia (Application No. 73235/12), <https://hudoc.exec.coe.int/#%22fulltext%22:%22identoba%20group%22,%22execdocumenttypecollection%22:%22CEC%22,%22execidentifier%22:%222004-5894%22>] [08.10.2024].

¹⁹ 1483rd meeting (DH), December 2023 - H46-14 Tkheidze group v. Georgia (Application No. 33056/17), <https://hudoc.exec.coe.int/#%22fulltext%22:%22tkheidze%22,%22execdocumenttypecollection%22:%22CEC%22,%22execidentifier%22:%222004-58703%22>] [08.10.2024].

²⁰ საქართველოს კონსტიტუცია, მუხლი 78.

²¹ რუსული კანონის, მისი შემუშავებისა და მიღების პროცესში ადამიანის უფლებების დარღვევის მზარდი ტენდენციის შესახებ უფრო ვრცლად იხ. საია, საქართველო: ადამიანის უფლებები რუსული კანონის პირისპირ, 2024, <https://shorturl.at/Y7gMW> [08.10.2024].

²² European Council conclusions, 27 June 2024, 36-39, <https://www.consilium.europa.eu/media/qa31blga/eu-co-conclusions-27062024-en.pdf> [08.10.2024].

გამოქვეყნდა ევროკომისიის დასკვნა, რომლითაც კანდიდატის სტატუსის მისაღებად განისაზღვრა სახელმწიფოს მიერ შესასრულებელი 12-პუნქტიანი ამოცანები.²³ აქედან ერთ-ერთი, მე-11 პრიორიტეტი გულისხმობდა, რომ უნდა შემუშავებულიყო „[...] კანონი, რომლის თანახმადაც, ქართული სასამართლოები პროაქტიულად გაითვალისწინებენ ადამიანის უფლებათა ევროპული სასამართლოს გადაწყვეტილებებს თავიანთ გადაწყვეტილებებში“. 2023 წლის 8 ნოემბრის ანგარიშში ევროკომისიამ საქართველოს მე-11 პრიორიტეტი შესრულებულად ჩაუთვალა, ვინაიდან პარლამენტმა მიიღო საკანონმდებლო პაკეტი, რომელიც ევროპული სასამართლოს გადაწყვეტილებების გამოყენებას, ამ გადაწყვეტილებებზე წვდომის უზრუნველყოფას, ასევე, მოსამართლეების, პროკურორების და ადვოკატების კვალიფიკაციის ამაღლებას შეეხებოდა.²⁴ თუმცა, იმავედროულად, ევროკომისიამ მიუთითა, რომ საჭიროა, კვლავ გაგრძელდეს მუშაობა ადამიანის უფლებების დაცვის სტანდარტების გასაუმჯობესებლად.²⁵

2023 წლის 8 ნოემბრის კომუნიკაციით, ევროკომისიამ რეკომენდაცია გაუწია საქართველოსთვის კანდიდატი ქვეყნის სტატუსის მინიჭებას იმის გათვალისწინებით, რომ ევროკომისიის მიერ განსაზღვრული შესაბამისი 9 მიმართულებით ნაბიჯები გადაიდგმებოდა.²⁶ 2023 წლის 14 დეკემბერს ევროპულმა საბჭომ, ევროკომისიის მიერ განსაზღვრული 9 ნაბიჯის შესრულების დათქმით, საქართველოს კანდიდატი ქვეყნის სტატუსი მიანიჭა.²⁷ ევროკომისიის მიერ განსაზღვრული 9 პრიორიტეტიდან ერთ-ერთი არის „ყოვლისმომცველი და ეფექტიანი სასამართლო რეფორმის დასრულება და განხორციელება, იუსტიციის უმაღლესი საბჭოსა და პროკურატურის ყოვლისმომცველი რეფორმის ჩათვლით, ვენეციის კომისიის რეკომენდაციების სრულად განხორციელებისა და გამჭვირვალე და ინკლუზიური პროცესის უზრუნველყოფის გზით“.²⁸

ევროკომისიის 2024 წლის 30 ოქტომბრის შეფასების მიხედვით, 2024 წელს საერთო სასამართლოების შესახებ კანონში შეტანილი ცვლილებები არ პასუხობს 2023 წლის გაფართოების ანგარიშის და ვენეციის კომისიის სისტემურ და შინაარსობრივ რეკომენდაციებს.²⁹ ცვლილებები არ არის ყოვლისმომცველი და ეფექტიანი.³⁰ ამ დროისთვის კვლავ გამოწვევად რჩება ის, რომ ხელისუფლება არ წარმართავს ფართო და ინკლუზიურ პროცესს, რომელშიც სამოქალაქო საზოგადოებას ექნება

²³ იხ. <https://www.consilium.europa.eu/en/policies/enlargement/georgia/> [27.04.2023].

²⁴ European Commission, Georgia 2023 Report, SWD(2023) 697 final, Brussels, 8.11.2023, 12.

²⁵ ევროკომისიამ საქართველოს განუსაზღვრა 9 პრიორიტეტი, რომელთაგან ერთ-ერთია: „ადამიანის უფლებების დაცვის სტანდარტების გაუმჯობესება, მათ შორის, ადამიანის უფლებების დაცვის ამბიციური სტრატეგიის მიღებითა და შეკრებისა და გამოხატვის თავისუფლების უზრუნველყოფით. მიუკერძოებელი, ეფექტური და დროული გამოძიების დაწყება და ძალადობის ორგანიზატორების/დამნაშავეების პასუხისგებაში მიღება მოწყვლადი ჯგუფების, მედიაპროფესიონალებისა და სამოქალაქო აქტივისტების მიმართ მუქარის ფაქტებზე. სამოქალაქო საზოგადოებასთან კონსულტაციების გამართვა, მათი ჩართულობის უზრუნველყოფა კანონშემოქმედებით და პოლიტიკის შემუშავების პროცესში და მათი თავისუფლად მუშაობის უზრუნველყოფა“. იხ. https://www.eeas.europa.eu/delegations/georgia/2023-communication-eu-enlargement-policy-extract-about-georgia_en [27.04.2023].

²⁶ 9 ნაბიჯი ევროკავშირისკენ, შესრულების მდგომარეობა 2023 წლის 8 ნოემბრიდან 2024 წლის 31 მარტის ჩათვლით, 7, <https://gyla.ge/files/1142024.pdf> [08.10.2024].

²⁷ იქვე.

²⁸ COMMUNICATION FROM THE COMMISSION TO THE EUROPEAN PARLIAMENT, THE COUNCIL, THE EUROPEAN ECONOMIC AND SOCIAL COMMITTEE AND THE COMMITTEE OF THE REGIONS, COM(2023) 690 final, Brussels, 8.11.2023, 25.

²⁹ COMMISSION STAFF WORKING DOCUMENT Georgia 2024 Report, SWD(2024) 697 final, Brussels, 30.10.2024, 24, https://neighbourhood-enlargement.ec.europa.eu/document/download/7b6ed47c-ecde-41a2-99ea-41683dc2d1bd_en?filename=Georgia%20Report%202024.pdf [04.11.2024].

³⁰ იქვე.

მონაწილეობის და წინადადებების წარდგენის შესაძლებლობა სასამართლო რეფორმის საკითხებზე.³¹ სასამართლო სისტემაში მაღალ თანამდებობაზე დანიშნული/არჩეული პირების კეთილსინდისიერების თაობაზე არსებობს საფუძვლიანი კითხვები, თუმცა წამყვან თანამდებობებზე დანიშნული/არჩეული მოსამართლეების კეთილსინდისიერების შემოწმების მექანიზმის დანერგვასთან დაკავშირებით პოლიტიკური ხელისუფლება, ასევე, სასამართლოს წარმომადგენლები გამოხატავენ მკვეთრად ნეგატიურ დამოკიდებულებას და საკითხს აცხადებენ დახურულად.³² სახელმწიფოს არ შეუძლება სასამართლოში რეფორმების და გამოწვევების დეტალური და სიღრმისეული ანალიზი, რომელიც შესაძლებელს გახდიდა არსებული პრობლემების და მათი გადაჭრის გზების სწორად იდენტიფიცირებას და მის საფუძვლზე სასამართლოს რეფორმის ეფექტიანი სამომავლო სტრატეგიის შემუშავებას.³³

მართლმსაჯულების სისტემის ინსტიტუციური გამოწვევები საქართველოში

ქვეყნის მიერ დამოუკიდებლობის მოპოვების შემდგომ სასამართლომ ვერ შეძლო მიუკერძოებელ სტრუქტურად ჩამოყალიბება. ხელისუფლებათა ცვლილების კვალდაკვალ, მუდმივად პრობლემად რჩებოდა დამოუკიდებელი, გავლენებისგან თავისუფალი მართლმსაჯულების სისტემის არარსებობა. რეფორმის არაერთი ტალღისა და საკონსტიტუციო ცვლილებების მიუხედავად, სასამართლო კვლავ სისტემური გამოწვევების წინაშეა. ფრაგმენტული საკანონმდებლო ცვლილებები სისტემაში არსებულ კორპორატივიზმს, მათ შორის, დამოუკიდებლობისა და მიუკერძოებლობის თვალსაზრისით არსებულ საკვანძო პრობლემებს ვერ უმკლავდება.³⁴ ამას ადასტურებს ევროპული კომისიის ანგარიში, რომელშიც საუბარია საქართველოში ყოვლისმომცველი და ეფექტიანი რეფორმის განხორციელების აუცილებლობაზე.³⁵ ანგარიშში ხაზგასმულია არა მხოლოდ საკანონმდებლო ცვლილებების აუცილებლობაზე, არამედ, ასევე, სასამართლო სისტემაში ხელმძღვანელ პოზიციებზე მყოფი პირებისა და კანდიდატების კეთილსინდისიერების შემოწმებაზე.³⁶ მართლმსაჯულების კუთხით შექმნილი მძიმე ვითარების დადასტურება იყო ამერიკის შეერთებული შტატების სახელმწიფო დეპარტამენტის მიერ გავლენიანი ჯგუფის წევრების, მოქმედი და ყოფილი მოსამართლეების - მიხეილ ჩინჩალაძის, ლევან მურუსიძის, ვალერიან ცერცვაძისა და ირაკლი შენგელიასთვის, კორუფციაში ჩართულობის გამო, ქვეყანაში შესვლაზე პერსონალური შეზღუდვების დაწესება.³⁷

³¹ სამოქალაქო საზოგადოების ფონდი; GRASS; GFSIS; საია; ISFED; სასამართლოს გუმაგი; სოციალური სამართლიანობის ცენტრი; IDFI; GMC; DRI; GDI; საფარი, 9 ნაბიჯი ევროკავშირისკენ, შესრულების მდგომარეობა 2023 წლის 8 ნოემბრიდან 2024 წლის 9 სექტემბრის ჩათვლით, 52.

³² იქვე.

³³ იქვე.

³⁴ ნოზაძე ნ. იუსტიციის საბჭოს მონიტორინგის ანგარიში №12, თბილისი, 2024 წელი, საქართველოს ახალგაზრდა იურისტთა ასოციაცია, ხელმისაწვდომია: <https://shorturl.at/4N8jE>, განახლებულია: 9.10.24.

³⁵ Communication from the Commission to the European Parliament, the Council, the European Economic and Social Committee and the Committee of the Regions, Brussels, 8.11.2023 page 20-21, ხელმისაწვდომია: [chrome-extension://efaidnbmnnnibpcajpcglclefindmkaj/https://neighbourhood enlargement.ec.europa.eu/document/download/388e01b7-e283-4bc9-9d0a-5600ea49eda9_en?filename=SWD_2023_697%20Georgia%20report.pdf](chrome-extension://efaidnbmnnnibpcajpcglclefindmkaj/https://neighbourhood%20enlargement.ec.europa.eu/document/download/388e01b7-e283-4bc9-9d0a-5600ea49eda9_en?filename=SWD_2023_697%20Georgia%20report.pdf), განახლებულია: 11.10.24.

³⁶ იქვე.

³⁷ Public Designations of Mikheil Chinchaladze, Levan Murusidze, Irakli Shengelia, and Valerian Tsertsvadze, Due to Involvement in Significant Corruption, Press Statement, U.S. Department of State, 5 April 2023, available at: <https://www.state.gov/public-designations-of-mikheil-chinchaladze-levan-murusidze-irakli-shengelia-and-valerian-tsertsvadze-due-to-involvement-in-significant-corruption/>, accessed: 2.10.24.

2. ევროპული სასამართლოს მიერ საქართველოსთან მიმართებით მიღებული 48 გადაწყვეტილება, რომლებიც სამ ქვეთავშია განაწილებული. კვლევის მიზნებიდან გამომდინარე, ეს თავი ფოკუსირებულია განხილული საქმეების იმ ასპექტებზე, რომლებიც მართლმსაჯულების სისტემის გამოწვევებს უკავშირდება და არა - საქმეში არსებულ ყველა მნიშვნელოვან ასპექტზე.

ამ თავში მოცემულია ევროპული სასამართლოს მიერ საქართველოსთან მიმართებით მიღებული 48 გადაწყვეტილება, რომლებიც სამ ქვეთავშია განაწილებული. კვლევის მიზნებიდან გამომდინარე, ეს თავი ფოკუსირებულია განხილული საქმეების იმ ასპექტებზე, რომლებიც მართლმსაჯულების სისტემის გამოწვევებს უკავშირდება და არა - საქმეში არსებულ ყველა მნიშვნელოვან ასპექტზე.

საზგადასმელია, რომ კვლევაში განხილულ საქმეებზე სახელმწიფოს მომჩივნებისთვის, სამართლიანი დაკმაყოფილების სახით, ჯამურად, დაახლოებით, 460'000³⁸ ევროს გადახდა დაეკისრა.

I. მე-6 მუხლთან დაკავშირებული საქმეები

ამ ქვეთავში განხილულია ადამიანის უფლებათა ევროპული სასამართლოს 30 გადაწყვეტილება, რომლებშიც კონვენციის მხოლოდ მე-6 მუხლის დარღვევა დადგინდა და ამ საქმეებში გამოვლენილი პრობლემები დღესაც აქტუალურია. საქმეები ევროსასამართლოს მიერ გადაწყვეტილების მიღების დროის მიხედვით, ქრონოლოგიურად არის მოცემული.

(1) ხარიტონაშვილი საქართველოს წინააღმდეგ (2009)

საქმის დასახელება/ნომერი	ხარიტონაშვილი საქართველოს წინააღმდეგ, 41057/04
საჩივრის წარდგენის თარიღი	10 ნოემბერი, 2004 წელი
გადაწყვეტილების თარიღი	10 თებერვალი, 2009 წელი
მომჩივანი	ლალი ხარიტონაშვილი
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ზიანი - 3 200 EUR სარჩები და დანახარჯები - 36 EUR

ეს საქმე ეხება გაჭიანურებულ სამოქალაქო მართლმსაჯულებას. ევროპული სასამართლოს გადაწყვეტილების გამოტანის დროისთვის საქმის წარმოება კვლავაც მიმდინარეობდა საქალაქო სასამართლოში. ის 8 წელიწადსა და თერთმეტ თვეზე მეტხანს გრძელდებოდა.³⁹ აღსანიშნავია, რომ მთავრობა ამის ერთ-ერთ მიზეზად სასამართლოს გადატვირთულობას და სასამართლო სისტემის რეორგანიზაციას ასახელებდა. ევროპული სასამართლოს განმარტებით, საქმეების ქრონიკული დაგროვება არ არის გადამეტებული დაყოვნების დასაბუთებული ანსნა, გარდა ამისა, სახელმწიფო ვალდებულია, იზრუნოს სასამართლოს ორგანიზებაზე ისე, რომ უზრუნველყოფილი იყოს ყოველი მოქალაქის უფლება, დაიცვას საკუთარი უფლებები გონივრულ ვადაში.⁴⁰

³⁸ ზუსტი რიცხვია 458'917 ევრო და 9'418 ლარი.

³⁹ ადამიანის უფლებათა ევროპული სასამართლოს 2009 წლის 10 თებერვლის გადაწყვეტილება საქმეზე „ხარიტონაშვილი საქართველოს წინააღმდეგ“ (CASE OF KHARITONASHVILI v. GEORGIA), 41957/04, პარ. 30.

⁴⁰ იქვე, პარ. 44.

(2) კობელიანი საქართველოს წინააღმდეგ (2009)

საქმის დასახელება/ნომერი	კობელიანი საქართველოს წინააღმდეგ, 40022/05
საჩივრის წარდგენის თარიღი	29 სექტემბერი, 2005 წელი
გადაწყვეტილების თარიღი	16 ივლისი, 2009 წელი
მომჩივანი	ლევან კობელიანი
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ზიანი - 1 000 EUR

ეს საქმე ეხება სისხლის სამართლის მართლმსაჯულებას, რომელიც მიმდინარეობდა 6 წლის, 9 თვისა და 25 დღის განმავლობაში სამ ინსტანციაში.⁴¹ ევროპული სასამართლოს შეფასებით, ეს დრო იყო მეტისმეტად ხანგრძლივი და არ აკმაყოფილებდა „გონივრული ვადის“ მოთხოვნას.⁴²

(3) გახარია საქართველოს წინააღმდეგ (2017)

საქმის დასახელება/ნომერი	გახარია საქართველოს წინააღმდეგ, 30459/13
საჩივრის წარდგენის თარიღი	17 აპრილი, 2013 წელი
გადაწყვეტილების თარიღი	17 იანვარი, 2017 წელი
მომჩივანი	რევაზ გახარია
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ზიანი - 1 500 EUR

ეს საქმე ეხება 2008 წელს მომჩივნის წინააღმდეგ გამოტანილ დაუსწრებელ გადაწყვეტილებებს, რომელთა საფუძველზეც, მას მშობლის უფლებები შეეზღუდა.⁴³ სამართალწარმოებისას მეურვეობისა და მზრუნველობის ორგანომ ეროვნულ სასამართლოს აცნობა, რომ მომჩივანმა საქართველოში სახლი გაყიდა და ცხოვრობს მოსკოვში.⁴⁴ მიუხედავად ამისა, სასამართლოებმა გამოიყენეს ფორმალისტური მიდგომა - უწყებები და გადაწყვეტილებები გაგზავნეს იმ მისამართზე, სადაც მომჩივანი არ ცხოვრობდა. ხოლო, ვინაიდან ამ მისამართზე მომჩივანმა დოკუმენტები ვერ ჩაიბარა, დავის შესახებ ინფორმაცია გამოქვეყნდა გაზეთში.⁴⁵ მომჩივანმა დაუსწრებელი გადაწყვეტილებების შესახებ 2012 წლის მაისში შეიტყო.⁴⁶

ევროპული სასამართლო ხაზგასმით აღნიშნავს, რომ თბილისის საქალაქო სასამართლოსთვის ცნობილი იყო მომჩივნის საზღვარგარეთ ცხოვრების შესახებ, თუმცა ამ ინფორმაციის შესამოწმებლად მან არანაირ ძალისხმევას არ მიმართა. ამასთანავე, სასამართლოს მოსარჩელისგან არ მოუთხოვია დამატებითი ინფორმაცია მომჩივნის ადგილსამყოფლის შესახებ, იმ ფაქტის გათვალისწინებით, რომ მოსარჩელე არ უარყოფდა მომჩივანთან რეგულარულ სატელეფონო კონტაქტს.

⁴¹ ადამიანის უფლებათა ევროპული სასამართლოს 2009 წლის 16 ივლისის გადაწყვეტილება საქმეზე „კობელიანი საქართველოს წინააღმდეგ“ (CASE OF KOBELYAN v. GEORGIA), 40022/05, პარ. 17.

⁴² იქვე, პარ. 19.

⁴³ ადამიანის უფლებათა ევროპული სასამართლოს 2017 წლის 17 იანვრის გადაწყვეტილება საქმეზე „გახარია საქართველოს წინააღმდეგ“ (GAKHARIA v. GEORGIA), 30459/13, პარ. 1-3.

⁴⁴ იქვე, პარ. 9.

⁴⁵ იქვე, პარ. 7-9.

⁴⁶ იქვე.

გარდა ამისა, ევროპული სასამართლო აღნიშნავს, რომ, ვინაიდან საქართველო მინსკის კონვენციის წევრი სახელმწიფოა, ეროვნულ სასამართლოებს შეეძლოთ, მოეთხოვათ იურიდიული დახმარება კონვენციის იმ წევრი სახელმწიფოსგან, სადაც მომჩივანი ცხოვრობდა. ევროპული სასამართლოს შეფასებით, იმის გამო, რომ საქმე ენებოდა მშობლის უფლებებს, საკმაოდ სენსიტიური იყო. შესაბამისად, სასამართლოებს უნდა ემოქმედათ განსაკუთრებული გულისხმიერებით, თუმცა მათ ეს არ გააკეთეს.

(4) სტურუა საქართველოს წინააღმდეგ (2017)

საქმის დასახელება/ნომერი	სტურუა საქართველოს წინააღმდეგ, 45729/05
საჩივრის წარდგენის თარიღი	29 ნოემბერი, 2005 წელი
გადაწყვეტილების თარიღი	28 მარტი, 2017 წელი
მომჩივანი	მიტროფანე სტურუა
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ზიანი - 3 500 EUR ხარჯები და დანახარჯები - 3 380 EUR

ეს საქმე ენება ყოფილი მოსამართლისთვის, დისციპლინური დარღვევის გამო, პასუხისმგებლობის სახით, მოსამართლის თანამდებობიდან გათავისუფლების დაკისრებას.⁴⁷ 2004 წლის 23 დეკემბერს სადისციპლინო საბჭოს სადისციპლინო კოლეგიამ (4 მოსამართლის შემადგენლობით) მომჩივანი, როგორც მოსამართლე, დამნაშავედ ცნო სისხლის სამართლის მასალების 6 თვით შეყოვნების გამო და ამ კუთხით გამოჩენილი გულგრილობისთვის.⁴⁸ ამ გადაწყვეტილებაზე მომჩივნის საჩივარი განიხილა 8 მოსამართლისგან შემდგარმა სადისციპლინო პალატამ, რომელთაგან ოთხმა მონაწილეობა მიიღო პირველ მოსმენაშიც. ამასთანავე, ორივე მოსმენაზე თავმჯდომარე და მომხსენებელი მოსამართლე ერთი და იგივე პირი იყო.⁴⁹ სადისციპლინო საბჭომ კოლეგიის გადაწყვეტილება ძალაში დატოვა.⁵⁰ მომჩივანმა საჩივარი შეიტანა უზენაეს სასამართლოში, თუმცა უშედეგოდ - მისი საკასაციო საჩივარი უსაფუძვლოდ ცნეს.⁵¹ ევროპულმა სასამართლომ ხაზი გაუსვა, რომ იგივე 4 მოსამართლე იყო მოწვეული, რათა ხელახლა განეხილათ საკუთარი გადაწყვეტილება და გამოერკვიათ, ფაქტების შეფასებისას ან გამოყენებული სამართლებრივი დებულებების განმარტებისას, **თავად ხომ არ დაუშვეს რაიმე შეცდომა.**⁵² გარდა ამისა, ევროპული სასამართლო აღნიშნავს, რომ სადისციპლინო საბჭოს 8 წევრმა გადაწყვეტილება მიიღო ხმათა უმრავლესობით, ხოლო, ხმების თანაბარი განაწილების შემთხვევაში, გადამწყვეტი ხმა ეკუთვნოდა თავმჯდომარეს. რაც ნიშნავს, რომ მოსამართლეების ნახევარი, თავმჯდომარის ჩათვლით, ჩართულნი იყვნენ საქმის პირველ ინსტანციაში განხილვის პროცესში. ეს გარემოებები კი ევროპულმა სასამართლომ საკმარის საფუძვლად მიიჩნია სადისციპლინო საბჭოს მოსამართლეთა მიკერძოებულობასთან დაკავშირებით.⁵³

⁴⁷ ადამიანის უფლებათა ევროპული სასამართლოს 2017 წლის 28 მარტის გადაწყვეტილება საქმეზე „სტურუა საქართველოს წინააღმდეგ“ (CASE OF STURUA v. GEORGIA), 45729/05, პარ. 8.

⁴⁸ იქვე.

⁴⁹ იქვე, პარ. 9.

⁵⁰ იქვე, პარ. 10.

⁵¹ იქვე, პარ. 12.

⁵² იქვე, პარ. 35.

⁵³ იქვე.

(5) ქართველიშვილი საქართველოს წინააღმდეგ (2018)

საქმის დასახელება/ნომერი	ქართველიშვილი საქართველოს წინააღმდეგ, 17716/08
საჩივრის წარდგენის თარიღი	3 აპრილი, 2008 წელი
გადაწყვეტილების თარიღი	7 ივნისი, 2018 წელი
მომჩივანი	გიორგი ქართველიშვილი
ადამიანის უფლებათა ევროპული კონვენციის დარღვეული უფლებები	მე-6 მუხლის 1-ლი პუნქტი და მე-3 პუნქტის „დ“ ქვეპუნქტი
სამართლიანი დაკმაყოფილება	ზიანი - 2 500 EUR სარჩები და დანახარჯები - 300 EUR

ეს საქმე ეხება სისხლის სამართლის საქმის წარმოებისას დაცვის მოწმეთა დაკითხვაზე სასამართლოს უარს. მომჩივანი გიორგი ქართველიშვილი იყო მსჯავრდებული და, 2000 წლის 24 ოქტომბრის სააპელაციო სასამართლოს გადაწყვეტილების საფუძველზე, სასჯელის სახით შეფარდებულ 9-წლიან პატიმრობას იხდიდა.⁵⁴ სასჯელის მოხდის პერიოდში, თბილისის საქალაქო სასამართლოს 2007 წლის 1-ლი მარტის განაჩენით, მომჩივანს მსჯავრი დაედო სასჯელალსრულების დაწესებულებაში აკრძალული საგნის ტარებისთვის.⁵⁵ ეროვნული სასამართლოს გადაწყვეტილება დაეყრდნო ციხის ოფიცრების ჩვენებას, ვიდეოჩანაწერს და ჩხრეკა-ამოღების წერილობით ჩანაწერს.⁵⁶ მომჩივანმა მიმართა ეროვნულ სასამართლოს მისი თანამესაკნეების დაკითხვის შუამდგომლობით,⁵⁷ რომელიც არ დაკმაყოფილდა. ეროვნული სასამართლოს განმარტებით, ქართველიშვილმა სათანადოდ ვერ დაასაბუთა იმ მოწმეთა გამოძახების აუცილებლობა, რომლებიც, მსჯავრდებულის სტატუსის გამო, სანდოები არ იყვნენ.⁵⁸ **ევროპული სასამართლოს შეფასებით, მომჩივნის მოთხოვნა, სასამართლოში დაეკითხათ მისი თანამესაკნეები, პირდაპირ უკავშირდებოდა მის წინააღმდეგ წაყენებული ბრალდების ფაქტობრივ საფუძველს, ვინაიდან მის თანამესაკნეებს ჰქონდათ ჩხრეკის პროცესისთვის თვალყურის დევნების შესაძლებლობა.⁵⁹ ეროვნული სასამართლოების დაუსაბუთებელმა უარმა კი, მოესმინათ მომჩივნის მოწმეთა ჩვენებები, ამ უკანასკნელს წართვა მის ხელთ არსებული ერთადერთი შესაძლებლობა, ეფექტურად შეჰპასუხებოდა წარდგენილ ბრალდებას.⁶⁰**

⁵⁴ ადამიანის უფლებათა ევროპული სასამართლოს 2018 წლის 7 ივნისის გადაწყვეტილება საქმეზე „ქართველიშვილი საქართველოს წინააღმდეგ“ (CASE OF KARTVELISHVILI v. GEORGIA), 17716/08, პარ. 7. 2004 წლის 24 დეკემბრის კრწანისი-მთაწმინდის რაიონული სასამართლოს (იმ დროს მოქმედი თბილისის საოლქო სასამართლო) განაჩენით, მომჩივანს კვლავ დაედო მსჯავრი სასჯელალსრულების დაწესებულების თანამშრომლის დაუმორჩილებლობის გამო და მისი თავდაპირველი სასჯელი გაიზარდა ერთი წლით (იქვე, პარ. 8).

⁵⁵ იქვე, პარ. 20. მას სამი წლით თავისუფლების აღკვეთა მიუსაჯეს (იხ. იქვე).

⁵⁶ იქვე. ჩხრეკის ჩამტარებული სასჯელალსრულების დაწესებულების ოფიცერთა ჩვენებები დანის აღმოჩენის შესახებ შეუთავსებელია. გარდა ამისა, პროკურორმა სასამართლო განხილვისას აღიარა, რომ ჩხრეკის ვიდეოჩანაწერი ნათლად არ ასახავდა, დანა მომჩივნის საწოლში იყო ნაპოვნი თუ - არა. ამასთანავე, არსებობდა აშკარა წინააღმდეგობა ვიდეოჩანაწერსა და ჩხრეკის ოქმს შორის (იხ. იქვე, პარ. 63).

⁵⁷ იქვე, პარ. 14.

⁵⁸ 2007 წლის 12 თებერვლის განჩინებით, თბილისის საქალაქო სასამართლომ მხარეთა მოსმენის შემდეგ დაუსაბუთებლად მიიჩნია მომჩივნის შუამდგომლობა თანასაკნელთა დაკითხვის შესახებ. თბილისის სააპელაციო სასამართლოს 2007 წლის 3 ოქტომბრის განაჩენით, არ დაკმაყოფილდა მომჩივნის საჩივარი და მისი სასჯელი სამიდან ოთხ წლამდე გაზარდა, ხოლო უზენაესმა სასამართლომ მისი საჩივარი დაუშვებლად ცნო (იხ. იქვე, პარ. 16, 23-24).

⁵⁹ იქვე, პარ. 63.

⁶⁰ იქვე, პარ. 64.

(6) მერაბ ტურავა და სხვები საქართველოს წინააღმდეგ და თამარ ლალიაშვილი საქართველოს წინააღმდეგ (2018)

საქმის დასახელება/ნომერი	მერაბ ტურავა და სხვები საქართველოს წინააღმდეგ და თამარ ლალიაშვილი საქართველოს წინააღმდეგ, 7607/07 და 8710/07
საჩივრის წარდგენის თარიღი	7607/07 - 8 თებერვალი, 2007 წელი 8710/07 - 5 თებერვალი, 2007 წელი
გადაწყვეტილების თარიღი	27 ნოემბერი, 2018 წელი
მომჩივნები	მერაბ ტურავა (7607/07) ნინო გვენეტაძე (7607/07) მურმან ისაევი (7607/07) თამარ ლალიაშვილი (8710/07)
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ზიანი; ხარჯები და დანახარჯები - 10 000 EUR (მურმან ისაევსა და თამარ ლალიაშვილს, თითოეულს)

ეს საქმეები შეეხება მოსამართლეების მიმართ დისციპლინურ სამართალწარმოებას და თანამდებობიდან მათ გათავისუფლებას. 1999-2000 წლებში მომჩივნები 10-წლიანი ვადით აირჩიეს უზენაესი სასამართლოს სისხლის სამართლის პალატის მოსამართლეებად.⁶¹ 2005 წლის 19 სექტემბერს იუსტიციის უმაღლესმა საბჭომ მომჩივანთა მიმართ დაიწყო დისციპლინური წარმოება.⁶² პროფესიული ვალდებულების მრავალჯერადი დარღვევისთვის მათ დაეკისრათ პასუხისმგებლობა - თანამდებობიდან გათავისუფლება, ამასთანავე, აკრძალათ მოსამართლის პოზიციის დაკავება.⁶³

2016 წლის 1-ელ სექტემბერს და 2017 წლის 17 იანვარს მთავრობამ წარადგინა ცალმხრივი დეკლარაცია,⁶⁴ რომლითაც აღიარა, რომ მურმან ისაევისა და თამარ ლალიაშვილის მიმართ დაირღვა კონვენციის მე-6 მუხლის პირველი პუნქტით (სამოქალაქო ნაწილში) გათვალისწინებული უფლება, იმავდროულად, იკისრა თითოეულისთვის 10 000 ევროს გადახდის ვალდებულება.⁶⁵ მერაბ ტურავასა და ნინო გვენეტაძის საჩივრებთან დაკავშირებით, ევროპული სასამართლოს შეფასებით, რელევანტური კანონმდებლობის ცვლილების შედეგად, წაიშალა ორივე მომჩივნის დისციპლინარული ჩანაწერი და მათ კვლავ შეუძლიათ მოსამართლის

⁶¹ ევროპული სასამართლოს 2018 წლის 27 ნოემბრის განჩინება საქმეებზე: მერაბ ტურავა და სხვები საქართველოს წინააღმდეგ და თამარ ლალიაშვილი საქართველოს წინააღმდეგ (*MERAB TURAVA AND OTHERS v. GEORGIA AND TAMAR LALIAASHVILI v. GEORGIA*), 7607/07 და 8710/07, პარ. 4.

⁶² იქვე, პარ. 5.

⁶³ იქვე, პარ. 8.

2005 წლის 12 დეკემბერს, საერთო სასამართლოების მოსამართლეთა სადისციპლინო კოლეგიის გადაწყვეტილების თანახმად, მოსამართლეებმა (მომჩივნებმა) დაარღვიეს თავიანთი პროფესიული ვალდებულებები და სანქციის სახით სამსახურიდან გათავისუფლება დაეკისრათ. 2006 წლის 10 აგვისტოს საქართველოს უზენაესი სასამართლოს სადისციპლინო პალატამ აღნიშნული გადაწყვეტილება ძალაში დატოვა (იხ. იქვე, პარ. 6-7).

⁶⁴ მესამე და მეოთხე მომჩივნებთან ვერ შედგა მეგობრული მორიგება, ამიტომაც, მთავრობამ წარადგინა ცალმხრივი დეკლარაცია საჩივრებში წამოჭრილი საკითხების გადასაჭრელად (იხ. იქვე, პარ. 17).

⁶⁵ იქვე, პარ. 18.

თანამდებობის დაკავება.⁶⁶ აქედან გამომდინარე, ადამიანის უფლებათა ევროპულმა სასამართლომ მათი საჩივრები ამორიცხა განსახილველთა ნუსხიდან.⁶⁷

(7) ჭოხონელიძე საქართველოს წინააღმდეგ (2018)

საქმის დასახელება/ნომერი	ჭოხონელიძე საქართველოს წინააღმდეგ, 31536/07
საჩივრის წარდგენის თარიღი	5 ივნისი, 2007 წელი
გადაწყვეტილების თარიღი	28 ივნისი, 2018 წელი
მომჩივანი	ელდარ ჭოხონელიძე
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ზიანი - 2 500 EUR

ეს საქმე ეხება სისხლის სამართლის წესით დაკავებული პირის მიერ დასაბუთებული არგუმენტების არასათანადო განხილვას.⁶⁸ 2005 წლის 13 დეკემბერს ქრთამის ადებისას დააკავეს მომჩივანი ელდარ ჭოხონელიძე - იმ დროს მარნეულის რაიონის გუბერნატორის მოადგილე.⁶⁹ სასამართლოში სამართალწარმოებისას მომჩივანი აღნიშნავდა, რომ ქრთამის მიმცემი იყო საიდუმლო აგენტი⁷⁰ და სამართალდამცავების მხრიდან მოხდა პროვოცირება.⁷¹ ბოლნისის რაიონულ სასამართლოს საერთოდ არ განუხილავს მომჩივნის არგუმენტი და მას 7 წლით თავისუფლების აღკვეთა მიუსაჯა.⁷² მომჩივნის არგუმენტი აგენტ-პროვოკატორის მიერ განხორციელებული დანაშაულის პროვოცირების შესახებ არც თბილისის სააპელაციო სასამართლომ განიხილა,⁷³ ხოლო უზენაესმა სასამართლომ მისი საჩივარი დაუშვებლად ცნო.⁷⁴

ეროვნულ სასამართლოსთან მიმართებით ადამიანის უფლებათა ევროპულმა სასამართლომ დაადგინა შემდეგი დარღვევები:

ბრალდებულის შუამდგომლობის განუხილველობა

ევროპული სასამართლოს შეფასებით, ძირითადი პროცედურული ხარვეზი, რომელიც, სავარაუდოდ, ღიად დარჩა ეროვნულ დონეზე, იყო ეროვნული სასამართლოების მიერ ჭოხონელიძის იმ შუამდგომლობის განუხილველობა, რომლის მიხედვითაც, ის პოლიციის პროვოკაციის მსხვერპლი გახდა.⁷⁵ მეტიც, ეროვნულ სასამარ-

⁶⁶ იქვე, პარ. 47. უფრო მეტიც, 2012 წლის 27 მარტს გაუქმდა მოსამართლეთა დისციპლინური პასუხისმგებლობის შესახებ სადავო ნორმის მოქმედება, ხოლო 2014 წლის პირველ აგვისტოს შევიდა ცვლილებები საერთო სასამართლოების შესახებ კანონის 34-ე მუხლის მე-2 პუნქტში, რომლის მიხედვითაც, 2012 წელს გაუქმებული ნორმის შედეგად გათავისუფლებულ მოსამართლეს აღარ აეკრძალება მოსამართლის თანამდებობის დაკავება (იხ. პარ. 28-29). გარდა ამისა, მესამე მომჩივანი უვადოდ დაინიშნა თბილისის სააპელაციო სასამართლოს მოსამართლედ (იხ. იქვე).

⁶⁷ იქვე, პარ. 47.

⁶⁸ იქვე.

⁶⁹ ადამიანის უფლებათა ევროპული სასამართლოს 2018 წლის 28 ივნისის გადაწყვეტილება საქმეზე „ჭოხონელიძე საქართველოს წინააღმდეგ“ (CASE OF TCHOKHONELIDZE v. GEORGIA), 31536/07, პარ. 6-14.

⁷⁰ ქრთამის მიმცემმა არ უარყო, რომ სხვა სისხლის სამართლის საქმეებში მოქმედებდა, როგორც კუდ-ის საიდუმლო აგენტი. პირველი ინსტანციის სასამართლოში მან განაცხადა, რომ უკვე კუდ-ის საიდუმლო აგენტი იყო, როდესაც პირველად მიმართა მომჩივანს (იხ. იქვე, პარ. 25).

⁷¹ იქვე, პარ. 17.

⁷² იქვე, პარ. 27.

⁷³ იქვე, პარ. 33.

⁷⁴ იქვე, პარ. 34.

⁷⁵ იქვე, პარ. 47.

როლოებს უნდა დაედგინათ მომჩივნის წინააღმდეგ ფარული ოპერაციის ჩატარების მიზეზი, უკანონო ქმედებაში სამართალდამცავების მონაწილეობის ფარგლები, წაქეზების ან ზეწოლის ხასიათი. თუმცა, ევროპული სასამართლოს შეფასებით, ეროვნულმა სასამართლოებმა, მომჩივნის კარგად დასაბუთებული არგუმენტების საპასუხოდ, არ წარმოადგინეს მიზეზი, რატომ უნდა დარჩენილიყო საკითხი განუხილველი.⁷⁶

მთავარი მოწმის დაკითხვის განუხორციელებლობა

მომჩივანმა პირველი ინსტანციის სასამართლოს სთხოვა, მოეწვიათ დამატებითი მოწმე, რომლის ქმედებებმაც ჭოხონელიძის წინააღმდეგ სისხლის სამართლის საქმის აღძვრა გამოიწვია.⁷⁷ ამ მოწმესთან (შემდგომში ნ.) დაკავშირებით ბოლნისის რაიონული სასამართლო დაეყრდნო პროკურატურის ინფორმაციას, რომ უცნობი იყო მისი ადგილსამყოფელი. შესაბამისად, სასამართლომ დაადგინა, რომ ობიექტურად შეუძლებელი იყო მოწმის სახით მისი გამოძახება.⁷⁸ სააპელაციო სასამართლოში საქმის წარმოებისას მომჩივნის წარმომადგენლები მივიდნენ ნ-ს სახლში და სთხოვეს სასამართლოში ჩვენების მიცემა, თუმცა მან უარი თქვა. ამასთანავე, პროკურატურამ განაცხადა, რომ უზრუნველყოფდა ნ-ს მოსვლას მომდევნო მოსმენაზე.⁷⁹ მოსმენამდე 4 დღით ადრე ნ-მ მიმართა თბილისის სააპელაციო სასამართლოს, რომ, ოჯახური მდგომარეობის გამო, ვერ შეძლებდა გამოცხადებას,⁸⁰ ხოლო მოსმენის დღეს პროკურატურამ წარმოადგინა სხდომამდე 2 დღით ადრე პერიოდით დათარიღებული ნ-ს მეზობლის წერილი, რომლის მიხედვითაც, მან სახლი დიდი ხნის წინ დატოვა და მისი ამჟამინდელი ადგილსამყოფელი უცნობი იყო. ამის გათვალისწინებით, თბილისის სააპელაციო სასამართლომ დაადგინა, რომ ვერ ხერხდებოდა მოწმის ადგილსამყოფლის იდენტიფიცირება, რის გამოც, ობიექტურად შეუძლებელი იყო მოწმედ მისი გამოძახება.⁸¹ ამგვარად, ევროპული სასამართლოს შეფასებით, **ეროვნულმა სასამართლოებმა ვერ უზრუნველყვეს მეორე მთავარი მოწმის დასწრება და დაკითხვა, შედეგად, სასამართლო პროცესი არ ჩატარდა შეჯიბრებითობის პრინციპის დაცვით.**⁸²

(8) ბართაია საქართველოს წინააღმდეგ (2018)

საქმის დასახელება/ნომერი	ბართაია საქართველოს წინააღმდეგ, 10978/06
საჩივრის წარდგენის თარიღი	16 თებერვალი, 2006 წელი
გადაწყვეტილების თარიღი	26 ივლისი, 2018 წელი
მომჩივანი	ალექსანდრე ბართაია
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ზიანი - 1 500 EUR ხარჯები და დანახარჯები - 1000 EUR

ეს საქმე ეხება სასამართლოში სამოქალაქო სამართალწარმოებისას მომჩივნის მიმართ დაუსწრებელი გადაწყვეტილების გამოტანას, მაშინ, როდესაც ის ადვოკატის

⁷⁶ იქვე, პარ. 52.

⁷⁷ იქვე, პარ. 26.

⁷⁸ იქვე.

⁷⁹ იქვე, პარ. 30.

⁸⁰ იქვე, პარ. 31.

⁸¹ იქვე, პარ. 32.

⁸² იქვე, პარ. 52.

გარეშე ესწრებოდა სასამართლო პროცესს.⁸³ ადვოკატმა სხდომის ჩატარებამდე 6 დღით ადრე სასამართლოს პროცესის გადადების თაობაზე შუამდგომლობით მიმართა, თუმცა მისი მოთხოვნა უპასუხოდ დარჩა.⁸⁴ პროცესზე მომჩივანმა განაცხადა, რომ ადვოკატის გარეშე ვერ შეძლებდა საქმეში მონაწილეობას და მოითხოვა სხდომის გადადება,⁸⁵ თუმცა სასამართლომ მისი თხოვნა არ გაითვალისწინა და დაადგინა, რომ საქმის განხილვაში მონაწილეობაზე მომჩივნის უარი სასამართლოში მისი გამოუცხადებლობის ტოლფასი იყო.⁸⁶ ევროპული სასამართლოს შეფასებით, ეროვნულმა სასამართლომ არ გამოიკვლია, არსებობდა თუ არა იმის მტკიცებულება, რომ მომჩივანი ან მისი ადვოკატი, რომლებმაც პროცესის გადადებისთვის წარმოადგინეს არსებითი და გადამოწმებადი მიზეზი, მოქმედებდნენ არაკეთილსინდისიერად, ან ცდილობდნენ სამართალწარმოების უმიზეზოდ გაჭიანურებას.⁸⁷ მომჩივნის უარი ადვოკატის დასწრების გარეშე საქმის განხილვაში მონაწილეობის მიღებაზე რაიონულმა სასამართლომ, ფაქტობრივად, გააიგივა მომჩივნის მიერ საკუთარ უფლებაზე უარის თქმასთან – საქმე არსებითად განხილულიყო მისი მონაწილეობით. თუმცა, დაუსწრებელი გადაწყვეტილების გამოტანის რისკთან დაკავშირებით პირველი ინსტანციის მოსამართლემ მომჩივანს არ განუმარტა, რომ ეს გულისხმობდა მისი სარჩელის დაკმაყოფილებაზე ავტომატურ უარს, ყოველგვარი მიზეზის მითითების გარეშე.⁸⁸ ამის გათვალისწინებით, ევროპულმა სასამართლომ დაადგინა, რომ დაირღვა სამართალწარმოებაში მომჩივნის ეფექტიანი მონაწილეობისა და მხარეთა თანასწორობის უფლება.⁸⁹

(9) როსტომაშვილი საქართველოს წინააღმდეგ (2018)

საქმის დასახელება/ნომერი	როსტომაშვილი საქართველოს წინააღმდეგ, 13185/07
საჩივრის წარდგენის თარიღი	2 მარტი, 2007 წელი
გადაწყვეტილების თარიღი	8 ნოემბერი, 2018 წელი
მომჩივანი	პაატა როსტომაშვილი
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ზიანი - 3 600 EUR

ეს საქმე ეხება სასამართლო გადაწყვეტილების დაუსაბუთებლობას. 2004 წლის 16 აგვისტოს მომჩივანი და ორი სხვა პირი დააკავეს დამამძიმებელ გარემოებებში მკვლელობის ჩადენისთვის, ასევე, ცეცხლსასროლი იარაღის უკანონო წარმოების, ფლობისა და ტარებისთვის.⁹⁰ 2006 წლის 8 მაისს თბილისის საქალაქო სასამართლომ მომჩივანი დამნაშავედ ცნო დამამძიმებელ გარემოებაში ჩადენილი განზრახ მკვლელობისთვის და 15 წლით თავისუფლების აღკვეთა მიუსაჯა.⁹¹ მომჩივანმა ქვედა ინსტანციის სასამართლოს გადაწყვეტილება გაასაჩივრა⁹² ზემდგომში,

⁸³ ადამიანის უფლებათა ევროპული სასამართლოს 2018 წლის 26 ივლისის გადაწყვეტილება საქმეზე „ბართაია საქართველოს წინააღმდეგ“ (CASE OF BARTAIYA v. GEORGIA), 10978/06, პარ. 7.

⁸⁴ იქვე, პარ. 9.

⁸⁵ იქვე, პარ. 8.

⁸⁶ იქვე, პარ. 9.

⁸⁷ იქვე, პარ. 33.

⁸⁸ იქვე, პარ. 35.

⁸⁹ იქვე, პარ. 38.

⁹⁰ ადამიანის უფლებათა ევროპული სასამართლოს 2018 წლის 8 ნოემბრის გადაწყვეტილება საქმეზე „როსტომაშვილი საქართველოს წინააღმდეგ“ (CASE OF ROSTOMASHVILI v. GEORGIA), 13185/07, პარ. 6.

⁹¹ იქვე, პარ. 13.

⁹² ეროვნული სასამართლოები სრულად დაეყრდნენ გარდაცვლილის მამის ჩვენებას, რომელიც, მისი

თუმცა - უშედეგოდ.⁹³ ევროპული სასამართლოს შეფასებით, ეროვნულმა სასამართლოებმა პასუხი არ გასცეს მომჩივნის ორ მთავარ არგუმენტს.⁹⁴ კონკრეტულად, სხვა ბრალდებულისგან განსხვავებით, არცერთი მტკიცებულება არ ეხებოდა უშუალოდ მომჩივანს და არ ცხადყოფდა დანაშაულში მის მონაწილეობას.⁹⁵ ამასთანავე, მომჩივნის წინააღმდეგ ერთადერთი მტკიცებულება - გარდაცვლილის მამის ჩვენება - იყო საექვო, ვინაიდან ეწინააღმდეგებოდა სხვა მოწმეთა ჩვენებებს. ამიტომ, კითხვის ნიშნის ქვეშაა, იყო თუ არა გარდაცვლილის მამა დანაშაულის თვითმხილველი.⁹⁶ მეტიც, ევროპული სასამართლოს შეფასებით, ზემოაღნიშნული არგუმენტები უკავშირდებოდა სისხლის სამართლის საქმის ძირითად ნაწილს და მოითხოვდა ზუსტ პასუხს, რაც ეროვნულმა სასამართლოებმა ვერ უზრუნველყვეს. საბოლოოდ, სასამართლოს დასაბუთება როსტომამშვილის დამნაშავედ ცნობის შესახებ იყო ზოგადი.⁹⁷

(10) კობიაშვილი საქართველოს წინააღმდეგ (2019)

საქმის დასახელება/ნომერი	კობიაშვილი საქართველოს წინააღმდეგ, 36416/06
საჩივრის წარდგენის თარიღი	21 აგვისტო, 2006 წელი
გადაწყვეტილების თარიღი	14 მარტი, 2019 წელი
მომჩივანი	არჩილ კობიაშვილი
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ზიანი - 3 500 EUR

ეს საქმე შეეხება სასამართლოს მიერ მნიშვნელოვანი გარემოებების არასაკმარისად გამოკვლევას და ჩხრეკის კანონიერების არასათანადოდ შეფასებას. მომჩივანი, რომელიც ნარკოტიკული დანაშაულის გამო იყო მსჯავრდებული, აცხადებდა, რომ ნარკოტიკული ნივთიერებები, რომლებიც, სავარაუდოდ, აღმოუჩინეს, მას არ ეკუთვნოდა.⁹⁸ ამ საქმეში პირადი ჩხრეკა იყო ის საგამოძიებო ღონისძიება, რომლის შედეგადაც იყო მოპოვებული მტკიცებულება და სწორედ ამ მტკიცებულებას ეფუძნებოდა მსჯავრდება.⁹⁹ მომჩივნის განცხადებით, მას არ მისცემია ადეკვატური შესაძლებლობა, რომ ეჭვქვეშ დაეყენებინა პირადი ჩხრეკის კანონიერება, ეროვნულმა სასამართლოებმა დასაბუთებლად ცნეს უკანონო მტკიცებულებები და, შესაბამისად, სამართალწარმოება არ იყო სამართლიანი.¹⁰⁰

ეროვნულ სასამართლოსთან მიმართებით ადამიანის უფლებათა ევროპულმა სასამართლომ დაადგინა შემდეგი დარღვევები:

ჩხრეკის ფაქტობრივი გარემოებების არასაკმარისად გამოკვლევა

თქმით, იყო დანაშაულის თვითმხილველი (იქვე, პარ. 14, 17). ასევე, აღსანიშნავია, რომ გარდაცვლილის მამისა და სხვა ორი მოწმის ჩვენება ურთიერთსაწინააღმდეგოა. მოწმეები აღნიშნავენ, რომ მკვლელობის შემდეგ მალევე ნახეს გარდაცვლილის მამა სახლში და მას არ უხსენებია, რომ დანაშაულის თვითმხილველი იყო (იქვე, პარ. 16).

⁹³ იქვე, პარ. 17.

⁹⁴ იქვე, პარ. 59.

⁹⁵ იქვე, პარ. 16.

⁹⁶ იქვე, პარ. 59.

⁹⁷ იქვე.

⁹⁸ ადამიანის უფლებათა ევროპული სასამართლოს 2019 წლის 14 მარტის გადაწყვეტილება საქმეზე „კობიაშვილი საქართველოს წინააღმდეგ“ (CASE OF KOBIAHVILI v. GEORGIA), 36416/06, პარ. 59.

⁹⁹ იქვე, პარ. 60.

¹⁰⁰ იქვე, პარ. 59.

ევროპული სასამართლოს თანახმად, მომჩივნის პირად ჩხრეკაზე ორი მოწმის დასწრება და სასამართლოს მიერ მათი შემდგომი დაკითხვა ადეკვატურად ხელს არ უწყობდა ჩხრეკის ფაქტობრივი გარემოებების გამოკვლევას.¹⁰¹ ეროვნულმა სასამართლომ არ შეაფასა ის გარემოება, რომ პირველმა მოწმემ შეცვალა წინასასამართლო ჩვენება - მისი თქმით, ის ჩხრეკას არ ესწრებოდა და ყალბი ჩვენების მიცემა აიძულეს. სასამართლოში მის მიერ გაკეთებული განცხადებები მოსამართლემ არასანდოდ და ალოგიურად მიიჩნია.¹⁰² გარდა ამისა, სააპელაციო სასამართლომ¹⁰³ ასევე უგულებელყო მეორე მოწმის ჩვენების სანდოობასთან დაკავშირებით წამოჭრილი საკითხი.¹⁰⁴

ჩხრეკის გადაუდებლობის დაუსაბუთებლობა

ევროპული სასამართლოს აზრით, ჩხრეკის კანონიერების შემოწმება არ იყო მომჩივნისთვის ხელმისაწვდომი. სასამართლომ ჩხრეკა გადაუდებლად მიიჩნია ისე, რომ ხელთ არ ჰქონია ისეთი მნიშვნელოვანი დოკუმენტები/ინფორმაცია, როგორცაა პოლიციის ოქმი, გადაუდებელი აუცილებლობის შემთხვევაში ჩხრეკის შესახებ დადგენილება, ოპერატიული ინფორმაცია, რომლის საფუძველზეც, ჩხრეკა ჩატარდა და, ასევე, არ დაუსაბუთებია საგამოძიებო მოქმედების გადაუდებლობა.¹⁰⁵ პოლიციელთა ჩვენებები არ შეესაბამებოდა მომჩივნის ჩხრეკის თაობაზე დადგენილებას, თუმცა, ეროვნულმა სასამართლოებმა ეს ხარვეზი უგულებელყვეს.¹⁰⁶ ამასთანავე, ეროვნულმა სასამართლოებმა პოლიციელების ჩვენებები ავტომატურად ობიექტურად მიიჩნიეს, განსხვავებით მომჩივნის მეგობრების მიერ მიცემული ჩვენებებისგან, რომლებიც არ გაითვალისწინეს სუბიექტურობისა და არასანდოობის არგუმენტით.¹⁰⁷

(11) კერესელიძე საქართველოს წინააღმდეგ (2019)

საქმის დასახელება/ნომერი	კერესელიძე საქართველოს წინააღმდეგ, 39718/09
საჩივრის წარდგენის თარიღი	27 ივლისი, 2009 წელი
გადაწყვეტილების თარიღი	28 მარტი, 2019 წელი
მომჩივანი	ირაკლი კერესელიძე
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ზიანი - 1 500 EUR ხარჯები და დანახარჯები - 2 370 EUR

ეს საქმე ეხება მომჩივნისთვის დანიშნული სასჯელის ათვლის თარიღის ცვლილებასთან დაკავშირებით სასამართლოს წინაშე საკუთარი არგუმენტების წარდგენის შესაძლებლობის არმიცემას. მომჩივანი იყო მსჯავრდებული, რომელიც 1995 წლის 24 აგვისტოდან იხდიდა სასჯელის სახით შეფარდებულ თავისუფლების აღკვე-

¹⁰¹ იქვე, პარ. 64.

¹⁰² იქვე, პარ. 62.

¹⁰³ მან უარი თქვა პირველი ინსტანციის სასამართლოს წინაშე გამოცხადებაზე, თუმცა გამოცხადდა სააპელაციო სასამართლოში, სადაც თავისი პირველადი განცხადებები დაადასტურა.

¹⁰⁴ დაცვის მხარემ სასამართლოს წარუდგინა დოკუმენტი, რომლის მიხედვითაც, ხსენებული მოწმე იყო პოლიციის ყოფილი თანამშრომელი. დაცვის მხარე უჭვექვემ აყენებდა მისი ჩვენების სანდოობას და აცხადებდა, რომ იგი ჩხრეკისას მოქმედებდა, როგორც პოლიციის აგენტი და, რომ იგი ასევე სხვა მრავალ სისხლის სამართლის საქმეზე იყო მოწმე სამართლებრივი დოკუმენტის შედგენისას (იქვე, პარ. 63).

¹⁰⁵ იქვე, პარ. 67-68.

¹⁰⁶ იქვე, პარ. 72.

¹⁰⁷ იქვე.

თას.¹⁰⁸ 2006 წლის 12 აპრილს თბილისის საქალაქო სასამართლომ, ციხიდან გაქცევის გამო, მას ოთხი წლითა და ექვსი თვით თავისუფლების აღკვეთა შეუფარდა.¹⁰⁹ საკანონმდებლო ცვლილებების¹¹⁰ და სასამართლო გადაწყვეტილებების შედეგად, მისი გათავისუფლების თარიღი გახდა სადავო და რამდენჯერმე შეიცვალა.¹¹¹ ევროპულმა სასამართლომ ხაზგასმით აღნიშნა, რომ სააპელაციო სასამართლოს განჩინებაში ცვლილების შეტანის პროცესში მომჩივანი არ იყო ჩართული და ამის შესახებ ეცნობა მხოლოდ მას შემდეგ, რაც უზენაეს სასამართლოს უკვე მიღებული ჰქონდა საბოლოო განჩინება.¹¹² იმის გათვალისწინებით, რომ უზენაესმა სასამართლომ საკითხი გადაწყვიტა საქმის ზეპირი მოსმენის გარეშე, მომჩივნისთვის ცნობილი არ გახდა შესწორებული სააპელაციო განჩინების თაობაზე. აქედან გამომდინარე, ევროპული სასამართლოს შეფასებით, მომჩივანს არ მიეცა საშუალება, წარედგინა არგუმენტები (როგორც სააპელაციო საჩივრის ნაწილი, ან ცალკე), განაჩენთა ერთობლიობით დანიშნული სასჯელის ათვლის შესწორებულ თარიღსა და ეროვნულ კანონმდებლობასთან მის შესაბამისობაზე.¹¹³ **ამგვარად, ადამიანის უფლებათა ევროპულმა სასამართლომ დაადგინა, რომ მომჩივანს არ ჰქონდა შესაძლებლობა, ზეპირად ან წერილობით წარედგინა საკუთარი არგუმენტები განაჩენთა ერთობლიობით დანიშნული სასჯელის ათვლის თარიღის ცვლილებასთან დაკავშირებით, შედეგად, სისხლის სამართალწარმოება იყო უსამართლო და დაირღვა ევროპული კონვენციის მე-6 მუხლის 1-ლი პუნქტი.**¹¹⁴

(12) სვანიძე საქართველოს წინააღმდეგ (2019)

საქმის დასახელება/ნომერი	სვანიძე საქართველოს წინააღმდეგ, 37809/08
საჩივრის წარდგენის თარიღი	1-ლი ივლისი, 2008 წელი
გადაწყვეტილების თარიღი	25 ივლისი, 2019 წელი

¹⁰⁸ ადამიანის უფლებათა ევროპული სასამართლოს 2019 წლის 18 მარტის გადაწყვეტილება საქმეზე „კერესელიძე საქართველოს წინააღმდეგ“ (CASE OF KERESLIDZE v. GEORGIA), 39718/09, პარ. 6.

¹⁰⁹ იქვე, პარ. 8.

¹¹⁰ 2006 წლის 29 დეკემბერს შეიცვალა სისხლის სამართლის კოდექსის ის დებულება, რომელიც არეგულირებდა განაჩენთა ერთობლიობის დროს სასჯელის დანიშვნას. შეცვლილი კანონის 59-ე მუხლის თანახმად, განაჩენთა ერთობლიობით დანიშნული საბოლოო სასჯელი აითვლება ბოლო განაჩენის მიღების დღიდან. შესწორებული კანონი პირდაპირ არ ითვალისწინებდა მისი უკუძალის საკითხს (იხ. იქვე, პარ. 9).

¹¹¹ 2008 წლის 20 თებერვალს ჯერ კიდევ მიმდინარეობდა სააპელაციო სამართალწარმოება, როდესაც უზენაესმა სასამართლომ დაადგინა, რომ მომჩივნის პირველი მსჯავრდების მოუხდელი ნაწილი და მეორე მსჯავრდება უნდა შეკრებილიყო, ხოლო განაჩენთა ერთობლიობით დანიშნული სასჯელის ათვლა უნდა დაწყებულიყო მეორე დანაშაულის ჩადენის დღიდან და არა - შემდგომი სასჯელის დაკისრების თარიღიდან. ამგვარად მომჩივნის სასჯელი იწურებოდა 2010 წლის 29 სექტემბერს. ხოლო სააპელაციო სასამართლოს განჩინებით, მომჩივანს უნდა მოეხადა განაჩენთა ერთობლიობით დანიშნული სასჯელი, რომლის ათვლაც უნდა დაწყებულიყო მეორე დანაშაულის ჩადენის თარიღიდან, შესაბამისად, სასჯელი ამოიწურებოდა 2015 წლის 29 სექტემბერს. სააპელაციო სასამართლომ შეასწორა განაჩენთა ერთობლიობით დანიშნული სასჯელის ათვლის თარიღი და მიუთითა დღე, როდესაც პირველი ინსტანციის სასამართლომ მიიღო განაჩენი მეორე მსჯავრდების შესახებ. საკასაციო სასამართლომ გაითვალისწინა შესწორებული სააპელაციო განჩინება და განაცხადა, რომ განაჩენთა ერთობლიობით დანიშნული სასჯელის ხელახლა დაანგარიშებული შვიდწლიანი ვადის ათვლა იწყებოდა 2006 წლის 12 აპრილს, ანუ მეორე მსჯავრდებისთვის სასჯელის დაკისრების დღეს. ეს ვადა უნდა ამოწურულიყო 2013 წლის 12 აპრილს. მომჩივანმა აღნიშნა, რომ მხოლოდ უზენაესი სასამართლოს საბოლოო განჩინებით გახდა მისთვის ცნობილი 2009 წლის 3 აპრილის შესწორებული სააპელაციო განჩინების შესახებ (იხ. იქვე, პარ. 11-16).

¹¹² იქვე, პარ. 39.

¹¹³ იქვე.

¹¹⁴ იქვე, პარ. 40.

მომჩივანი	თინა სვანიძე
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ზიანი - 3 500 EUR

ეს საქმე ეხება სისხლის სამართალწარმოებისას სათადარიგო მოსამართლის უარს მომჩივნის ადვოკატის შუამდგომლობებზე - ხელახლა გამოეკვლია მტკიცებულებები და დაეკითხა სასამართლოში დაცვის მხარის მოწმეები.¹¹⁵ მომჩივანმა სააპელაციო სასამართლოში სამართალწარმოებისას კვლავ მოითხოვა ორი დამატებითი მოწმის დაკითხვა, თუმცა სააპელაციო სასამართლომ დაადგინა, რომ ეს შუამდგომლობა უკვე იყო განხილული პირველი ინსტანციის სასამართლოში.¹¹⁶ ევროპული სასამართლოს განმარტებით, მიუხედავად იმისა, რომ სათადარიგო მოსამართლეს ჰქონდა ყველა მოწმის გამოკითხვის ჩანაწერი,¹¹⁷ მას საერთოდ არ მიუღია მონაწილეობა ჩვენებების ზეპირ მოსმენაში, არ მოუსმენია ჩვიდმეტი მოწმიდან არც ერთისთვის, ორი ექსპერტისა და მომჩივნის დამცველების ჩათვლით, და მხოლოდ სასამართლოს ჩანაწერების საფუძველზე ცნო მომჩივანი დამნაშავედ.¹¹⁸ ევროპული სასამართლოს აზრით, საქმის რთული ფაქტობრივი წინაპირობებისა და იმ ფაქტის გათვალისწინებით, რომ სათადარიგო მოსამართლე საქმეს ერთპიროვნულად განიხილავდა, ის უშუალოდ ვერ შეაფასებდა შესაბამისი პირების განცხადებებსა და ქცევას, ამან კი შეამცირა მისი შესაძლებლობები, ჩამოეყალიბებინა საკუთარი აზრი მათი სანდოობის შესახებ და ჰქონოდა სათანადო წარმოდგენა მტკიცებულებებისა და არგუმენტების თაობაზე.¹¹⁹ გარდა ამისა, ევროპული სასამართლოს განმარტებით, ზედა ინსტანციის სასამართლოების მიერ, გარკვეული ჩვენებების უშუალოდ მოსმენის გარეშე, პირველი ინსტანციის სასამართლოს გადაწყვეტილების ძალაში დატოვებით, ვერ გამოსწორდა ქვედა ინსტანციის ხარვეზები.¹²⁰

(13) გელენიძე საქართველოს წინააღმდეგ (2019)

საქმის დასახელება/ნომერი	გელენიძე საქართველოს წინააღმდეგ, 72916/10
საჩივრის წარდგენის თარიღი	5 ნოემბერი, 2010 წელი
გადაწყვეტილების თარიღი	7 ნოემბერი, 2019 წელი
მომჩივანი	მანანა გელენიძე
ადამიანის უფლებათა ევროპული კონვენციის დარღვეული უფლებები	მე-6 მუხლის 1-ლი პუნქტი და მე-3 პუნქტის „ა“ და „ბ“ ქვეპუნქტები
სამართლიანი დაკმაყოფილება	ზიანი - 5 000 EUR

ეს საქმე შეეხება სისხლის სამართლის პროცესში დაცვის მხარის არგუმენტის განუხილველად დატოვებას და, ბრალდების თვითნებური გადაკვალიფიცირების შედეგად, დაცვის მხარისთვის ჯეროვნად მომზადების შესაძლებლობის არმიცემას. მომჩივანი იყო მოსამართლე, რომელიც 2006 წელს ეროვნულმა სასამართლოებმა დაუსწრებლად დამნაშავედ ცნეს უკანონო გადაწყვეტილების გამოტანის გამო.¹²¹

¹¹⁵ ადამიანის უფლებათა ევროპული სასამართლოს 2019 წლის 25 ივლისის გადაწყვეტილება საქმეზე „სვანიძე საქართველოს წინააღმდეგ“ (CASE OF SVANIDZE v. GEORGIA), 37809/08, პარ. 13.

¹¹⁶ იქვე, პარ. 19.

¹¹⁷ იქვე, პარ. 35.

¹¹⁸ იქვე, პარ. 34.

¹¹⁹ იქვე, პარ. 35.

¹²⁰ იქვე, პარ. 37.

¹²¹ ადამიანის უფლებათა ევროპული სასამართლოს 2019 წლის 7 ნოემბრის გადაწყვეტილება საქმეზე „გელენიძე საქართველოს წინააღმდეგ“ (CASE OF GELENIDZE v. GEORGIA), 72916/10, პარ. 5-7.

2007 წელს საქართველოს პარლამენტმა გააუქმა სისხლის სამართლის კოდექსის ის ნორმა, რომლითაც მომჩივანს მსჯავრი დაედო.¹²² 2009 წელს კი საქართველოში ჩამოსული მომჩივანი დააკავეს. მომჩივანმა შეიტანა სააპელაციო საჩივარი, რომლითაც ითხოვდა მის წინააღმდეგ გამოტანილი გადაწყვეტილების გაუქმებას, რადგან დანაშაული, რომლის ჩადენის გამოც სასჯელი მიესაჯა, დეკრიმინალიზებული იყო,¹²³ თუმცა ქმედება გადაკვალიფიცირდა სხვა დანაშაულად.¹²⁴

ევროპულ სასამართლოსთან მიმართებით ადამიანის უფლებათა ევროპულმა სასამართლომ დაადგინა შემდეგი დარღვევები:

დასაბუთებული არგუმენტის განუხილველად დატოვება

ევროპული სასამართლოს შეფასებით, სააპელაციო სასამართლოს ყოველმხრივ უნდა განეხილა მომჩივნის არგუმენტი იმასთან დაკავშირებით, რომ იმ დროს მოქმედი კანონმდებლობა ზღუდავდა სააპელაციო სასამართლოს უფლებამოსილებას, მსჯავრდებული პირის მიერ წარდგენილი საჩივრის ფარგლებში, მიეღო რაიმე გადაწყვეტილება, რომელიც უფრო არახელსაყრელი იქნებოდა ამ უკანასკნელისთვის. თუმცა, ქუთაისის სააპელაციო სასამართლომ მომჩივნის ეს არგუმენტი უპასუხოდ დატოვა. ევროპული სასამართლოს შეფასებით, უზენაესმა სასამართლომ, საჩივრის დაუშვებლად ცნობით, ვერ უზრუნველყო სააპელაციო სასამართლოს მსჯელობაში დაშვებული ხარვეზის გამოსწორება.¹²⁵

ბრალდების თვითნებური გადაკვალიფიცირება და მხარეთა შორის თანასწორობის პრინციპის დარღვევა

სააპელაციო სასამართლომ არ გააფრთხილა მომჩივანი დანაშაულის კვალიფიკაციის შეცვლაზე, არც სხდომა გადადო შემდგომი განხილვისთვის და არც ახალი ბრალდების ელემენტები განიხილა.¹²⁶ სასამართლომ ბრალდების ერთი მუხლი უბრალოდ ჩაანაცვლა მეორით და არ იმსჯელა ამ ორ დანაშაულს შორის არსებულ ამკარა განსხვავებებზე.¹²⁷ ევროპული სასამართლოს შეფასებით, დაცვის პოზიცია შეიძლებოდა სხვაგვარად ყოფილიყო ფორმულირებული, თუმცა სააპელაციო სასამართლომ, თავისი ქმედებით, მომჩივანს არ მისცა ამ პოზიციის ჩამოყალიბების შესაძლებლობა ახალ ბრალდებასთან დაკავშირებით. თავის მხრივ, უზენაესმა სასამართლომ, მდუმარე *post factum* დადასტურებით, ვერ უზრუნველყო სააპელაციო სამართალწარმოების დროს დაშვებული ხარვეზების გამოსწორება.¹²⁸ შედეგად, მომჩივნის მიმართ გამოტანილი იყო პროცედურულად და არსებითად უსამართლო გადაწყვეტილება.¹²⁹

(14) მეგრულიშვილი საქართველოს წინააღმდეგ (2020)

საქმის დასახელება/ნომერი	მეგრულიშვილი საქართველოს წინააღმდეგ, 30364/09
საჩივრის წარდგენის თარიღი	18 მაისი, 2009 წელი

¹²² იქვე, პარ. 8.
¹²³ იქვე, პარ. 9.
¹²⁴ იქვე, პარ. 10. ქუთაისის სააპელაციო სასამართლომ მომჩივანი დამნაშავედ ცნო სამსახურებრივი უფლებამოსილების ბოროტად გამოყენებაში და 2 წლით თავისუფლების აღკვეთა შეუფარდა, ხოლო უზენაესმა სასამართლომ მისი საჩივარი დაუშვებლად ცნო (იქვე, პარ. 12, 15).
¹²⁵ იქვე, პარ. 32.
¹²⁶ იქვე, პარ. 37.
¹²⁷ იქვე, პარ. 33.
¹²⁸ იქვე, პარ. 37.
¹²⁹ იქვე, პარ. 34.

გადაწყვეტილების თარიღი	7 მაისი, 2020 წელი
მომჩივანი	მერაბ მეგრელიძე
ადამიანის უფლებათა ევროპული კონვენციის დარღვეული უფლებები	მე-6 მუხლის 1-ლი პუნქტი
სამართლიანი დაკმაყოფილება	ზიანი - 3 000 EUR

ეს საქმე ეხება ოპერატიული ინფორმაციის საფუძველზე ჩატარებული 4 ჩხრეკის შედეგად ნარკოტიკული ნივთიერების ამოღებას, ჩხრეკისას დაშვებულ პროცედურულ დარღვევებს და არაადეკვატურ სასამართლო მოკვლევას, მათ შორის, ეროვნული სასამართლოების მიერ მომჩივნის განცხადების არასაკმარისად გამოკვლევას იმასთან დაკავშირებით, რომ ნარკოტიკები მას არ ეკუთვნოდა.

ოთხივე ჩხრეკა ჩატარდა ე.წ. ოპერატიული ინფორმაციის საფუძველზე, რომლის სასამართლო მოკვლევაც არ ჩატარებულა არც წინასასამართლო სტადიაზე და არც საქმის სასამართლო განხილვის ეტაპზე.¹³⁰ ოთხივე ჩხრეკა ჩატარდა „გადაუდებელ გარემოებებში“, წინასწარი სასამართლო ორდერის გარეშე, თუმცა შესაბამისი გადაწყვეტილებები არ იყო დასაბუთებული, რადგან მათში არ იყო მითითებული ის გადაუდებელი გარემოებები, რომლებმაც, სავარაუდოდ, სასამართლოს განჩინების გარეშე ჩხრეკის ჩატარების საჭიროება განაპირობა.¹³¹ სპეციალური ოპერატიული დეპარტამენტის (სოდ) თანამშრომლებმა უარი უთხრეს მომჩივნასა და მის მეუღლეს ჩხრეკაზე დასასწრებად დამსწრეთა მოწვევის უფლებით სარგებლობაზე. ამის გასამართლებლად მათ მიუთითეს „გადაუდებელ გარემოებებზე“, თუმცა არც პოლიციის შესაბამის ოქმებში და არც შემდგომ, მათ მიერ მიცემულ ჩვენებებში, კონკრეტულ „გადაუდებელ გარემოებებზე“ საუბარი არ ყოფილა.¹³²

ეროვნულ სასამართლოებს არ შეუფასებიათ ჩხრეკასთან დაკავშირებული ხარვეზები და მიიჩნიეს, რომ ჩატარებული ოთხი ჩხრეკის დროს პროცედურული დარღვევები არ გამოვლენილა, შესაბამისად, ჩხრეკის ოქმები დასაშვები მტკიცებულებები იყო. ასევე, ევროპულმა სასამართლომ მიიჩნია, რომ საქმის მასალებში მოცემული არც ერთი სხვა მტკიცებულება, ჩხრეკის ოქმების არარსებობის პირობებში, თავისთავად, არ იყო საკმარისად მყარი.¹³³

ევროპულმა სასამართლომ აღნიშნა, რომ, რადგან სოდ-ის თანამშრომლები მომჩივნის წინააღმდეგ გამოდიოდნენ საქმისწარმოების საწყის ეტაპზე და მიეკუთვნებოდნენ იმ ორგანოს, რომელმაც ეს საქმისწარმოება წამოიწყო, ისინი დაინტერესებულნი იყვნენ ბრალდების შედეგით. მათი ინტერესი განსაკუთრებით აშკარა იყო მომჩივნის განცხადების გათვალისწინებით იმასთან დაკავშირებით, რომ ნარკოტიკები მას სოდი-ის თანამშრომლებმა „ჩაუღეს“. ამის მიუხედავად, ეროვნულმა სასამართლოებმა მათი ჩვენება ავტომატურად ობიექტურად მიიჩნიეს, მომჩივნის ოჯახის წევრების ჩვენებებისგან განსხვავებით, რომლებიც უარყვეს, როგორც სუბიექტური და არასანდო.¹³⁴

(15) მჭედლიძე საქართველოს წინააღმდეგ (2021)

საქმის დასახელება/ნომერი	მჭედლიძე საქართველოს წინააღმდეგ, 894/12
--------------------------	---

¹³⁰ ადამიანის უფლებათა ევროპული სასამართლოს 2020 წლის 7 მაისის გადაწყვეტილება საქმეზე „მეგრელიძე საქართველოს წინააღმდეგ“ (MEGRELISHVILI v. GEORGIA), 30364/09, პარ. 33.

¹³¹ იქვე.

¹³² იქვე.

¹³³ იქვე, პარ. 36.

¹³⁴ იქვე, პარ. 38.

საჩივრის წარდგენის თარიღი	20 დეკემბერი, 2011 წელი
გადაწყვეტილების თარიღი	25 თებერვალი, 2021 წელი
მომჩივანი	ვერა მჭედლიშვილი
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ევროპულ სასამართლოს სახელმწიფოსთვის კომპენსაცია არ დაუკისრებია

ეს საქმე შეეხება აპელაციის ეტაპზე ზეპირი მოსმენის გარეშე საქმის განხილვას. 2011 წლის 14 თებერვალს მომჩივანი პირველი ინსტანციის სასამართლომ დამნაშავედ ცნო დიდი ოდენობით ფარმაცევტული საშუალებების, საბაჟო წესების დარღვევით, უკანონო შემოტანის 2 ფაქტზე.¹³⁵ 2011 წლის 31 მარტს ქუთაისის სააპელაციო სასამართლომ ზეპირი მოსმენის გარეშე ძალაში დატოვა პირველი ინსტანციის სასამართლოს გადაწყვეტილება.¹³⁶ ევროპულმა სასამართლომ მხედველობაში მიიღო, რომ მომჩივნისთვის ორივე ეპიზოდში მსჯავრის დადების შემთხვევაში, სასჯელის საერთო ხანგრძლივობა გადააჭარბებდა 5 წელს, რაც ზეპირი მოსმენის გარეშე განხილვისთვის ეროვნული კანონმდებლობით დადგენილი ლიმიტი იყო.¹³⁷ ამასთანავე, ვინაიდან მომჩივანი დაკობდა, რომ მეორე ბრალდებული მის ბრალეულობაზე მიუთითებდა სისხლისსამართლებრივი პასუხისმგებლობის თავიდან არიდების მიზნით, საქმეში წამოიჭრა მომჩივნისა და მეორე ბრალდებულის სანდოობის საკითხი.¹³⁸ შესაბამისად, **რადგანაც სააპელაციო სასამართლოს უნდა გადაეწყვიტა ისეთი ასპექტები, როგორებიცაა მომჩივნისა და საქმეზე მეორე ბრალდებულის ინდივიდუალური მახასიათებლები და პიროვნულობა, მომჩივანი უშუალოდ უნდა დაეკითხათ.**¹³⁹ ამასთანავე, სააპელაციო სასამართლოს უარი ზეპირ მოსმენაზე არ იყო დასაბუთებული.¹⁴⁰

(16) შრადე საქართველოს წინააღმდეგ (2021)

საქმის დასახელება/ნომერი	შრადე საქართველოს წინააღმდეგ, 15016/07
საჩივრის წარდგენის თარიღი	26 მარტი, 2007 წელი
გადაწყვეტილების თარიღი	11 მარტი, 2021 წელი
მომჩივანი	როლფ შრადე
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი, მე-13 მუხლი
სამართლიანი დაკმაყოფილება	ზიანი - 600 EUR

¹³⁵ ადამიანის უფლებათა ევროპული სასამართლოს 2021 წლის 25 თებერვლის გადაწყვეტილება საქმეზე „მჭედლიშვილი საქართველოს წინააღმდეგ“ (CASE OF MTCHEDLISHVILI v. GEORGIA), 894/12, პარ. 14.

¹³⁶ იქვე, პარ. 19.

¹³⁷ იქვე, პარ. 38. იგულისხმება, რომ სააპელაციო საჩივრის განმხილველი სასამართლო უფლებამოსილია, ზეპირი მოსმენის გარეშე განიხილოს მხარის საჩივარი ნაკლებად მძიმე კატეგორიის დანაშაულთა საქმეებზე (იგივე წესია გათვალისწინებული სისხლის სამართლის საპროცესო კოდექსის მოქმედი რედაქციის 295-ე მუხლის მე-7 ნაწილით). ნაკლებად მძიმეა განზრახ ან გაუფრთხილებლობით ჩადენილი დანაშაული, რომლისთვისაც გათვალისწინებული მაქსიმალური სასჯელი არ აღემატება ხუთი წლით თავისუფლების აღკვეთას (სსკ-ის მუხლი 12, ნაწილი 2). სსკ-ის იმ დროისთვის მოქმედი რედაქციით (მუხლი 59), დანაშაულთა ერთობლიობის დროს სასჯელი ინიშნებოდა თითოეული დანაშაულისთვის და საბოლოო სასჯელის დანიშვნისას ხდებოდა მათი შეკრება.

¹³⁸ იქვე.

¹³⁹ იქვე.

¹⁴⁰ იქვე, პარ. 39.

ეს საქმე ეხება გაჭიანურებულ სამოქალაქო მართლმსაჯულებას. ინტელექტუალური საკუთრების შესახებ დავა სასამართლოს 3 ინსტანციაში 6 წელზე მეტ ხანს გაგრძელდა.¹⁴¹ ევროპული სასამართლოს შეფასებით, საქმის წარმოება შეაფერხა პირველი ინსტანციის სასამართლოს 2-წლიანმა უმოქმედობამ.¹⁴² ამ პერიოდში მოხდა სასამართლო სისტემის სტრუქტურული რეფორმა და ეს საქმე თბილისის საოლქო სასამართლოდან გადაეცა ახლად შექმნილ თბილისის საქალაქო სასამართლოს. თუმცა, ევროპული სასამართლოს შეფასებით, სასამართლოს რეფორმა არ არის საქმის გონივრულ ვადაში განუხილველობის საპატიო მიზეზი.¹⁴³

(17) ტლაშაძე და კაკაშვილი საქართველოს წინააღმდეგ (2021)

საქმის დასახელება/ნომერი	ტლაშაძე და კაკაშვილი საქართველოს წინააღმდეგ, 41674/10
საჩივრის წარდგენის თარიღი	29 ივნისი, 2010 წელი
გადაწყვეტილების თარიღი	25 მარტი, 2021 წელი
მომჩივნები	თამაზ ტლაშაძე რომან კაკაშვილი
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ზიანი - 3 600 EUR (თითოეულს)

ეს საქმე ეხება 2009 წელს სასამართლოს მიერ წინასწარი ნებართვის გაცემის გარეშე ჩატარებული ჩხრეკის სავარაუდო არაკანონიერებას, ამის შედეგად მოპოვებული მტკიცებულებების არასანდოობას და, ამის საფუძველზე, ეროვნული სასამართლოების მიერ მომჩივნების მსჯავრდებას.¹⁴⁴ ორივე მომჩივანი აცხადებდა, რომ პოლიციელების მხრიდან ჩხრეკისას ხდებოდა გარკვეული საგნების ჩადება.¹⁴⁵ ჩხრეკის ოქმების დაუშვებლობის მიზნით, მათ შუამდგომლობით მიმართეს ეროვნულ სასამართლოებს, თუმცა - უშედეგოდ. რომან კაკაშვილის შუამდგომლობა მიიჩნიეს დაუსაბუთებლად, ხოლო თამაზ ტლაშაძეს მიუთითეს, რომ ჩხრეკების კანონიერება, ნებისმიერ შემთხვევაში, უკვე დამტკიცებული იყო. სააპელაციო სამართალწარმოებისას დაკავებისა და ჩხრეკის ოქმების დაუშვებლობის შესახებ ხელმეორედ წარდგენილ შუამდგომლობაზე მომჩივნებმა უარი მიიღეს იმ პოლიციელების ვერსიაზე დაყრდნობით, რომლებმაც ეს ჩხრეკა განახორციელეს.¹⁴⁶

ევროპული სასამართლო ხაზს უსვამს, რომ ოპერატიული ინფორმაციის არსებობის შესახებ მოხსენებები იყო ზედაპირული და შეიცავდა ირიბ მონაცემებს, ხოლო ეროვნულმა სასამართლოებმა არც კი სცადეს მისი შეფასება. გარდა ამისა, ეროვნულმა სასამართლოებმა პასუხი არ გასცეს მომჩივანთა ბრალდებებს მტკიცებულებების ჩადების შესახებ.¹⁴⁷ რაც შეეხება პოლიციელების ჩვენებებს, ევროპული სასამართლო აღნიშნავს, რომ, ვინაიდან მათ დაიწყეს მომჩივნების წინააღმდეგ საქმის წარმოება, ისინი დაინტერესებულნი იყვნენ ბრალდების შედეგით. განსაკუთრე-

¹⁴¹ ადამიანის უფლებათა ევროპული სასამართლოს 2021 წლის 11 მარტის გადაწყვეტილება საქმეზე *SCHRADE v. GEORGIA*, 41957/04, პარ. 47. აღსანიშნავია, რომ დავა დაიწყო 2005 წლის იანვარში და დასრულდა 2021 წლის თებერვალში (იქვე).

¹⁴² იქვე, 48.

¹⁴³ იქვე, 52.

¹⁴⁴ ადამიანის უფლებათა ევროპული სასამართლოს 2021 წლის 25 მარტის გადაწყვეტილება საქმეზე „ტლაშაძე და კაკაშვილი საქართველოს წინააღმდეგ“ (*CASE OF TLASHADZE AND KAKASHVILI v. GEORGIA*), 41674/10, პარ. 45.

¹⁴⁵ იქვე, პარ. 23, 32.

¹⁴⁶ იქვე, პარ. 49.

¹⁴⁷ იქვე, პარ. 50.

ბით, მათი ინტერესი აშკარა იყო მომჩივნების ბრალდებების გათვალისწინებით იმასთან დაკავშირებით, რომ მათ მტკიცებულება ჩაუდეს. ყოველგვარი არსებითი მცდელობის გარეშე, რომ გაეფანტათ ბუნდოვანებები პოლიციელების ვერსიაში და მომჩივნების შესაბამისი არგუმენტები განეხილათ, ეროვნულმა სასამართლოებმა პოლიციელთა ჩვენებები მიიჩნიეს სანდოდ და ობიექტურად.¹⁴⁸

(18) კალანდია საქართველოს წინააღმდეგ (2021)

საქმის დასახელება/ნომერი	კალანდია საქართველოს წინააღმდეგ, 57255/10
საჩივრების წარდგენის თარიღი	27 სექტემბერი, 2010 წელი
გადაწყვეტილების თარიღი	22 აპრილი, 2021 წელი
მომჩივანი	კონსტანტინე კალანდია
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ზიანი - 3 600 EUR

ეს საქმე ეხება 2009 წელს სასამართლოს მიერ წინასწარი ნებართვის გაცემის გარეშე ჩატარებული ჩხრეკის სავარაუდო არაკანონიერებას, ამის შედეგად მოპოვებული მტკიცებულებების არასანდოობას, მომჩივნის დაკავებას და ეროვნული სასამართლოების მიერ, ამ მტკიცებულებების საფუძველზე, მის მსჯავრდებას.¹⁴⁹ შესაბამის ოქმში არ იყო მითითებული დაკავების, ჩხრეკის გარემოებები და საფუძვლები, ასევე, არ იყო აღნიშნული მომჩივნის სავარაუდო უარი მოწმეთა მოწვევასთან დაკავშირებით. გარდა ამისა, მისი დაკავების თაობაზე პოლიციელთა ჩვენებები იყო ურთიერთსაწინააღმდეგო, მაგალითად, მომჩივანი ნებაყოფლობით გადმოვიდა მანქანიდან, თუ პოლიციელებმა ამისთვის ძალა გამოიყენეს.¹⁵⁰

ევროპული სასამართლოს შეფასებით, ჩხრეკის ჩატარების გარემოებებმა, მათ შორის, მომჩივნის მხრიდან მისი დაცვის უფლებების სავარაუდო უგულებელყოფამ ეჭვქვეშ დააყენა მომჩივნის წინააღმდეგ არსებული გადამწყვეტი მტკიცებულების სანდოობა, ამასთანავე, ამ უკანასკნელის არგუმენტებს ეროვნული სასამართლოს მხრიდან არ გაეცა ადეკვატური პასუხი.¹⁵¹ რაც შეეხება შესაბამისი პოლიციელების ჩვენებებს, ვინაიდან მათი ქმედებები იყო მომჩივნის წინააღმდეგ სამართალწარმოების საფუძველი, ისინი დაინტერესებულნი იყვნენ სამართლებრივი დევნის შედეგებით. განსაკუთრებით, აშკარა იყო მათი ინტერესი მომჩივნის ბრალდების გათვალისწინებით იმასთან დაკავშირებით, რომ მომჩივანს ნარკოტიკი ჩაუდეს. ყოველგვარი არსებითი მცდელობის გარეშე, მხედველობაში მიედოთ პოლიციელთა ვერსიაში არსებული წინააღმდეგობები, ეროვნულმა სასამართლოებმა პოლიციელების ჩვენებები მიიჩნიეს სანდოდ და ობიექტურად.¹⁵²

(19) შუბითიძე საქართველოს წინააღმდეგ (2021)

საქმის დასახელება/ნომერი	შუბითიძე საქართველოს წინააღმდეგ, 43854/12
საჩივრის წარდგენის თარიღი	9 ივლისი, 2012 წელი

¹⁴⁸ იქვე, პარ. 52.

¹⁴⁹ ადამიანის უფლებათა ევროპული სასამართლოს 2021 წლის 22 აპრილის გადაწყვეტილება საქმეზე „კალანდია საქართველოს წინააღმდეგ“ (CASE OF KALANDIA v. GEORGIA), 57255/10, პარ. 45.

¹⁵⁰ იქვე, პარ. 40.

¹⁵¹ იქვე, პარ. 42.

¹⁵² იქვე, პარ. 43.

გადაწყვეტილების თარიღი	17 ივნისი, 2021 წელი
მომჩივანი	კაკო შუბითიძე
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ზიანი - 3 600 EUR

ეს საქმე ეხება ნარკოტიკული ნივთიერების ამოღებას ჩხრეკის შედეგად, რომლის საეჭვო გარემოებებიც ეროვნულმა სასამართლომ ჯეროვნად არ შეაფასა.

მომჩივნის დაკავება და ჩხრეკა განხორციელდა სასამართლო განჩინების და მოწმის გარეშე.¹⁵³ პირადი ჩხრეკის ფაქტობრივი გარემოებები სადავო იყო მთელი საქმისწარმოების განმავლობაში.¹⁵⁴ მიუხედავად ამისა, ეროვნულმა სასამართლოებმა დაკავების და ჩხრეკის კანონიერება დადგინდეს ფაქტებად მიიჩნიეს.¹⁵⁵

ეროვნულმა სასამართლოებმა საერთოდ არ განიხილეს მომჩივნის არგუმენტების მნიშვნელოვანი ასპექტები, როგორებიცაა: მისი დაპატიმრებისა და ჩხრეკის კანონიერება, პირადი ჩხრეკის გარემოებები, ჩხრეკის ოქმის სადავო დასაშვებობა, განცხადება იმის შესახებ, რომ ნარკოტიკები მას არ ეკუთვნოდა. ამასთანავე, სადავო ოქმის გარდა, არანაირი სხვა მტკიცებულება არ ყოფილა წარმოდგენილი, რაც არ იყო საკმარისი იმისთვის, რომ მომჩივანი დამნაშავედ ეცნოთ ნარკოტიკული ნივთიერების უკანონო შეძენისა და შენახვისთვის.¹⁵⁶ პირადი ჩხრეკის ჩატარების გარემოებები ბადაბა ეჭვებს ამ ჩხრეკის შედეგად მოპოვებული მტკიცებულების სანდოობასთან დაკავშირებით. ხოლო მომჩივანს არ მიეცა ჯეროვანი შესაძლებლობა, გაესაჩივრებინა ისინი და შესწინააღმდეგებოდა სადავო მტკიცებულების გამოყენებას.¹⁵⁷

(20) კიკაბიძე საქართველოს წინააღმდეგ (2021)

საქმის დასახელება/ნომერი	კიკაბიძე საქართველოს წინააღმდეგ, 57642/12
საჩივრის წარდგენის თარიღი	29 აგვისტო, 2012 წელი
გადაწყვეტილების თარიღი	16 ნოემბერი, 2021 წელი
მომჩივანი	ლევან კიკაბიძე
ადამიანის უფლებათა ევროპული კონვენციის დარღვეული უფლებები	მე-6 მუხლის 1-ლი და მე-3 პუნქტები
სამართლიანი დაკმაყოფილება	ზიანი - 5 000 EUR ხარჯები და დანახარჯები - 200 EUR

ეს საქმე ეხება, სისხლის სამართლის საქმის მტკიცებულებებზე დაგვიანებული წვდომის გამო, მომჩივნის დაცვის უფლების შეზღუდვას და მის მიერ არჩეული ადვოკატის ყოლის უფლების დარღვევას, ასევე, გადაწყვეტილების დაუსაბუთებლობას.¹⁵⁸ 2011 წლის 11 ოქტომბერს, მომჩივნისათვის ბრალის წარდგენის ეტაპზე, ის

¹⁵³ ადამიანის უფლებათა ევროპული სასამართლოს 2021 წლის 17 ივნისის გადაწყვეტილება საქმეზე „შუბითიძე საქართველოს წინააღმდეგ“ (SHUBITIDZE v. GEORGIA), 43854/12, პარ. 8-9.

¹⁵⁴ იქვე, პარ. 34.

¹⁵⁵ იქვე, პარ. 35.

¹⁵⁶ იქვე, პარ. 36.

¹⁵⁷ იქვე, პარ. 37.

¹⁵⁸ ადამიანის უფლებათა ევროპული სასამართლოს 2021 წლის 16 ნოემბრის გადაწყვეტილება საქმეზე „კიკაბიძე საქართველოს წინააღმდეგ“ (CASE OF KIKABIDZE v. GEORGIA), 57642/12, პარ. 12.

სარგებლობდა უფასო იურიდიული დახმარების ადვოკატის მომსახურებით.¹⁵⁹ ამ უკანასკნელს გადაეცა მომჩივნის წინააღმდეგ შეგროვებული მტკიცებულებების სია და შესაბამისი მტკიცებულებების ასლები.¹⁶⁰ მომჩივანმა რამდენჯერმე მიმართა პროკურატურას, გადაეცათ საქმის მასალები მისი კერძო ადვოკატისთვის.¹⁶¹

ეროვნულ სასამართლოსთან მიმართებით ადამიანის უფლებათა ევროპულმა სასამართლომ დაადგინა შემდეგი დარღვევები:

საქმის მასალების გასაცნობად არასაკმარისი დრო და საშუალებები

ევროპული სასამართლო აღნიშნავს, რომ 5-დღიანი ვადა¹⁶² საკმაოდ მცირეა იმის გათვალისწინებით, რომ დაცვის მხარე შეზღუდულია, ან მას ამ ვადის მიღმა სრულად ეკრძალება რაიმე მტკიცებულების წარდგენა. ამიტომაც, სასამართლო სხდომის თავმჯდომარე უნდა დარწმუნებულიყო, რომ ბრალდების მხარემ იმოქმედა ოპერატიულად და გულმოდგინედ დაცვის მხარის მოთხოვნისამებრ საქმის მასალებზე წვდომის უზრუნველყოფისას.¹⁶³ მართალია, სასამართლო სხდომამდე 1 თვით ადრე მომჩივნის იურიდიული დახმარების უფასო ადვოკატს მიეცა დაშვება საქმის მასალებზე, თუმცა მას აღარ წარმოუდგენია მომჩივანი წინასასამართლო სხდომის შემდეგ, უფასო იურიდიული დახმარებისა და კერძო ადვოკატებს შორის თანამშრომლობის აშკარა ნაკლებობა ვერ ათავისუფლებს სახელმწიფოს და მის წარმომადგენლებს შესაბამისი პასუხისმგებლობისგან. ამგვარად, **თავმჯდომარეს უნდა უზრუნველყო, რომ იმ სირთულეებს, რომლებიც, საჯარაუდოდ, წარმოეშვა დაცვის მხარეს ნაფიც მსაჯულთა სასამართლოსთვის მომზადებისას, გავლენა არ მოეხდინა მომჩივნის უფლებების დაცვაზე.**¹⁶⁴

გადაწყვეტილების დაუსაბუთებლობა

ევროპული სასამართლოს შეფასებით, მომჩივნის არგუმენტები იმსახურებდა საფუძვლიან და დეტალურ პასუხს თბილისის სააპელაციო სასამართლოს გადაწყვეტილების დასაბუთებისას. ამ ასპექტის უგულებელყოფით კი ეროვნულმა სასამართლომ დაარღვია დასაბუთებული გადაწყვეტილების წარმოდგენის ვალდებულება.¹⁶⁵

(21) გლოველი საქართველოს წინააღმდეგ (2022)

საქმის დასახელება/ნომერი	გლოველი საქართველოს წინააღმდეგ, 18952/18
საჩივრის წარდგენის თარიღი	3 აპრილი, 2018 წელი
გადაწყვეტილების თარიღი	7 აპრილი, 2022 წელი
მომჩივანი	მარინა გლოველი
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ზიანი - 3600 EUR

¹⁵⁹ იქვე, პარ. 7.

¹⁶⁰ იქვე, პარ. 8.

¹⁶¹ იქვე, პარ. 9-10.

¹⁶² „წინასასამართლო სხდომის გამართვამდე არაუგვიანეს 5 დღისა მხარეებმა ერთმანეთს და სასამართლოს უნდა მიაწოდონ იმ მომენტისთვის მათ ხელთ არსებული სრული ინფორმაცია, რომლის მტკიცებულებად სასამართლოში წარდგენასაც აპირებენ“ (საქართველოს სისხლის სამართლის საპროცესო კოდექსის 83-ე მუხლის მე-6 ნაწილი).

¹⁶³ ადამიანის უფლებათა ევროპული სასამართლოს 2021 წლის 16 ნოემბრის გადაწყვეტილება საქმეზე „კიკაბიძე საქართველოს წინააღმდეგ“ (CASE OF KIKABIDZE v. GEORGIA), 57642/12, პარ. 49.

¹⁶⁴ იქვე.

¹⁶⁵ იქვე, პარ. 65.

ეს საქმე ეხება მოსამართლის თანამდებობაზე მომჩივნის კანდიდატურის უარყოფის შესახებ მისი საჩივრის არსებითად განუხილველობას საკვალიფიკაციო პალატის მიერ,¹⁶⁶ რითაც მომჩივნის მიმართ დაირღვა სასამართლოზე ხელმისაწვდომობის უფლება. მომჩივანი პრაქტიკოსი ადვოკატია, 20 წელზე მეტხნიანი გამოცდილებით, ხოლო 1999-2005 წლებში იყო თბილისის სააპელაციო სასამართლოს მოსამართლე. ამის შემდეგ, მოსამართლის თანამდებობის დასაკავებლად, მან 6-ჯერ მიიღო კონკურსში მონაწილეობა (ბოლოს - 2017 წლის ოქტომბერში), თუმცა ყველა მისი მცდელობა წარუმატებელი აღმოჩნდა.¹⁶⁷ ეროვნულ დონეზე მომჩივნის საჩივართან დაკავშირებით საკვალიფიკაციო პალატამ განმარტა, რომ იუსტიციის უმაღლეს საბჭოს არ გააჩნდა იურისდიქცია, განეხილა დავები მოსამართლეთა დანიშვნის თაობაზე, თუ საკონკურსო პროცედურა არ მიაღწევდა იუსტიციის უმაღლესი საბჭოს წევრების მიერ კენჭისყრის სტადიას. ევროპულმა სასამართლომ ხაზი გაუსვა, რომ მომჩივანი, განაცხადის ფორმის საფუძველზე, წინასწარ შეირჩა კონკურსში მონაწილეობისთვის, გაიარა წარსულის შემოწმება, გამოიკითხა იუსტიციის უმაღლესი საბჭოს წევრების მიერ და შეფასდა კომპეტენციისა და კეთილსინდისიერების კრიტერიუმებით. ყველა ზემოაღნიშნული ეტაპი ჩაატარა იუსტიციის უმაღლესმა საბჭომ. მეტიც, სწორედ ეს უკანასკნელი იყო ის ორგანო, რომელიც კენჭისყრაშიც მიიღებდა მონაწილეობას. ამგვარად, ევროპული სასამართლოს შეფასებით, სასამართლო განხილვიდან კონკურსის ზემოაღნიშნული სტადიების ერთიანად გამორიცხვით საკვალიფიკაციო პალატამ საკუთარ თავს ჩამოართვა იუსტიციის უმაღლესი საბჭოს გადაწყვეტილების წინააღმდეგ მომჩივნის საჩივრის განხილვის იურისდიქცია, რითაც დაარღვია მომჩივნის სასამართლოზე წვდომის უფლების ძირითადი პრინციპი.¹⁶⁸

(22) რუსიშვილი საქართველოს წინააღმდეგ (2022)

საქმის დასახელება/ნომერი	რუსიშვილი საქართველოს წინააღმდეგ, 15269/13
საჩივრის წარდგენის თარიღი	15 თებერვალი, 2013 წელი
გადაწყვეტილების თარიღი	30 ივნისი, 2022 წელი
მომჩივანი	დავით რუსიშვილი
ადამიანის უფლებათა ევროპული კონვენციის დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ევროპულ სასამართლოს სახელმწიფოსთვის კომპენსაცია არ დაუკისრებია

ეს საქმე შეეხება დაკავების საწყის საათებში ადვოკატზე ხელმისაწვდომობის შეზღუდვის გავლენას სამართლიანი სასამართლოს უფლებაზე, დაცვის მხარის მოწმეთა დაკითხვის შუამდგომლობის დაუკმაყოფილებლობას, ნაფიც მსაჯულთა ვერდიქტისა და საჩივრის დაუშვებლად ცნობის შესახებ სააპელაციო სასამართლოს განჩინების დაუსაბუთებლობას. 2012 წლის 14 ივნისის ვერდიქტით ნაფიც მსაჯულთა სასამართლომ მომჩივანი დამნაშავედ ცნო დამამძიმებელ გარემოებებში ჩადენილ მკვლელობასა და ცეცხლსასროლი იარაღის უკანონო ტარებაში.¹⁶⁹ ევროპუ-

¹⁶⁶ ადამიანის უფლებათა ევროპული სასამართლოს 2022 წლის 7 აპრილის გადაწყვეტილება საქმეზე „გლოველი საქართველოს წინააღმდეგ“ (CASE OF GLOVELI v. GEORGIA), 18952/18, პარ. 58.

¹⁶⁷ იქვე, პარ. 5.

¹⁶⁸ იქვე, პარ. 59.

¹⁶⁹ ადამიანის უფლებათა ევროპული სასამართლოს 2022 წლის 30 ივნისის გადაწყვეტილება საქმეზე „რუსიშვილი საქართველოს წინააღმდეგ“ (CASE OF RUSISHVILI v. GEORGIA), 15269/13, პარ. 22-26.

ლმა სასამართლომ დარღვევა დაადგინა სააპელაციო სასამართლოს განჩინების დაუსაბუთებლობის ნაწილში.

მომჩივანმა ნაფიც მსაჯულთა სასამართლოს განაჩენი გაასაჩივრა და, კონკრეტულ ფაქტებზე დაყრდნობით, უთითებდა მხარეთა შეჯიბრებითობის პრინციპის დარღვევაზე.¹⁷⁰ მომჩივნის მიერ სააპელაციო სასამართლოს წინაშე წარდგენილი საკითხები, ევროპული სასამართლოს შეფასებით, სამართლებრივად მნიშვნელოვანი და რელევანტური იყო.¹⁷¹ ეს ასპექტები (დაკავების პირველ საათებში მომჩივნისთვის ადვოკატის უფლების სავარაუდო შეზღუდვა და მისი გავლენა პროცესის საერთო სამართლიანობაზე) შეფასებული არ ყოფილა არც წინასასამართლო სხდომის მოსამართლის და არც ნაფიც მსაჯულთა სასამართლოს მოსამართლის მიერ.¹⁷² სააპელაციო სასამართლოს ვალდებულება იყო ამ საკითხის ვალიდურობის შემოწმება, და, ზოგადად, ნაფიც მსაჯულთა სასამართლოს სამართლიანობისთვის რელევანტური გარანტიების გამოყენების შეფასება.¹⁷³ შესაძლოა, სააპელაციო სასამართლომ ეს გარემოებები შეაფასა, თუმცა მის გადაწყვეტილებაში მოცემული არ იყო, რატომ მიიჩნია მომჩივნის საჩივარი დაუსაბუთებლად და დაუშვებლად.¹⁷⁴ ევროპული სასამართლოს შეფასებით, ეს განსაკუთრებით პრობლემურია იმის გათვალისწინებით, რომ ეს იყო სამართლებრივი რეფორმის შემდგომ ჩატარებული ერთ-ერთი პირველი ნაფიც მსაჯულთა სასამართლო პროცესი.¹⁷⁵

(23) მამალაძე საქართველოს წინააღმდეგ (2022)

საქმის დასახელება/ნომერი	მამალაძე საქართველოს წინააღმდეგ, 9487/19
საჩივრის წარდგენის თარიღი	31 იანვარი, 2019 წელი
გადაწყვეტილების თარიღი	3 ნოემბერი, 2022 წელი
მომჩივანი	გიორგი მამალაძე
ადამიანის უფლებათა ევროპული კონვენციის დარღვეული უფლებები	მე-6 მუხლის 1-ლი და მე-2 პუნქტები
სამართლიანი დაკმაყოფილება	ხარჯები და დანახარჯები - 9 418 GEL ¹⁷⁶

ეს საქმე ეხება სასამართლო სხდომის დახურვასა და უდანაშაულობის პრეზუმფციის დარღვევას. კერძოდ, 2017 წლის 10 თებერვალს დააკავეს მომჩივანი, ლეკანოზი გიორგი მამალაძე, რომელიც ეროვნულმა სასამართლოებმა დამნაშავედ ცნეს მკვლელობის მომზადებისთვის, ცეცხლსასროლი იარაღისა და საბრძოლო მასალის უკანონო შეძენა- შენახვისთვის.¹⁷⁷

ეროვნულ სასამართლოსთან მიმართებით ადამიანის უფლებათა ევროპულმა სასამართლომ დაადგინა შემდეგი დარღვევები:

საჯაროობის პრინციპის დარღვევა

ევროპული სასამართლოს შეფასებით, გარემოება, რომელსაც დაეფუძნა ეროვნული სასამართლოების გადაწყვეტილება სასამართლო სხდომის დახურვის შე-

¹⁷⁰ იქვე, პარ. 78.
¹⁷¹ იქვე.
¹⁷² იქვე, პარ. 79.
¹⁷³ იქვე.
¹⁷⁴ იქვე.
¹⁷⁵ იქვე.

¹⁷⁶ ამ საქმეში მომჩივანმა ხარჯებისა და დანახარჯების გადახდა მოითხოვა ლარში, შესაბამისად, სასამართლომ გადაწყვეტილებაში ეს ვალუტა მიუთითა.

¹⁷⁷ ადამიანის უფლებათა ევროპული სასამართლოს 2022 წლის 3 ნოემბრის გადაწყვეტილება საქმეზე „მამალაძე საქართველოს წინააღმდეგ“ (CASE OF MAMALADZE v. GEORGIA), 9487/19, პარ. 11.

სახებ, არ იყო გათვალისწინებული ეროვნულ კანონმდებლობით. ვინაიდან მომჩივნის საქმესთან მიმართებით იყო მომეტებული საზოგადოებრივი ინტერესი, ეროვნულ სასამართლოს მკაფიოდ უნდა დაესაბუთებინა და ემსჯელა, რატომ იყო მიზანშეუწონელი სასამართლო სხდომის ნაწილობრივ დახურვა სრულად დახურვასთან შედარებით, რაც პირველი და მეორე ინსტანციის სასამართლოებს არ გაუკეთებიათ, ხოლო საკასაციო სასამართლომ გადაწყვეტილება წერილობითი სამართალწარმოების გზით მიიღო.¹⁷⁸

ადამიანის უფლებათა ევროპულმა სასამართლომ არ გაიზიარა ეროვნული სასამართლოების დასაბუთება, რომლის მიხედვითაც, „საზოგადოებაში დამკვიდრებული რელიგიური და მორალური პრინციპები“ უპირატესია, ვიდრე კონვენციითა და საქართველოს კონსტიტუციით გათვალისწინებული უფლებების დაცვა.¹⁷⁹

უდანაშაულობის პრეზუმფციის დარღვევა

სასამართლო სხდომის დახურვისა და გაუთქმელობის ვალდებულების გამო, მომჩივანი მოკლებული იყო შესაძლებლობას, გაეკეთებინა საჯარო კომენტარი მის წინააღმდეგ წარმოებულ საქმესთან დაკავშირებით.¹⁸⁰ იმავდროულად, ჯერ კიდევ პირველი ინსტანციის სასამართლოს მიერ პირის დამნაშავედ ცნობის შესახებ გადაწყვეტილების გამოტანამდე, მთავარი მოწმე, ასევე, პროკურატურისა¹⁸¹ და ხელისუფლების წარმომადგენლები,¹⁸² აკეთებდნენ საჯარო განცხადებებს, რომლის მიხედვითაც, მომჩივანი იყო დამნაშავე.¹⁸³ ამ გარემოებათა კუმულაციური შეფასებით, ევროპულმა სასამართლომ დაადგინა უდანაშაულობის პრეზუმფციის დარღვევა.¹⁸⁴

(24) ხავშაბოვა საქართველოს წინააღმდეგ (2023)

საქმის დასახელება/ნომერი	ხავშაბოვა საქართველოს წინააღმდეგ, 26134/19
საჩივრის წარდგენის თარიღი	6 მაისი, 2019 წელი
გადაწყვეტილების თარიღი	29 ივნისი, 2023 წელი
მომჩივანი	ანჟელა ხავშაბოვა
ადამიანის უფლებათა ევროპული კონვენციის დარღვეული უფლებები	მე-6 მუხლის 1-ლი და მე-3 პუნქტები
სამართლიანი დაკმაყოფილება	ზიანი - 1 200 EUR

¹⁷⁸ იქვე, პარ. 98-101.

¹⁷⁹ იქვე, პარ. 97.

¹⁸⁰ იქვე, პარ. 99.

¹⁸¹ იქვე.

¹⁸² დეკანოზ გიორგი მამალაძის საქმესთან დაკავშირებით საჯარო განცხადება გააკეთა ხელისუფლების არაერთმა წარმომადგენელმა, მათ შორის, საქართველოს პრეზიდენტმა, საქართველოს იუსტიციის მინისტრმა, პრემიერ-მინისტრმა და ვიცე-პრემიერმა. ევროპულმა სასამართლომ შეაფასა ეს განცხადებები და დაადგინა, რომ ვიცე-პრემიერის განცხადება იყო მკაფიო და არღვევდა უდანაშაულობის პრეზუმფციას (იხ. იქვე, პარ. 111).

¹⁸³ „ყველაზე მძიმე დანაშაული აღკვეთილია. მე მჯერა, რომ ეს იყო კარგად გააზრებული გეგმა, რომელიც ჩაფიქრებული იყო [სრულად] განსახორციელებლად. ეს არ იქნებოდა თავდასხმა მხოლოდ ეკლესიაზე, მართლმადიდებელ მრევლზე, ეს იქნებოდა თავდასხმა მთელ საქართველოზე, ჩვენს ინსტიტუტებზე, შესაბამის სამსახურებზე, ქვეყნის მშვიდობასა და სიმშვიდეზე. თუმცა, მათი ეს გეგმა ჩაიშალა. მინდა მადლობა გადაუხადო შესაბამის სამსახურებს, [მაგრამ] დაველოდოთ გამოძიებას და სხვა დეტალებს, [რომლებიც] უახლოეს მომავალში გახდება ცნობილი. თუმცა, არის ერთი რამ, რისი თქმაც მინდა, რომ ყველა დამნაშავედ გამოვლენილი, კანონის უმკაცრესი პირობებით დაისჯება. გამოძიება გრძელდება და ყველაფერი გვეცოდინება, მაგრამ ამკარაა, რომ დაკავებისას კონკრეტული პიროვნება, მამალაძე, გერმანიაში სპეციფიკური მხამით მიემგზავრებოდა“ (იხ. იქვე, პარ. 18).

¹⁸⁴ იქვე, პარ. 111.

¹⁸⁴ იქვე, პარ. 115.

ეს საქმე ეხება მომჩივნის დამნაშავედ ცნობას მოწმეთა ჩვენებების საფუძველზე, რომელთა სასამართლოში შემოწმების უფლება მომჩივანს არ მიეცა.¹⁸⁵ ბრალდების ორი მთავარი მოწმე დაიკითხა ბრალდების მხარის მიერ წინასასამართლო სხდომის ეტაპზე, მაგისტრატი მოსამართლის წინაშე, მომჩივნის ცნობის გარეშე, იურიდიული დახმარების ფარგლებში დანიშნული ადვოკატის მონაწილეობით.¹⁸⁶ პირველი და მეორე ინსტანციის სასამართლოებმა გამოიტანეს მომჩივნის მიმართ გამამართლებელი განაჩენი და დაადგინეს, რომ არ შეეძლოთ თავიანთი გადაწყვეტილებების მხოლოდ იმ მოწმეთა ჩვენებებზე დაფუძნება, რომლებიც სასამართლოში არ დაუკითხავთ.¹⁸⁷ ხოლო უზენაესმა სასამართლომ გააუქმა გამამართლებელი განაჩენი და დაადგინა, რომ დაკითხვის შედეგად მიღებული ჩვენებები, სხვა ირიბ მტკიცებულებებთან ერთად, საკმარისი იყო მომჩივნის ბრალულობის დასამტკიცებლად.¹⁸⁸

ეროვნულ სასამართლოსთან მიმართებით ადამიანის უფლებათა ევროპულმა სასამართლომ დაადგინა შემდეგი დარღვევები:

მომჩივნის შეუტყობინებლობა იურიდიული დახმარების ადვოკატის დანიშვნის შესახებ

საქმის მასალები არ შეიცავს არც ერთ პროცედურულ დოკუმენტს, რომლითაც დასტურდება, რომ მომჩივანს ეცნობა მის საქმეზე იურიდიული დახმარების სამსახურის მიერ ადვოკატის დანიშვნის შესახებ.¹⁸⁹ მიუხედავად იმისა, რომ მომჩივანს შემდგომში სათანადოდ წარმოადგენდა მის მიერ არჩეული ადვოკატი, სასამართლო მიიჩნევს, რომ იურიდიული დახმარების ბიუროს ადვოკატის დანიშვნის წესმა და მისმა მონაწილეობამ მოწმეთა დაკითხვის პროცესში მომჩივნის ინფორმირების გარეშე მნიშვნელოვანი გავლენა იქონია ამ უკანასკნელის დაცვის უფლებებზე.¹⁹⁰

მოწმის დაუსწრებლობის არასაპატიო მიზეზი

ეროვნული სასამართლოებისთვის მოწმეთა გამოუცხადებლობის ერთადერთი საპატიო მიზეზი იყო აზერბაიჯანში ყოფნა.¹⁹¹ ევროპული სასამართლოს შეფასებით კი საზღვარგარეთ გამგზავრება არ არის საკმარისი მიზეზი სასამართლოს სხდომაზე გამოუცხადებლობის გასამართლებლად.¹⁹² მეტიც, ევროპული სასამართლოს შეფასებით, ეროვნულმა სასამართლოებმა არ გასწიეს გონივრული ძალისხმევა არსებული სამართლებრივი ჩარჩოს ფარგლებში ბრალდების მხარის¹⁹³ ორი მოწმის სასამართლო სხდომაზე დასწრების უზრუნველსაყოფად, შესაბამისად, არ არსებობდა ამ მოწმეთა გამოუცხადებლობის საპატიო მიზეზი.¹⁹⁴

¹⁸⁵ ადამიანის უფლებათა ევროპული სასამართლოს 2023 წლის 29 ივნისის გადაწყვეტილება საქმეზე „ხავშაბოვა საქართველოს წინააღმდეგ“ (CASE OF KHAVSHABOVA v. GEORGIA), 26134/19, პარ. 1.

¹⁸⁶ იქვე, პარ. 1, 15.

¹⁸⁷ იქვე, პარ. 17-18.

¹⁸⁸ იქვე, პარ. 20.

¹⁸⁹ იქვე, პარ. 35.

¹⁹⁰ იქვე, პარ. 38.

¹⁹¹ იქვე, პარ. 45.

¹⁹² იქვე, პარ. 46.

¹⁹³ ევროპული სასამართლოს შეფასებით, პროკურატურის წარმომადგენლები ვარაუდობდნენ მოწმეთა საზღვარგარეთ გამგზავრებას და ფიქრობდნენ, რომ არსებობდა მათი ჩვენებების დაკარგვის საფრთხე, ამიტომ, მნიშვნელოვანი იყო, რომ შესაბამის ორგანოებს მომჩივნისთვის მიეცათ შიდასახელმწიფოებრივი კანონმდებლობის დებულებებით გათვალისწინებული შესაძლებლობა, გამოეკითხა ორი მთავარი მოწმე გამოძიების ეტაპზე, მომჩივნის ანდა მის მიერ არჩეული ადვოკატის თანდასწრებით (იხ. იქვე, პარ. 54.).

¹⁹⁴ იქვე, პარ. 47.

მოწმეთა დაკითხვის ვიდეოჩანაწერის არარსებობა

ევროპული სასამართლო ყურადღებას ამახვილებს, რომ არ არსებობდა მაგისტრატის მოსამართლის წინაშე მოწმეთა დაკითხვის ვიდეოჩანაწერები, რის გამოც, ვერც მომჩივანმა და ვერც მოსამართლეებმა ვერ შეძლეს ამ პროცესის ნახვა, დაკითხვისას ვერ დააკვირდნენ მოწმის ქცევას, რითაც მოაკლდათ შესაძლებლობა, შეექმნათ უფრო ნათელი წარმოდგენა მოწმის სანდოობაზე.¹⁹⁵ ევროპული სასამართლოს შეფასებით, მაგისტრატის მოსამართლის წინაშე დაკითხული მოწმის ჩვენება ვერ ჩაითვლება მომჩივნის უფლების შემცვლელად, დაკითხოს მოწმე საქმის განმხილველი მოსამართლის წინაშე, რომელიც, საბოლოოდ, იღებს გადაწყვეტილებას მომჩივნის ბრალულობასთან დაკავშირებით.¹⁹⁶

(25) უგულავა საქართველოს წინააღმდეგ (No. 2) (2024)

საქმის დასახელება/ნომერი	უგულავა საქართველოს წინააღმდეგ (No. 2), 22431/20
საჩივრის წარდგენის თარიღი	29 მაისი, 2020 წელი
გადაწყვეტილების თარიღი	1-ლი თებერვალი, 2024 წელი
მომჩივანი	გიორგი უგულავა
ადამიანის უფლებათა ევროპული კონვენციის დარღვეული უფლება	მე-6 მუხლი 1-ლი პუნქტი
სამართლიანი დაკმაყოფილება	ევროპულ სასამართლოს სახელმწიფოსთვის კომპენსაცია არ დაუკისრებია.

ეს საქმე ეხება პოლიტიკურად სენსიტიური საქმის განხილვისას უზენაესი სასამართლოს სისხლის სამართლის პალატის შემადგენლობაში ყოფილი გენერალური პროკურორის, შალვა თაღუმაძის ყოფნას, რაც ეჭვის ქვეშ აყენებდა სასამართლოს მიუკერძოებლობას, ვინაიდან გენერალური პროკურორობის დროს შალვა თაღუმაძე ინფორმირებული იყო მომჩივნის წინააღმდეგ წარმოებული სისხლის სამართლის პროცესის სტრატეგიის შესახებ.

ევროპულმა სასამართლომ აღნიშნა, რომ შალვა თაღუმაძეს, როგორც გენერალურ პროკურორს, ექვემდებარებოდა ყველა პროკურორი. შესაბამისად, მას შეეძლო, დაქვემდებარებული პროკურორებისგან მოეთხოვა განახლებული ინფორმაცია მომჩივნის საქმის მიმდინარეობასთან დაკავშირებით და გაეწია ზედამხედველობა.¹⁹⁷ ამგვარად, გენერალური პროკურორის როლის, ფართო უფლებამოსილებებისა და პოლიტიკურად მგრძობიარე კონტექსტის გათვალისწინებით, ევროპულმა სასამართლომ მიიჩნია, რომ ამ თანამდებობაზე ყოფნისას შალვა თაღუმაძე ინფორმირებული იყო მომჩივნის წინააღმდეგ წარმოებული სისხლის სამართლის პროცესის სტრატეგიის შესახებ.¹⁹⁸ **ევროპული სასამართლოს შეფასებით, განმცხადებლის სასამართლო პროცესის უკიდურესი პოლიტიკური მგრძობელობის, გენერალური პროკურორის როლისა და უფლებამოსილებების გათვალისწინებით, მთავარი პროკურორის მოსამართლედ ჩართვა საკმარისი იყო უზენაესი სასამართლოს ობიექტურ მიუკერძოებლობაში ეჭვის შეტანისთვის.**¹⁹⁹

¹⁹⁵ იქვე, პარ. 55.

¹⁹⁶ იქვე, პარ. 52.

¹⁹⁷ ადამიანის უფლებათა ევროპული სასამართლოს 2024 წლის 1-ლი თებერვლის გადაწყვეტილება საქმეზე „უგულავა საქართველოს წინააღმდეგ“ (No. 2), (CASE OF UGULAVA v. GEORGIA (No. 2)), 22431/20, პარ. 60.

¹⁹⁸ იქვე, პარ. 62.

¹⁹⁹ იქვე, პარ. 64.

(26) ხაჭაპურიძე და ხაჩიძე საქართველოს წინააღმდეგ (2024)

საქმის დასახელება/ნომერი	ხაჭაპურიძე და ხაჩიძე საქართველოს წინააღმდეგ, 59464/21, 13079/22
საჩივრის წარდგენის თარიღი	59464/21 - 4 დეკემბერი, 2021 წელი 13079/22 - 10 მარტი, 2022 წელი
გადაწყვეტილების თარიღი	29 აგვისტო, 2024 წელი
მომჩივნები	თამარ ხაჭაპურიძე (პირველი მომჩივანი 59464/21) კახაბერ ხაჩიძე (მეორე მომჩივანი, 59464/21) დავით ხაჩიძე (მესამე მომჩივანი, 13079/22)
ადამიანის უფლებათა ევროპული კონვენციის დარღვეული უფლებები	მე-6 მუხლის 1-ლი პუნქტი და მე-3 პუნქტის „გ“ და „დ“ ქვეპუნქტები
სამართლიანი დაკმაყოფილება	ზიანი - 2 000 EUR ხარჯები და დანახარჯები - 3 000 EUR

ეს საქმე შეეხება დაცვის მხარის მოწმის დასწრების უზრუნველსაყოფად ზომების მიუღებლობას, დაუსწრებელი მოწმის ჩვენებაზე დაყრდნობას და წესრიგის დარღვევის გამო სხლომიდან გაძევებული ბრალდებულებისთვის მომდევნო სხლომებზე დაშვებაზე უარს.²⁰⁰ 2016 წლის 26 აგვისტოს პოლიციაში შევიდა ორი შეტყობინება გონიოში მომხდარი ინციდენტის შესახებ. პირველი მოხსენება შეადგინა პირველმა მომჩივანმა, რომელიც ჩიოდა, რომ თბილისის საქალაქო სასამართლოს მაშინდელმა თავმჯდომარემ, მოსამართლე გიორგი მიქაუტაძემ, სიტყვიერი და ფიზიკური შეურაცხყოფა მიიყენა მას და მის შვილს (მესამე მომჩივანს). დაახლოებით ორმოცი წუთის შემდეგ გიორგი მიქაუტაძემ პოლიციას შეატყობინა, რომ პირველი მომჩივნისა და მისი ოჯახის მხრიდან ის იყო ფიზიკური და სიტყვიერი შეურაცხყოფის მსხვერპლი.²⁰¹ 2016 წლის 27 აგვისტოს პირველი და მეორე მომჩივანი დააკავეს სისხლის სამართლის კოდექსის 365-ე მუხლით გათვალისწინებული დანაშაულის ბრალდებით - მუქარა ან ძალადობა სამართალწარმოების განხორციელებასთან, გამოძიებას ან დაცვის განხორციელებასთან დაკავშირებით.²⁰² სასამართლომ ისინი დამნაშავედ ცნო სისხლის სამართლის კოდექსის 239-ე მუხლით გათვალისწინებულ დანაშაულის, ხულიგნობის ჩადენაში.²⁰³ ევროპული სასამართლოს შეფასებით, ამ საქმესთან მიმართებით ეროვნულ დონეზე გამოვლინდა შემდეგი ხარვეზები: ეროვნულმა სასამართლოებმა არ დაასახელეს მესამე მომჩივნის, როგორც დაცვის მოწმის მოსმენაზე უარის თქმის საკმარისი მიზეზი. გარდა ამისა, ისინი დაყრდნენ დაუსწრებელი მოწმეების ჩვენებებს, დაცვის მხარისთვის საპირწონე ფაქტორების არსებობის გარეშე. ამასთანავე, ეროვნულმა სასამართლოებმა სათანადოდ არ განმარტეს 2018 წლის 22 ივნისის შემდგომ, დარჩენილი სასამართლო პროცესებიდან პირველი და მეორე მომჩივნების სრული გამოორცხვის მიზეზი.²⁰⁴

²⁰⁰ ადამიანის უფლებათა ევროპული სასამართლოს 2024 წლის 29 ივლისის გადაწყვეტილება საქმეზე „ხაჭაპურიძე და ხაჩიძე საქართველოს წინააღმდეგ“ (CASE OF KHACHAPURIDZE AND KHACHIDZE v. GEORGIA), 59464/21; 13079/22, პარ. 1. (ვინაიდან კვლევის წერის მომენტისთვის, გადაწყვეტილება არ არის საბოლოო - არ არის გასული მისი გამოტანიდან 3-თვიანი ვადა, ის შეიძლება გასაჩივრდეს დიდ პალატაში).

²⁰¹ იქვე, პარ. 7.

²⁰² იქვე.

²⁰³ იქვე, პარ. 57.

²⁰⁴ იქვე, პარ. 143.

(27) წულუკიძე და რუსულაშვილი საქართველოს წინააღმდეგ (2024)

საქმის დასახელება/ნომერი	წულუკიძე და რუსულაშვილი საქართველოს წინააღმდეგ, 44681/21, 17256/22
საჩივრების წარდგენის თარიღი	44681/21 - 10 აგვისტო, 2021 წელი 17256/22 - 24 მარტი, 2022 წელი
გადაწყვეტილების თარიღი	29 აგვისტო, 2024 წელი
მომჩივნები	ზურაბ წულიკიძე (44681/21) ლევან რუსულაშვილი (17256/22)
ადამიანის უფლებათა ევროპული კონვენციის დარღვეული უფლებები	მე-6 მუხლის 1-ლი პუნქტი
სამართლიანი დაკმაყოფილება	ზიანი - 3 600 EUR (თითოეულისთვის) ხარჯები და დანახარჯები - 1 500 EUR (თითოეულისთვის)

საქმე ეხება საკასაციო სასამართლოში სს „თელასის“ წინააღმდეგ მომჩივანთა შრომითი დავის განხილვისას მოსამართლის აცილების შუამდგომლობის დაკმაყოფილებაზე უარს. მომჩივანთა შუამდგომლობის ფაქტობრივი საფუძველი იყო ის, რომ მოპასუხის, სს „თელასის“ იურისტის შვილები იყვნენ საქმის განმხილველი მოსამართლეების - ლევან მიქაბერიძისა და მირანდა ერემადის თანაშემწეები.²⁰⁵ მომჩივნების შუამდგომლობები მოსამართლეთა აცილების შესახებ მიჩნეული იყო დაუსაბუთებლად და არ დაკმაყოფილდა, ასევე, დაუშვებლად ცნეს მათი საკასაციო საჩივრებიც.²⁰⁶

ევროპული სასამართლო აღნიშნავს, რომ მოსამართლის თანაშემწისთვის დაკისრებული კონკრეტული ამოცანებიდან გამომდინარე,²⁰⁷ მის ჩართულობას შეიძლება დიდი მნიშვნელობა ჰქონდეს. შესაბამისად, პირი, რომელიც ამ ამოცანებს ასრულებს, მიუკერძოებელი უნდა იყოს.²⁰⁸ ევროპული სასამართლოს შეფასებით, იმ ფაქტმა, რომ მოპასუხე მხარის კანონიერი წარმომადგენელი იყო საქმის განმხილველი მოსამართლის თანაშემწის მამა, წარმოშვა ინტერესთა შესაძლო კონფლიქტი, რაც საჭიროებდა უზენაესი სასამართლოს სათანადო რეაგირებას - საკითხის მოგვარებას ევროპის მოსამართლეთა საკონსულტაციო საბჭოს (CCJE) დასკვნის შესაბამისად.²⁰⁹

ამასთანავე, ევროპული სასამართლო ყურადღებას ამახვილებს იმ შიდა პროცედურული წესების არარსებობაზე, რომლებიც დაადგენდნენ პროფესიონალურ და ეთიკურ სტანდარტებს მოსამართლის თანაშემწის მიმართ. ამ პოზიციაზე მომუშავე

²⁰⁵ ადამიანის უფლებათა ევროპული სასამართლოს 2024 წლის 29 აგვისტოს გადაწყვეტილება საქმეზე „წულუკიძე და რუსულაშვილი საქართველოს წინააღმდეგ“ (CASE OF TSULUKIDZE AND RUSULASHVILI v. GEORGIA), 44681/21; 17256/22; პარ. 7, 13.

²⁰⁶ იქვე, პარ. 11, 17.

²⁰⁷ მოსამართლის თანაშემწეების პასუხისმგებლობა მოიცავს ადმინისტრაციულ და სამართლებრივ სამუშაოებს, *ამასთანავე*, შესაძლოა, შეეხოს გადაწყვეტილებებს და მათ შემუშავებას. იქვე, პარ. 52, 24.

²⁰⁸ იქვე, პარ. 52.

²⁰⁹ იქვე, პარ. 54.

სასამართლოში მოსული მხარეები მოელიან მიუკერძოებლობას არა მხოლოდ მათი საქმის განმხილველი მოსამართლისგან, არამედ საქმეზე მომუშავე მოსამართლის თანაშემწისგანაც. *შესაბამისად, სასამართლოს თანაშემწეები ვალდებული არიან, დაექვემდებარონ ინტერესთა კონფლიქტის შესახებ რეგულაციებს. მეტიც, წევრმა სახელმწიფოებმა უნდა იმსჯელონ ისეთი წესების შემოღებაზე, რომლებიც უზრუნველყოფს მოსამართლის თანაშემწეების მიმართ იმავე კრიტერიუმების გავრცელებას, რომლებიც მოსამართლის აცილების შემთხვევაში გამოიყენება (იხ. ევროპის მოსამართლეთა საკონსულტაციო საბჭოს დასკვნა no. 22, 2019).*

პირის მჭიდრო ოჯახურ კავშირებს პროცესში მონაწილე მხარესა ან მის კანონიერ წარმომადგენელს შორის, შეუძლია, შელახოს სასამართლო პროცესის მიუკერძოებლობა. ამგვარად, ასეთი შიდა პროცედურული წესების არარსებობის გამო, შეუძლებელი იყო პოტენციური ინტერესთა კონფლიქტის იდენტიფიცირება და რეგულირება.²¹⁰

(28) კეზერაშვილი საქართველოს წინააღმდეგ (2024)

საქმის დასახელება/ნომერი	კეზერაშვილი საქართველოს წინააღმდეგ, 11027/22
საჩივრის წარდგენის თარიღი	17 თებერვალი, 2022 წელი
გადაწყვეტილების თარიღი	5 დეკემბერი, 2024 წელი
მომჩივანი	დავით კეზერაშვილი
დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ევროპულ სასამართლოს სახელმწიფოსთვის კომპენსაცია არ დაუკისრებია

საქმე ეხება მიკერძოებულ სისხლის სამართლის მართლმსაჯულებას. 2018 წლის 22 ივნისს მომჩივნის გამამართლებელი განაჩენი პროკურატურამ გაასაჩივრა საკასაციო სასამართლოში, ხოლო 1 თვეში შალვა თაღუმაძე გახდა საქართველოს მთავარი პროკურორი. ევროპულმა სასამართლომ გაითვალისწინა საქართველოს პროკურატურის იერარქიული სტრუქტურა, მთავარი პროკურორის ფართო უფლებამოსილებები, საქმის პოლიტიკური კონტექსტი და აღნიშნა, რომ შალვა თაღუმაძე პასუხისმგებელი იყო პროკურატურის საქმიანობაზე, მათ შორის, ამ საქმეზეც და შეუძლო საკასაციო საჩივრის უკან გამოთხოვნა, თუმცა მან ეს არ გააკეთა.²¹¹ ევროპული სასამართლოს თანახმად, ყველა ეს ფაქტორი ქმნიდა შთაბეჭდილებას, რომ მთავარი პროკურორი შალვა თაღუმაძე აგრძელებდა საქმის მხარდაჭერას და, შესაძლოა, ჰქონდა წვდომა შიდა ინფორმაციაზე. ევროპული სასამართლოს შეფასებით, შალვა თაღუმაძის ჩართვა უზენაესი სასამართლოს მოსამართლეთა კოლეგიაში, რომელმაც განმცხადებლის განმარტებული საქმე განიხილა, საკმარისი იყო საკასაციო სასამართლოს ობიექტური მიუკერძოებლობის მიმართ ეჭვის გასაჩენად.²¹²

(29) ზაალიშვილი საქართველოს წინააღმდეგ (2025)

საქმის დასახელება/ნომერი	ზაალიშვილი საქართველოს წინააღმდეგ, 45681/22
საჩივრის წარდგენის თარიღი	10 სექტემბერი, 2022 წელი
გადაწყვეტილების თარიღი	11 თებერვალი, 2025 წელი
მომჩივანი	ლელია ზაალიშვილი
დარღვეული უფლება	მე-6 მუხლის 1-ლი პუნქტი
სამართლიანი დაკმაყოფილება	ზიანი - 2 200 EUR

²¹⁰ იქვე, პარ. 54.

²¹¹ ადამიანის უფლებათა ევროპული სასამართლოს 2024 წლის 5 დეკემბრის გადაწყვეტილება საქმეზე „კეზერაშვილი საქართველოს წინააღმდეგ“ (CASE OF KEZERASHVILI v. GEORGIA), 11027/22, პარ. 94.

²¹² იქვე, პარ. 95.

საქმე ეხება გაჭიანურებულ სამოქალაქო მართლმსაჯულებას. სასამართლოში სამართალწარმოება დაიწყო 2012 წლის 2 თებერვალს და დასრულდა 2022 წლის 18 მაისს.²¹³ ევროპული სასამართლოს შეფასებით, სასამართლოში საქმის წარმოების ხანგრძლივობა - სამივე ინსტანციაში 10 წელი და 3 თვე²¹⁴ - არ შეესაბამება გონივრულ ვადაში საქმის სამართლიანი განხილვის მოთხოვნას.²¹⁵

(30) ღლონტი და სხვები საქართველოს წინააღმდეგ (2025)

საქმის დასახელება/ნომერი	ღლონტი და სხვები საქართველოს წინააღმდეგ, 13708/18
საჩივრის წარდგენის თარიღი	14 მარტი, 2018 წელი
გადაწყვეტილების თარიღი	11 თებერვალი, 2025 წელი
მომჩივნები	გიზო ღლონტი გიორგი ლობჯანიძე დავით წიფურია არჩილ ალავიძე ნუგზარ კაიმაური
დარღვეული უფლებები	მე-6 მუხლის 1-ლი პუნქტი და მე-3 პუნქტის „ა“ და „ბ“ ქვეპუნქტები
სამართლიანი დაკმაყოფილება	ევროპულ სასამართლოს სახელმწიფოსთვის კომპენსაცია არ დაუკისრებია

საქმე ეხება ბრალდებულთა არასათანადო ინფორმირებას წარდგენილი ბრალდების შესახებ და დაცვის მოსამზადებლად არასაკმარისი დროის მიცემას.²¹⁶ თავდაპირველად, მომჩივნებს ბრალად წარედგინათ გაფლანგვა, თუმცა თბილისის სააპელაციო სასამართლომ ბრალდების კვალიფიკაცია შეცვალა და სამსახურებრივი უფლებამოსილების ბოროტად გამოყენებისთვის გაასამართლა, ამის შესახებ წინასწარ გაფრთხილების გარეშე. მეტიც, არც სასამართლო პროცესი გადადებული დამატებითი განხილვისთვის და არც ახალი ბრალდების შემადგენელი ელემენტები განხილულა სასამართლოში.²¹⁷

ამ დანაშაულთა განზრახვის ელემენტები არსებითად განსხვავდება ერთმანეთისგან, ხოლო ევროპულმა სასამართლომ არ გაიზიარა სახელმწიფოს პოზიცია, რომ დანაშაულის სამართლებრივი კვალიფიკაცია იყო მცირედ მნიშვნელოვანი, ვინაიდან ხელახალი კვალიფიკაცია ეფუძნებოდა იმავე ფაქტებს.²¹⁸ ევროპული სასამართლოს შეფასებით, ახალი ბრალდების ფარგლებში, თბილისის სააპელაციო სასამართლომ მომჩივნებს არ მისცა დაცვის შესაძლებლობა, ხოლო უზენაესმა სასამართლომ, საკასაციო საჩივრის დაუშვებლად ცნობით, ვერ გამოასწორა მეორე ინსტანციის სასამართლოში სამართალწარმოებისას ბრალდებულების მიმართ დარღვეული უფლებები.²¹⁹

²¹³ ადამიანის უფლებათა ევროპული სასამართლოს 2025 წლის 11 თებერვლის გადაწყვეტილება საქმეზე „ზალიშვილი საქართველოს წინააღმდეგ“ (CASE OF ZAALISHVILI v. GEORGIA), 45681/22, პარ. 10.

²¹⁴ იქვე.

²¹⁵ იქვე, პარ. 12.

²¹⁶ ადამიანის უფლებათა ევროპული სასამართლოს 2025 წლის 11 თებერვლის გადაწყვეტილება საქმეზე „ღლონტი და სხვები საქართველოს წინააღმდეგ“ (CASE OF GLONTI AND OTHERS v. GEORGIA), 13708/18, პარ. 16.

²¹⁷ იქვე, პარ. 12.

²¹⁸ იქვე, პარ. 13.

²¹⁹ იქვე, პარ. 15.

II. საჭმეები, რომლებზეც, მე-6 მუხლთან ერთად, სხვა დარღვევების დადგინდა

ამ ქვეთავში განხილულია 7 საქმე, რომლებზეც, სამართლიანი სასამართლოს უფლების გარდა, კონვენციით დაცული სხვა ძირითადი უფლებაც დაირღვა.

(31) ჭიჭინაძე საქართველოს წინააღმდეგ (2010)

საქმის დასახელება/ნომერი	ჭიჭინაძე საქართველოს წინააღმდეგ, 18156/05
საჩივრის წარდგენის თარიღი	12 აპრილი, 2005 წელი. 2006 წლის 12 აგვისტოსა და 6 ნოემბერს მომჩივანმა წარმოადგინა დამატებითი საჩივრები
გადაწყვეტილების თარიღი	27 მაისი, 2010 წელი
მომჩივანი	სულხან ჭიჭინაძე
დარღვეული უფლებები	მე-6 მუხლის 1-ლი პუნქტი 1-ლი დამატებითი ოქმის 1-ლი მუხლი
სამართლიანი დაკმაყოფილება	ზიანი - 39 000 EUR

ეს საქმე ეხება ბათუმის საქალაქო სასამართლოს მიერ მომჩივნის საკუთრების უფლების დამდგენი 2004 წლის 18 ნოემბრის გადაწყვეტილების ბათილად ცნობას საპროცესო ნორმების დარღვევით, იმ ნოტარიუსის მოთხოვნის საფუძველზე, რომელიც არ ყოფილა ამ სამოქალაქო საქმის მხარე.

ევროპულ სასამართლოსთან მიმართებით ადამიანის უფლებათა ევროპულმა სასამართლომ დაადგინა შემდეგი დარღვევები:

მხარეთა შორის თანასწორობის პრინციპის დარღვევა

ევროპულმა სასამართლომ მიუღებლად მიიჩნია ის ფაქტი, რომ ბათუმის საქალაქო სასამართლომ გაითვალისწინა მხოლოდ ნოტარიუსის პოზიცია, ისე, რომ არ დაინტერესებულა მომჩივნის საპასუხო არგუმენტებით.²²⁰ შედეგად, მომჩივანი გაუმართლებლად აღმოჩნდა უთანასწორო პირობებში ოპონენტის პირისპირ.²²¹

მნიშვნელოვანი გარემოებების შეუფასებლობა

ნოტარიუსმა ბათუმის საქალაქო სასამართლოს წინაშე განაცხადა, რომ მისთვის ობიექტურად შეუძლებელი იყო, უფრო ადრე სცოდნოდა სამოქალაქო საქმის შესახებ. ევროპული სასამართლოს შეფასებით, ბათუმის საქალაქო სასამართლოს გამორჩა ამ მნიშვნელოვანი საკითხის გადასინჯვა და მისი სათანადო გულმოდგინებითა და ზედმიწევნით შემოწმება, სანამ გამოიტანდა დასკვნას, რომ ბათილად ცნობის მოთხოვნა დროული და საფუძვლიანი იყო.²²²

²²⁰ ადამიანის უფლებათა ევროპული სასამართლოს 2010 წლის 27 მაისის გადაწყვეტილება საქმეზე „ჭიჭინაძე საქართველოს წინააღმდეგ“ (CASE OF TCHITGINADZE v. GEORGIA), 18156/05, პარ. 56.

²²¹ იქვე.

²²² იქვე, პარ. 57. ევროპულმა სასამართლომ ასევე ყურადღება გაამახვილა იმ გარემოებაზე, რომ 1996 წლის 3 მაისის ნოტარიატის შესახებ აქტის თანახმად, ნოტარიუსები, რომლებიც გაერთიანებულნი იყვნენ ნოტარიუსთა პალატაში, იმყოფებოდნენ იუსტიციის სამინისტროს უშუალო ზედამხედველობის ქვეშ. საქმის ფაქტობრივი გარემოებებიდან ნათელი იყო, რომ სამინისტრო, რომელიც მოქმედებს ორი დაქვემდებარებული სააგენტოს – ნოტარიუსთა პალატისა და მიწის რეესტრის სააგენტოს მეშვეობით – ინფორმირებული იყო მომჩივნის სამოქალაქო საქმის თაობაზე, როდესაც ეს საქმე ბათუმის საქალაქო სასამართლოში განიხილებოდა და მაშინაც, როცა 2004 წლის 18 ნოემბრის გადაწყვეტილება გახდა საბოლოო და სავალდებულო.

საპროცესო ნორმის არასწორი გამოყენება

ევროპულმა სასამართლომ ყველაზე სამწუნარო უწოდა იმ ფაქტს, რომ ნოტარიუსმა, რომელიც პირველი სამოქალაქო საქმის მხარე არ ყოფილა, მიაღწია 2004 წლის 18 ნოემბრის საბოლოო გადაწყვეტილების ბათილად ცნობას სამოქალაქო საპროცესო კოდექსის 422-ე მუხლის 1-ლი (ბ) პუნქტის საფუძველზე.²²³ ეს ნორმა, სინამდვილეში, შეეხებოდა მხოლოდ პროცესის რეალურ მხარეებს, მათი პროცედურული უფლებების დასაცავად.²²⁴ ევროპული სასამართლოს განმარტებით, ლოგიკურად, პირი, რომელიც პროცესის მხარე არ ყოფილა, ვერ გაასაჩივრებს თავისი პროცედურული უფლებების შელახვას ასეთი პროცესის მსვლელობისას.²²⁵ სასამართლოს შეფასებით, მაშინაც კი, თუ ვიფიქრებთ, რომ მომჩივნის სამოქალაქო სარჩელით ნოტარიუსის პროფესიული რეპუტაცია დაზარალდა, ისეთი რადიკალური ზომის სანაცვლოდ, როგორც იყო საბოლოო გადაწყვეტილების ბათილად ცნობა, ბათუმის საქალაქო სასამართლოს მხრიდან უფრო შესაფერისი იქნებოდა, ნოტარიუსისთვის მიეცა რჩევა, მომჩივნის წინააღმდეგ ახალი სარჩელი შეეტანა.²²⁶

გადაწყვეტილების თარიღთან დაკავშირებული საეჭვო გარემოებები

მომჩივანი მიუთითებდა, რომ, სინამდვილეში, 2005 წლის 27 ოქტომბერს სხდომა ბათუმის საქალაქო სასამართლოში საერთოდ არ ჩატარებულა, ხოლო გადაწყვეტილება მოსამართლემ ძველი თარიღით 2006 წლის მარტში გააფორმა.²²⁷ მომჩივანი ამასთან დაკავშირებით მიუთითებს საეჭვო შემთხვევაზე, კონკრეტულად, მოსამართლე მას იმავე პროცესზე ამ თარიღის გასვლის შემდეგაც იბარებდა, ხოლო 2005 წლის 27 ოქტომბრის გადაწყვეტილება მას 2006 წლის მარტის დასაწყისში გაუგზავნა.²²⁸ ევროპული სასამართლოს შეფასებით, საქმის მასალებით არ მტკიცდება, რომ 2005 წლის 27 ოქტომბრის გადაწყვეტილება გაყალბებული იყო, თუმცა თვალს ვერ დახუჭავდა იმ სამწუნარო ფაქტზე, რომ ბათუმის საქალაქო სასამართლომ მომჩივანი პროცესზე ამ თარიღის გასვლის შემდეგაც დაიბარა.²²⁹

(32) კაკაბაძე და სხვები საქართველოს წინააღმდეგ (2012)

საქმის დასახელება/ნომერი	კაკაბაძე და სხვები საქართველოს წინააღმდეგ, 1484/07
საჩივრის წარდგენის თარიღი	28 დეკემბერი, 2006 წელი
გადაწყვეტილების თარიღი	2 ოქტომბერი, 2012 წელი
მომჩივნები	ირაკლი კაკაბაძე (პირველი მომჩივანი) ლაშა ჩხარტიშვილი (მეორე მომჩივანი) ჯაბა ჯიშკარიანი (მესამე მომჩივანი) ზურაბ რთველიაშვილი (მეოთხე მომჩივანი) დავით დალაქიშვილი (მეხუთე მომჩივანი)

²²³ იქვე, პარ. 58.

²²⁴ იქვე.

²²⁵ იქვე.

²²⁶ იქვე.

²²⁷ იქვე, პარ. 52.

²²⁸ იქვე. 2005 წლის 9 ნოემბერს მოსამართლემ მომჩივანი, მოპასუხის სტატუსით, 2005 წლის 14 ნოემბრისთვის, დეპუტით დაიბარა სასამართლოში „ნოტარიუსის მიერ დაწყებულ პროცესზე“. მომჩივანმა მეორე დღეს გაგზავნა საპასუხო დეპუტა და ითხოვა სხდომის გადადება ჯანმრთელობის მდგომარეობის გამო (იქვე, პარ. 27).

²²⁹ იქვე, პარ. 56.

ადამიანის უფლებათა ევროპული კონვენციის დარღვეული უფლებები	მე-5 მუხლის 1-ლი პუნქტი მე-6 მუხლის 1-ლი პუნქტი და მე-3 პუნქტის „გ“ ქვეპუნქტი მე-11 მუხლი მე-7 დამატებითი ოქმის მე-2 მუხლი
სამართლიანი დაკმაყოფილება	ზიანი - 6 000 EUR (თითოეულს) ხარჯები და დანახარჯები - 5 957 EUR (ერთობლივად)

ეს საქმე ეხება 2006 წელს თბილისის სააპელაციო სასამართლოს ეზოში პროტესტის გამართვისას მანდატურების მიერ დემონსტრანტების დაკავებას, მათ ჩაკეტვას სამორიგეო ოთახში,²³⁰ ამასთანავე, მხოლოდ მანდატურების განმარტებითი ბარათების საფუძველზე, სააპელაციო სასამართლოს თავმჯდომარის მიერ მათთვის, პასუხისმგებლობის სახით, 30-დღიანი პატიმრობის შეფარდებას იმ ნორმის შესაბამისად, რომელიც ითვალისწინებდა პასუხისმგებლობას სასამართლოს შიგნით წესრიგის დარღვევისთვის.²³¹ მომჩივნებმა ეს გადაწყვეტილება უზენაეს სასამართლოშიც გაასაჩივრეს,²³² თუმცა - უშედეგოდ.²³³

ეროვნულ სასამართლოსთან მიმართებით ადამიანის უფლებათა ევროპულმა სასამართლომ დაადგინა შემდეგი დარღვევები:

ფაქტობრივი და სამართლებრივი გარემოებების არასათანადოდ გამოკვლევა

ევროპული სასამართლოსთვის შემამფოთებელია, რომ, ნაცვლად თავისი მოვალეობების შესრულებისა და იმ საფუძვლიანი მიზეზების დადგენისა, რომლებიც გამართლებდა აქციის დაშლასა და მომჩივნებისთვის პატიმრობის შეფარდებას, თბილისის სააპელაციო სასამართლოს თავმჯდომარემ განკარგულებაში მიუთითა შიდა კანონმდებლობის მიხედვით საზოგადოებრივი წესრიგის დარღვევასა და სასამართლოს შეურაცხყოფასთან დაკავშირებული სამართალდარღვევის კვალიფიკაციის ზოგად და აბსტრაქტულ ტერმინებზე. იმავდროულად, მან არ განმარტა, ინციდენტის კონკრეტული გარემოებებიდან გამომდინარე, როგორ შეეშალა ხელი მართლწესრიგის უზრუნველყოფას და მომჩივნების მიერ წარმოქმნილი რომელი კონკრეტული ფრაზები ჩაითვალა სასამართლოს შეურაცხყოფად.²³⁴

ევროპული სასამართლოს შეფასებით, მომჩივანთა დაკავების ფაქტობრივი და იურიდიული საფუძვლების შესწავლისას გამოიკვეთა გაუფრთხილებლობა მოსამართლის მხრიდან, ამასთანავე, მან თავისი უფლებამოსილება განახორციელა თვითნებობის წინააღმდეგ მიმართული ელემენტარული პროცედურული გარანტიების ამკარად საწინააღმდეგოდ.²³⁵

მიუკერძოებლობის დარღვევა და დაცვის მხარის გარანტიების უგულვებლყოფა

ევროპული სასამართლოს შეფასებით, თბილისის სააპელაციო სასამართლოს თავმჯდომარემ საქმე მოისმინა ზედაპირული პროცედურით, დახურულ კარს მიღმა, მხოლოდ მანდატურთა მოხსენებითი ბარათების საფუძველზე და არ მისცა მომ-

²³⁰ ადამიანის უფლებათა ევროპული სასამართლოს 2012 წლის 2 ოქტომბრის გადაწყვეტილება საქმეზე „კაკაბაძე და სხვები საქართველოს წინააღმდეგ“ (CASE OF KAKABADZE AND OTHERS v. GEORGIA), 1484/07, პარ. 6-10.

²³¹ იქვე, პარ. 16-18.

²³² იქვე, პარ. 19.

²³³ იქვე, პარ. 20.

²³⁴ იქვე, პარ. 90.

²³⁵ იქვე, პარ. 69.

ჩვენებს შესაძლებლობა, დასწრებოდნენ მოსმენას, რაც არის იმ სამართლიანი სასამართლო განხილვის ელემენტარული პროცედურული მოთხოვნების სრული უარყოფა, როგორცაა მხარეთა თანასწორობისა და შეჯიბრებითობის, დაცვის მომზადებისთვის საჭირო ადეკვატური დროისა და საშუალებების, ასევე, კვალიფიციური იურიდიული დახმარებით სარგებლობის უფლებები.

ევროპული სასამართლოსთვის შემამფოთებელია, რომ პრესკონფერენციისას თბილისის სააპელაციო სასამართლოს თავმჯდომარემ განცხადება გააკეთა მომჩივანთა პატიმრობის შესახებ. ამით მან ფაქტები აშკარად ნაჩქარევად შეაფასა და ბრალის დამტკიცებამდე საჯაროდ გამოხატა აზრი, რითაც მომჩივნებს, ფაქტობრივად, დამნაშავეები უწოდა.²³⁶

არაპროპორციული სანქცია

ევროპული სასამართლოს შეფასებით, მიუხედავად იმისა, რომ მომჩივანთა მხრიდან აქციის მიმდინარეობისას არ გამოვლენილა არანაირი ძალადობრივი ქმედება, ისინი მაინც დაექვემდებარნენ სადავო სამართალდარღვევისთვის გათვალისწინებულ ყველაზე მკაცრ სასჯელს.²³⁷

შემდგომი ინსტანციის მიერ გადასინჯვის უფლება

მართალია, მომჩივანთა სააპელაციო სარჩელი განიხილა უზენაესი სასამართლოს მოსამართლემ, თუმცა, ევროპული სასამართლოს შეფასებით, შიდა კანონმდებლობაში არსებული უჩვეულო კონტროლის პროცედურას, რომლის გამოყენებაც დამოკიდებულია შესაბამის ორგანოთა დისკრეციასზე, არ აქვს ნათლად განსაზღვრული წესები, ან მისი ვადის ლიმიტი იყო არაეფექტიანი შიდასამართლებრივი საშუალება.²³⁸

(33) მოლაშვილი საქართველოს წინააღმდეგ (2014)

საქმის დასახელება/ნომერი	მოლაშვილი საქართველოს წინააღმდეგ, 39726/04
საჩივრის წარდგენის თარიღი	27 ოქტომბერი, 2004 წელი
გადაწყვეტილების თარიღი	30 სექტემბერი, 2014 წელი
მომჩივანი	სულხან მოლაშვილი
ადამიანის უფლებათა ევროპული კონვენციის დარღვეული უფლებები	მე-3 მუხლი მე-5 მუხლის 1-ლი პუნქტის „გ“ ქვეპუნქტი, მე-3 და მე-4 პუნქტები მე-6 მუხლის 1-ლი და მე-2 პუნქტები, მე-3 პუნქტის „ბ“, „გ“ და „დ“ ქვეპუნქტები მე-14 მუხლი
სამართლიანი დაკმაყოფილება	ზიანი; ხარჯები და დანახარჯები - 20 000 EUR

ეს საქმე შეეხება პოლიტიკურად მოტივირებულ სისხლისსამართლებრივ დევნას, მომჩივნის მიმართ არასათანადო მოპყრობას, მხარეთა თანასწორობის პრინციპის და უდანაშაულობის პრეზუმფციის დარღვევას. 2004 წლის 22-23 აპრილის დამეს მომჩივანი სულხან მოლაშვილი გახდა თბილისის პოლიციის სამმართველოს წინასწარი დაკავების იზოლატორში არასათანადო მოპყრობის მსხვერპლი. ამასთან დაკავშირებით არ ჩატარებულა ქმედითი გამოძიება. გარდა ამისა, დაკავებისას მომ-

²³⁶ იქვე, პარ. 77.
²³⁷ იქვე, პარ. 91.
²³⁸ იქვე, პარ. 97.

ჩივანი იყო არაადამიანურ პირობებში და მისთვის არ გაუწევიათ ადეკვატური სამედიცინო მომსახურება.²³⁹

2014 წლის 11 მარტს საქართველოს მთავრობამ წარადგინა ცალმხრივი დეკლარაცია, რომლითაც აღიარა, რომ მოლაშვილის საქმესთან მიმართებით გამოიკვეთა შემდეგი დარღვევები:

დაკავების უკანონობა და ადეკვატური სამედიცინო დახმარების ნაკლებობა

სასამართლოს არ ჰქონდა გაცემული დაკავების ორდერები, წინასწარი დაკავების მთლიანი ვადა იყო გაუმართლებლად ხანგრძლივი და არ ეფუძნებოდა სათანადოდ დასაბუთებულ დაკავების ორდერებს, სასამართლოს მიერ მომჩივნის დაკავების საკითხის გადასინჯვისას არ არსებობდა სამართლიანობისთვის აუცილებელი მინიმალური გარანტიები.²⁴⁰ მომჩივანმა არაერთხელ გაასაჩივრა ადეკვატური მკურნალობის ნაკლებობა, თუმცა მისი მოთხოვნა ეროვნულმა უწყებებმა ან რეაგირების გარეშე დატოვეს, ან დაუსაბუთებლად მიიჩნიეს და განსახილველად არ მიიღეს.²⁴¹

მხარეთა შორის თანასწორობის პრინციპის დარღვევა

მომჩივანს არ მიეცა საკმარისი დრო საქმის მოცულობითი მასალების გასაცნობად, ასევე, არ ჰქონდა შესაძლებლობა, ესარგებლა მის მიერ შერჩეული ადვოკატის მომსახურებით, ეროვნულმა სასამართლოებმა უარი თქვეს დაცვის მხარის ზოგიერთი მოწმისა და ექსპერტის მოსმენაზე, ხოლო მოსამართლის განჩინებებში მოყვანილი დასაბუთება, ევროპული სასამართლოს შეფასებით, ამკარად თვითნებური იყო.²⁴²

უდანაშაულობის პრეზუმფციის დარღვევა

საქართველოს პრეზიდენტის და უზენაესი სასამართლოს თავმჯდომარის საჯაროდ გაკეთებული განცხადებებით დაირღვა მომჩივნის უდანაშაულობის პრეზუმფცია.²⁴³

დისკრიმინაცია და პოლიტიკურად მოტივირებული შურისძიება

მომჩივნის მიმართ სისხლის სამართლის საქმის აღძვრა იყო ორგანიზებული, პოლიტიკურად მოტივირებული შურისძიება.²⁴⁴ ვინაიდან წარდგენილ ცალმხრივ დეკლარაციაში საქართველოს მთავრობამ აღიარა კონვენციით გათვალისწინებული უფლებების დარღვევა, ევროპულმა სასამართლომ საქმე განსახილველთა ნუსხიდან ამორიცხა.

(34) ჭანკოტაძე საქართველოს წინააღმდეგ (2016)

საქმის დასახელება/ნომერი	ჭანკოტაძე საქართველოს წინააღმდეგ, 15256/05
საჩივრის წარდგენის თარიღი	12 მარტი, 2005 წელი
გადაწყვეტილების თარიღი	21 ივნისი, 2016 წელი
მომჩივანი	ზურაბ ჭანკოტაძე

²³⁹ ადამიანის უფლებათა ევროპული სასამართლოს 2014 წლის 30 სექტემბრის განჩინება საქმეზე „სულხან მოლაშვილი საქართველოს წინააღმდეგ“ (CASE OF MOLASHVILI v. GEORGIA), 39726/04, პარ. 27.

²⁴⁰ იქვე, პარ. 28.

²⁴¹ იქვე, პარ. 14.

²⁴² იქვე, პარ. 29.

²⁴³ იქვე.

²⁴⁴ იქვე.

ადამიანის უფლებათა ევროპული კონვენციის დარღვეული უფლებები	მე-5 მუხლის 1-ლი პუნქტი მე-6 მუხლის 1-ლი პუნქტი
სამართლიანი დაკმაყოფილება	ზიანი - 20 000 EUR ხარჯები და დანახარჯები - 15 000 EUR

ეს საქმე ეხება სასამართლოს მიერ მნიშვნელოვანი გარემოებების შეუფასებლობის გამო სამართლიანი სასამართლოს უფლების დარღვევას და სასამართლოს გადაწყვეტილების გარეშე ბრალდებულის პატიმრობას.

მომჩივანი მსჯავრდებული იყო სამსახურებრივი უფლებამოსილების ბოროტად გამოყენების გამო, სამოქალაქო ავიაციის სააგენტოს თავმჯდომარეობის დროს განხორციელებული ორი ქმედების საფუძველზე: (i) მომჩივნის მიერ სამოქალაქო ავიაციის სამ კომპანიასთან 2003 წლის 28 მარტსა და 13 აგვისტოს გაფორმებული მომსახურების ხელშეკრულებები მომსახურების საფასურის შეგროვების მიზნით, რომელიც, სინამდვილეში, იყო რეგულირების საფასური 2003 წლის 1-ლი აპრილიდან 1-ელ ოქტომბრამდე პერიოდში; (ii) იმავე რეგულირების საფასურს იღებდა რვა სხვა სამოქალაქო ავიაციის კომპანიისგან, განმცხადებლის მიერ 2003 წლის 25 ნოემბერს გამოცემული N1 ბრძანების საფუძველზე.²⁴⁵ ეს ქმედებები, სახელმწიფოს არგუმენტების მიხედვით, ეწინააღმდეგებოდა საკონსტიტუციო სასამართლოს 2003 წლის 10 იანვრის გადაწყვეტილებას.²⁴⁶ ევროპული სასამართლოს შეფასებით, გადაჭრით არ შეიძლებოდა იმის თქმა, რომ საკონსტიტუციო სასამართლომ აშკარად აუკრძალა სამოქალაქო ავიაციის სააგენტოს მომსახურების ხელშეკრულებების დადება სამოქალაქო ავიაციის კომპანიებთან.²⁴⁷ ამდენად, ევროპულმა სასამართლომ მიიჩნია, რომ გაუგებარი იყო, რატომ არ გასცა დასაბუთებული პასუხი ეროვნულმა სასამართლომ მომჩივნის ძირითად არგუმენტს, რომ იგი ემორჩილებოდა საკონსტიტუციო სასამართლოს მითითებას ასეთ სახელშეკრულებო ურთიერთობებთან დაკავშირებით.²⁴⁸ გარდა ამისა, ეროვნულმა სასამართლოებმა შეფასების გარეშე დატოვეს ისეთი სამართლებრივი და ფაქტობრივი გარემოებები, როგორებიცაა აუდიტის დასკვნა, განმცხადებლის მიერ გამოცემული სადავო ბრძანების სამართლებრივი საფუძველი, ასევე ის ფაქტი, რომ, თუკი სადავო ბრძანება იყო აშკარად უკანონო, იუსტიციის სამინისტროს, რომელიც კანონქვემდებარე აქტების კანონიერებას ზედამხედველობდა, ეს სამართლებრივი დეფექტები უნდა გამოეკვლინა.²⁴⁹ მიუხედავად იმისა, რომ განმცხადებელმა სათანადოდ ისაუბრა ყველა შესაბამის არგუმენტზე ეროვნული სასამართლოების წინაშე, მათ თავიანთ გადაწყვეტილებებში ამას არავითარი მნიშვნელობა არ მიანიჭეს.²⁵⁰

(35) მინდაძე და ნემსიწვრიძე საქართველოს წინააღმდეგ (2017)

საქმის დასახელება/ნომერი	მინდაძე და ნემსიწვრიძე საქართველოს წინააღმდეგ, 21571/05
საჩივრის წარდგენის თარიღი	9 მაისი, 2005 წელი
გადაწყვეტილების თარიღი	1 ივნისი, 2017 წელი

²⁴⁵ ადამიანის უფლებათა ევროპული სასამართლოს 2016 წლის 21 ივნისის გადაწყვეტილება საქმეზე „ჭანკოტაძე საქართველოს წინააღმდეგ“ (TCHANKOTADZE v. GEORGIA) 15256/05, პარ. 104.

²⁴⁶ იქვე, პარ. 9-13,

²⁴⁷ იქვე, პარ. 105.

²⁴⁸ იქვე.

²⁴⁹ იქვე, პარ. 105-107

²⁵⁰ იქვე, პარ. 107.

მომჩივნები	დავით მინდაძე (პირველი მომჩივანი) ვალერიან ნემსიწვერიძე (მეორე მომჩივანი)
ადამიანის უფლებათა ევროპული კონვენციის დარღვეული უფლებები	მე-3 მუხლი (პირველ მომჩივანთან მიმართებით) მე-5 მუხლის 1-ლი და მე-3 პუნქტები მე-6 მუხლის 1-ლი პუნქტი
სამართლიანი დაკმაყოფილება	ზიანი - 44 000 EUR ხარჯები და დანახარჯები - 4 800 EUR

ეს საქმე ეხება უკანონო პატიმრობას, წამებას, წამების შედეგად მტკიცებულებების მოპოვებას და მნიშვნელოვანი გარემოებების არასათანადოდ შეფასებას ეროვნული სასამართლოების მიერ. 2004 წელს მომჩივნები დააკავეს საქართველოს პარლამენტის წევრზე თავდასხმის გამო. ეროვნულმა სასამართლომ 2007 წელს ისინი დამნაშავედ ცნო, მათ შორის, დამამძიმებელ გარემოებებში მკვლელობის მცდელობისთვის.²⁵¹

ეროვნულ სასამართლოსთან მიმართებით ადამიანის უფლებათა ევროპულმა სასამართლომ დაადგინა შემდეგი დარღვევები:

პატიმრობის ვადის გახანგრძლივების დაუსაბუთებლობა

ევროპული სასამართლოს შეფასებით, ეროვნულმა სასამართლოებმა მომჩივნების პატიმრობაში დატოვების საჭიროების შესახებ გადაწყვეტილება დაასაბუთეს შაბლონურად, რელევანტური ინდივიდუალური გარემოებების შეფასების გარეშე.²⁵²

მომჩივნების არგუმენტების უგულვებლყოფა

ორივე მომჩივანი სასამართლოს წინაშე მიუთითებდა, რომ ამოცნობა ჩატარდა ეროვნული კანონმდებლობით გათვალისწინებული წესის დარღვევით, რადგან პირველი მომჩივანი და სხვა ამოსაცნობი პირები ერთმანეთისგან მნიშვნელოვნად განსხვავდებოდნენ. თუმცა, ეროვნულმა სასამართლოებმა ეს გარემოებები უპასუხოდ დატოვეს.²⁵³ ამასთანავე, ევროპული სასამართლოს შეფასებით, მიუხედავად იმისა, რომ მომჩივანმა სათანადოდ გაახმოვანა ყველა მძიმე ბრალდება გამოძიების, პროკურატურისა და სასამართლო ორგანოების წინაშე, ასევე, საქმის განმხილველ სასამართლოს წარუდგინა საიდუმლო ჩანაწერები, სახელმწიფო ორგანოები საეჭვოდ ინდიფერენტულები აღმოჩნდნენ დაზარალებულის მიერ მართლმსაჯულებისთვის ხელშემშლის თაობაზე კარგად დოკუმენტირებული ბრალდებების მიმართ.²⁵⁴

(36) ბოხონკო საქართველოს წინააღმდეგ (2020)

საქმის დასახელება/ნომერი	ბოხონკო საქართველოს წინააღმდეგ, 6739/11
საჩივრის წარდგენის თარიღი	20 იანვარი, 2011 წელი
გადაწყვეტილების თარიღი	22 ოქტომბერი, 2020 წელი
მომჩივანი	ორესტ ბოხონკო

²⁵¹ ადამიანის უფლებათა ევროპული სასამართლოს 2017 წლის 1-ლი ივნისის გადაწყვეტილება საქმეზე „მინდაძე და ნემსიწვერიძე საქართველოს წინააღმდეგ“ (Mindadze and Nemsitsveridze v. Georgia), 21571/05, პარ. 6-22, 72-76.

²⁵² იქვე, პარ. 124-125.

²⁵³ იქვე, პარ. 143.

²⁵⁴ იქვე.

ადამიანის უფლებათა ევროპული კონვენციის დარღვეული უფლებები	მე-3 მუხლი მე-6 მუხლის 1-ლი პუნქტი
სამართლიანი დაკმაყოფილება	ზიანი - 10 000 EUR

ეს საქმე ეხება **2008-2009 წლებში** მომჩივნის მიმართ სისხლის სამართლის საქმის სასამართლოში წარმოებისას არასათანადო მოპყრობის შედეგად მოპოვებული მტკიცებულებების გამოყენებას.²⁵⁵ ევროპული სასამართლოს თანახმად, ჩხრეკის გარემოებების თაობაზე პოლიციელების ვერსიის მოსმენისას ეროვნულმა სასამართლოებმა არ გაითვალისწინეს წინასასამართლო და საქმის არსებითი განხილვისას წარმოდგენილი მტკიცებულებების შეუსაბამობა. ევროპული სასამართლოს შეფასებით, საკმაოდ შაბლონური დასკვნით, რომ მომჩივანმა ვერ დაადასტურა თავისი ბრალდებები შეურაცხმყოფელი და დამამცირებელი ჩხრეკის შესახებ, ეროვნულმა სასამართლოებმა მტკიცების ტვირთი მთლიანად მომჩივანს დააკისრეს.²⁵⁶ ეროვნული სასამართლოების მიერ ამ საკითხის სათანადოდ შეუსწავლელობამ და დამადასტურებელი მტკიცებულების სისუსტემ შეუქცევადი ზიანი მიაყენა მთლიანად საქმის სასამართლო განხილვის სამართლიანობას.²⁵⁷

(37) მაქარაშვილი და სხვები საქართველოს წინააღმდეგ (2022)

საქმის დასახელება/ნომერი	მაქარაშვილი და სხვები საქართველოს წინააღმდეგ, 23158/20, 31365/20, 32525/20
საჩივრის წარდგენის თარიღი	23158/20 – 24 მაისი, 2020 წელი 31365/20 – 15 ივნისი, 2020 წელი 32525/20 – 15 ივნისი, 2020 წელი
გადაწყვეტილების თარიღი	1-ლი სექტემბერი, 2022 წელი
მომჩივნები	გიორგი მაქარაშვილი (23158/20) ირაკლი კაჭარავა (31365/20) ზურაბ ბერძენიშვილი (32525/20)
ადამიანის უფლებათა ევროპული კონვენციის დარღვეული უფლებები	მე-6 მუხლის 1-ლი ნაწილი მე-11 მუხლი
სამართლიანი დაკმაყოფილება	ზიანი - 1 600 EUR

ეს საქმე ეხება **2019 წლის 18 ნოემბრის საპროტესტო დემონსტრაციებისას** მომჩივანთა ადმინისტრაციული წესით დაკავებას,²⁵⁸ სასამართლო განხილვისას პატიმრობის შეფარდებას, პოლიციის ჩვენებებისთვის მომეტებული მნიშვნელობის მინიჭებას და მტკიცების ტვირთის არასწორ გადანაწილებას.²⁵⁹ პირველი ინსტა-

²⁵⁵ ადამიანის უფლებათა ევროპული სასამართლოს 2020 წლის 22 ოქტომბრის გადაწყვეტილება საქმეზე „ბოხონკო საქართველოს წინააღმდეგ“ (CASE OF BOKHONKO v. GEORGIA), 6739/11, პარ. 1.

²⁵⁶ იქვე, პარ. 77.

²⁵⁷ იქვე, პარ. 98.

²⁵⁸ ადამიანის უფლებათა ევროპული სასამართლოს 2022 წლის 1-ლი სექტემბრის გადაწყვეტილება საქმეზე „მაქარაშვილი და სხვები საქართველოს წინააღმდეგ“ (CASE OF MAKARASHVILI AND OTHERS v. GEORGIA), 23158/20, 31365/20, 32525/20, პარ. 14-16, 27.

საქმეში მე-2 მომჩივნის მიმართ ასევე დადგინდა კონვენციის მე-11 მუხლის (მშვიდობიანი შეკრების უფლება) დარღვევა. მისი დაკავება მოხდა ორი საათის შემდეგ, რაც პოლიციამ პარლამენტის შესასვლელი გახსნა (თუნდაც, ნაწილობრივ), ხოლო ეროვნულმა სასამართლომ არც კი შეაფასა, იყო თუ არა გზის სავალ ნაწილზე მისი გადასვლის მიზეზი დემონსტრანტთა რაოდენობა, შესაბამისად, რამდენად კანონიერი იყო პოლიციის მოთხოვნა (პარ. 104-106).

²⁵⁹ ადამიანის უფლებათა ევროპული სასამართლოს 2022 წლის 1-ლი სექტემბრის გადაწყვეტილება საქმეზე „მაქარაშვილი და სხვები საქართველოს წინააღმდეგ“ (CASE OF MAKARASHVILI AND OTHERS v. GEORGIA), 23158/20, 31365/20, 32525/20, პარ. 14-16, 27.

ნციის სასამართლოს განმარტებით, პოლიციელების ჩვენება სანდოობის მაღალი ხარისხით ხასიათდებოდა, რადგან არსებობდა ე.წ. „კეთილსინდისიერი მმართველობის პრეზუმფცია“, მაშინ, როდესაც მომჩივანთა მიზანი იყო პასუხისმგებლობის თავიდან არიდება, შესაბამისად, მათი ჩვენებები არასანდოდ უნდა შეფასებულიყო, თუკი არ დადასტურდებოდა დამატებითი მტკიცებულებებით.²⁶⁰ ვინაიდან მეორე მომჩივანთან მიმართებით პოლიციელის განცხადება სხვა სახის მტკიცებულებით არ იყო გამყარებული, მას მოუწია საკუთარი უდანაშაულობის მტკიცება.²⁶¹ ასევე, ევროპული სასამართლოს შეფასებით, სააპელაციო სასამართლომ სათანადოდ არ გადახედა პირველი ინსტანციის მიდგომას.²⁶²

III. საქმეები, რომლებშიც მართლმსაჯულების ხარვეზებმა გამოიწვია ადამიანის უფლებების სხვა მნიშვნელოვანი დარღვევები

წინამდებარე ქვეთავში განხილულ 11 საქმეში, მართალია, არ დადგენილა კონვენციის მე-6 მუხლის დარღვევა, თუმცა დადგინდა სხვა მუხლებით დაცული უფლებების დარღვევა, რაც თავისი არსით დაკავშირებული იყო ეროვნულ დონეზე სასამართლოს პრობლემებთან.

(38) ენუქიძე და გირგვლიანი საქართველოს წინააღმდეგ (2011)

საქმის დასახელება/ნომერი	ენუქიძე და გირგვლიანი საქართველოს წინააღმდეგ, 25091/07
საჩივრის წარდგენის თარიღი	11 ივნისი, 2007 წელი 17 მარტი, 2008 წელი
გადაწყვეტილების თარიღი	26 აპრილი, 2011 წელი
მომჩივნები	ირინა ენუქიძე გურამ გირგვლიანი
ადამიანის უფლებათა ევროპული კონვენციის დარღვეული უფლება	მე-2 მუხლი
სამართლიანი დაკმაყოფილება	ზიანი - 50 000 EUR ხარჯები და დანახარჯები - 388 EUR

ეს საქმე ეხება მკვლელობის არაეფექტიან გამოძიებას და სახელმწიფო ინსტიტუციების, მათ შორის, სასამართლოების მიერ მართლმსაჯულების განხორციელებაში ხელშეშლას.²⁶³ 2006 წლის 28 იანვარს იპოვეს მომჩივანთა შვილის - სანდრო გირგვლიანის გვამი,²⁶⁴ ხოლო 2006 წლის 20 ივნისს საქართველოს შინაგან საქმეთა სამინისტროს 4 თანამშრომელს ბრალი წარედგინა სიცოცხლის მოსპობის გამომწვევი სხეულის განზრახ დაზიანების, წინასწარ შეთანხმებით ჯგუფის მიერ თავისუფლების უკანონოდ აღკვეთისა და სხვისი ნივთის დაზიანებისა და განადგურებისთვის.²⁶⁵

²⁶⁰ იქვე, პარ. 23.

²⁶¹ იქვე, პარ. 64.

²⁶² იქვე.

²⁶³ ადამიანის უფლებათა ევროპული სასამართლოს 2011 წლის 26 აპრილის გადაწყვეტილება საქმეზე „ენუქიძე და გირგვლიანი საქართველოს წინააღმდეგ“ (CASE OF ENUKIDZE AND GIRGVLIANI v. GEORGIA), 25091/07, პარ. 276.

²⁶⁴ იქვე, პარ. 19.

²⁶⁵ იქვე, პარ. 145. აღსანიშნავია, რომ 2006 წლის 6 ივლისს თბილისის საქალაქო სასამართლომ, სსკ-ის 119-ე მუხლის გაუქმების გამო, სსკ-ის 117-ე მუხლის მე-6 ნაწილით მისცა კლასიფიკაცია. შესაბამისად, სიცოცხლის მოსპობის გამომწვევი სხეულის განზრახ დაზიანებიდან საქმე გადაკვალიფიცირდა სხეულის განზრახ მძიმე დაზიანებად, რომელსაც სიცოცხლის მოსპობა მოჰყვა (იხ. იქვე, პარ. 171).

ეროვნულ სასამართლოსთან მიმართებით ადამიანის უფლებათა ევროპულმა სასამართლომ დაადგინა შემდეგი დარღვევები:

უარი დაზარალებულისთვის მასალების შესასწავლად საკმარისი დროისა და საშუალებების მიცემაზე

ეროვნულ დონეზე სამართალწარმოების მთავარი ხარვეზი იყო სასამართლოების სისტემატური უარი, მომჩივნისთვის მიეცათ საკმარისი დრო და საშუალება საქმის მასალების შესასწავლად. ამგვარად, მომჩივნებს წაერთვათ უფლება, ჯეროვნად მომზადებულიყვნენ სასამართლო პროცესისთვის და მასში ეფექტიანი მონაწილეობა მიეღოთ.²⁶⁶ პირველი ინსტანციის სასამართლოში საქმის განხილვა 9 დღის განმავლობაში მიმდინარეობდა. ევროპული სასამართლოს შეფასებით, თითქმის შეუძლებელია ამ პერიოდში დაზარალებულთა, თუნდაც მოსამართლეთა, მიერ საქმის მოცულობითი მასალების შესწავლა.²⁶⁷ საზგასამართლო, რომ მომჩივნებს არ მისცეს საშუალება, გასცნობოდნენ 14 მტკიცებულებას. მეტიც, ეს მტკიცებულებები დედნის სახით სასამართლო სხდომაზე არ გამოქვეყნებულა და ჯეროვნად, შეჯიბრებითობის პრინციპის დაცვით არ გამოკვლევულა.²⁶⁸ ამასთანავე, სასამართლომ უგულებელყო მომჩივნათა არაერთი შუამდგომლობა საქმესთან პირდაპირ დაკავშირებული მტკიცებულებების მოპოვების შესახებ.²⁶⁹

გადაწყვეტილების დაუსაბუთებლობა

ევროპული სასამართლოს თანახმად, გამოვლინდა არაერთი საექვო გარემოება, რომელთა ჯეროვნად შეფასება ეროვნული სასამართლოების მხრიდან სანდრო გირგვლიანის საქმეს ჭეშმარიტებას მოჰყენდა.²⁷⁰ შესაბამისად, მომჩივნებს არა მხოლოდ შეეზღუდათ უფლება, მონაწილეობა მიეღოთ სასამართლო პროცესში, არამედ, ევროპული სასამართლოს შეფასებით, სახელმწიფოს სურვილიც კი არ ჰქონდა, დაედგინა სანდრო გირგვლიანის გატაცებისა და სიკვდილის გარემოებები.²⁷¹

დამნაშავეთათვის მსუბუქი სასჯელის შეფარდება

მამინ, როდესაც ეროვნულმა სასამართლომ არ უნდა დაუშვას სიცოცხლისთვის საშიში დანაშაულების დაუსჯელობა,²⁷² გირგვლიანის საქმეზე დამნაშავედ ცნობილ პირებს სასჯელის სახით 7-8 წლით თავისუფლების აღკვეთა შეეფარდათ.²⁷³ ეს

²⁶⁶ იქვე, პარ. 259.

²⁶⁷ იქვე.

²⁶⁸ იქვე.

²⁶⁹ იქვე, პარ. 261.

²⁷⁰ იქვე, პარ. 263.

²⁷¹ იქვე, პარ. 267.

²⁷² იქვე, პარ. 242.

²⁷³ იქვე, პარ. 172. ნიშანდობლივია, რომ 15 დღის განმავლობაში ბრალდებულები განთავსებულნი იყვნენ ერთ საკანში, რაც მათ ჩვენებების შეთანხმების საშუალებას აძლევდა (იხ. იქვე, პარ. 235). თბილისის საქალაქო სასამართლომ დამნაშავედ ცნო 4 ადამიანი, რომელთაგან ერთს სასჯელის სახით განესაზღვრა 8 წლით, ხოლო დანარჩენ სამს 7 წლით თავისუფლების აღკვეთა (იხ. იქვე, პარ. 172). სააპელაციო სასამართლომ სრულიად გაიზიარა პირველი ინსტანციის სასამართლოს განაჩენი (იხ. იქვე, პარ. 183), ხოლო უზენაესმა სასამართლომ დაადგინა, რომ სხვისი ნივთის განადგურების ნაწილში პირთა დამნაშავედ ცნობა სათანადოდ დასაბუთებული არ იყო. ამიტომ, ამ ნაწილში მსჯავრდებულები გამართლდა და თითოეულს სასჯელის ვადა 6 თვით შემცირა (იხ. იქვე, პარ. 191). 2008 წლის 24 ნოემბერს საქართველოს პრეზიდენტმა შეიწყალა სანდრო გირგვლიანის საქმის მსჯავრდებულები და მათი სასჯელის მოუხდელი ნაწილი გაანაჩევრა. 2009 წლის 5 სექტემბერს თბილისის საქალაქო სასამართლომ მიიღო გადაწყვეტილება ოთხი მსჯავრდებულის პირობით ვადაზე გათავისუფლების შესახებ. სასამართლომ აღნიშნა, რომ ამ პირებმა მოიხადეს სასჯელის 2/3, გაითვალისწინა მათი კარგი ყოფაქცევა. შესაბამისად, სასჯელის მთლიანად მოხდა საჭირო აღარ იყო მათი გამოსწორებისთვის (იხ. იქვე, პარ. 204-205). ამგვარად, „ევროპული სასამართლო გოცმებულია სახელმწიფო ხელისუფლების სხვადასხვა განმტოების – შინაგან საქმეთა სამინისტროს გამოძიების თავდაპირველი

ფაქტი გაკრიტიკებულია ევროპის სასამართლოს მიერ, რომლის განმარტებით, სასჯელის შეფარდებისას ეროვნულმა სასამართლოებმა არ გაითვალისწინეს აშკარად დამამძიმებელი გარემოება - სახელმწიფოს წარმომადგენლების მიერ მსხვერპლის მიმართ სრულიად შეგნებულად ჩადენილი დამამცირებელი და განსაკუთრებით სასტიკი მოპყრობა.²⁷⁴

(39) მიქიაშვილი საქართველოს წინააღმდეგ (2012)

საქმის დასახელება/ნომერი	მიქიაშვილი საქართველოს წინააღმდეგ, 18996/06
საჩივრის წარდგენის თარიღი	29 აპრილი, 2006 წელი
გადაწყვეტილების თარიღი	9 ოქტომბერი, 2012 წელი
მომჩივანი	გიორგი მიქიაშვილი
ადამიანის უფლებათა ევროპული კონვენციის დარღვეული უფლება	მე-3 მუხლი
სამართლიანი დაკმაყოფილება	ზიანი - 12 000 EUR

ეს საქმე შეეხება პოლიციის მხრიდან არასათანადო მოპყრობას და ამ ფაქტის არა-ეფექტიან გამოძიებას, მათ შორის, ეროვნული სასამართლოს მიერ მტკიცებულებების არაერთგვაროვან შეფასებას. 2005 წლის 29 ოქტომბერს პოლიციამ მომჩივანი პოლიციელებისთვის წინააღმდეგობის გაწევის გამო დააკავა.²⁷⁵ დაკავებას თან ახლდა პოლიციის მხრიდან მომჩივანზე გადამეტებული ფიზიკური ძალადობა,²⁷⁶ რაც გაგრძელდა დაკავების შემდეგაც - დროებითი მოთავსების იზოლატორსა²⁷⁷ და ციხეში.²⁷⁸ ეროვნული სასამართლოები დაეყრდნენ ინციდენტში მონაწილე პოლიციელთა ჩვენებებს, არ გაითვალისწინეს მათი სუბიექტურობა და მიზანი, აეცილებინათ სისხლის სამართლის პასუხისმგებლობა მომჩივნის მიმართ სავარაუდო არასათანადო მოპყრობის გამო. ამის საპირწონედ, ეროვნულმა სასამართლომ სანდოდ არ მიიჩნია გიორგი მიქიაშვილის განცხადება, ვინაიდან შეიცავდა მომჩივნის პირად აზრსა და ბრალდებებს. აქედან გამომდინარე, ევროპული სასამართლოს შეფასებით, კითხვის ნიშნის ქვეშ უნდა ყოფილიყო პოლიციელთა ჩვენება და დამდგარიყო მათი პასუხისმგებლობის საკითხი, რაც არ მოხდა.²⁷⁹

(40) დვალიშვილი საქართველოს წინააღმდეგ (2012)

საქმის დასახელება/ნომერი	დვალიშვილი საქართველოს წინააღმდეგ, 19634/07
საჩივრის წარდგენის თარიღი	6 აპრილი, 2007 წელი
გადაწყვეტილების თარიღი	18 დეკემბერი, 2012 წელი
მომჩივანი	რევაზ დვალიშვილი

წარუმატებლობიდან გამომდინარე, სასჯელადსრულების დეპარტამენტის მიერ მსჯავრდებულების იმავე საკანში არაკანონიერად განთავსებით, ადგილობრივი სასამართლოების მიერ პროცესების არასწორად წარმართვითა და მსჯავრდებულების ადრე გამოშვებით, საქართველოს პრეზიდენტის მიერ მსჯავრდებულების მიმართ გაუმართლებელი ღმობიერების გამოჩენით – შეთანხმებულად მოქმედებით, რაც ამ მკვლელობის საქმეზე მართლმსაჯულების განხორციელების ხელის შეშლისკენაა მიმართული“ (იხ. იქვე, 276).

²⁷⁴ იქვე, პარ. 272.

²⁷⁵ ადამიანის უფლებათა ევროპული სასამართლოს 2012 წლის 9 აპრილის გადაწყვეტილება საქმეზე „მიქიაშვილი საქართველოს წინააღმდეგ“ (CASE OF MIKIASHVILI v. GEORGIA), 18996/06, პარ. 5, 7.

²⁷⁶ იქვე, პარ. 77.

²⁷⁷ იქვე, პარ. 24.

²⁷⁸ იქვე, პარ. 45.

²⁷⁹ იქვე, პარ. 82.

ადამიანის უფლებათა ევროპული კონვენციის დარღვეული უფლება	მე-3 მუხლი
სამართლიანი დაკმაყოფილება	ზიანი - 12 000 EUR

ეს საქმე ეხება 2005 წელს პოლიციელების მხრიდან მომჩივნის მიმართ განხორციელებულ არასათანადო მოპყრობას.²⁸⁰ დაკავებიდან მეორე დღეს მომჩივანს ჩაუტარდა სამედიცინო შემოწმება, რა დროსაც დადგინდა, რომ მას ჰქონდა დაზიანებები. ამასთან დაკავშირებით მომჩივანმა განაცხადა, რომ დაკავებისას ის წაიქცა, ასევე, მან აღიარა დანაშაულის ჩადენა.²⁸¹ ეროვნულმა სასამართლოებმა მომჩივანი დამნაშავედ ცნეს საზოგადოებრივი წესრიგის უხეში დარღვევისთვის და დაადგინეს, რომ არ არსებობდა მის მიმართ არასათანადო მოპყრობის დამადასტურებელი მტკიცებულება.²⁸² ევროპული სასამართლო ხაზს უსვამს, რომ ეროვნული სასამართლოების გადაწყვეტილებები, ძირითადად, ეფუძნება ინციდენტში მონაწილე პოლიციელთა ჩვენებებს, მომჩივნის აღიარებით ჩვენებასა და მომჩივნის წინააღმდეგ სისხლის სამართალწარმოების დროს ჩატარებული წინასწარი გამოძიების შედეგებს. სასამართლოსთვის გაუგებარია, რომ პასუხისმგებელი ორგანოები, არასათანადო მოპყრობის შესახებ მომჩივნის ბრალდებების შემოწმების ნაცვლად, დაეყრდნენ მის აღიარებით ჩვენებას, რომელიც, როგორც მომჩივანმა განაცხადა, ფიზიკური ზეწოლის ქვეშ მისცა. ამასთანავე, პროკურატურამ და სასამართლოებმა, ყოველგვარი დამაჯერებელი არგუმენტების გარეშე, მხედველობაში მიიღეს პოლიციელთა ჩვენებები, მიუხედავად იმისა, რომ, შესაძლოა, ეს ჩვენებები იყო სუბიექტური და მიზნად ისახავდა სისხლის სამართლის პასუხისმგებლობისგან თავის არიდებას. მეტიც, ევროპული სასამართლო აღნიშნავს, რომ პოლიციელთა ჩვენებების სანდოობა უნდა დამდგარიყო კითხვის ნიშნის ქვეშ, ვინაიდან გამოძიებას უნდა დაედგინა მათი დისციპლინური თუ სისხლისსამართლებრივი პასუხისმგებლობის საკითხი.²⁸³

(41) A და B საქართველოს წინააღმდეგ (2022)

საქმის დასახელება/ნომერი	A და B საქართველოს წინააღმდეგ, 73975/16
საჩივრის წარდგენის თარიღი	16 სექტემბერი, 2016 წელი
გადაწყვეტილების თარიღი	10 თებერვალი, 2022 წელი
მომჩივნები	A (პირველი მომჩივანი) B (მეორე მომჩივანი)
ადამიანის უფლებათა ევროპული კონვენციის დარღვეული უფლებები	მე-2 მუხლი, მე-14 მუხლთან ერთობლიობაში
სამართლიანი დაკმაყოფილება	ზიანი - 35 000 EUR

ეს საქმე ეხება ოჯახში ძალადობას, კონკრეტულად, პოლიციელის (D) მიერ მისი პარტნიორის (A-ის შვილისა და B-ის დედის) მიმართ სისტემატურ ძალადობას²⁸⁴ და

²⁸⁰ ადამიანის უფლებათა ევროპული სასამართლოს 2012 წლის 18 დეკემბრის გადაწყვეტილება საქმეზე „დვალიშვილი საქართველოს წინააღმდეგ“ (CASE OF DVALISHVILI v. GEORGIA), 19634/07, პარ. 5.

²⁸¹ იქვე, პარ. 6.

²⁸² იქვე, პარ. 14-16.

²⁸³ იქვე, პარ. 50.

²⁸⁴ 2011 წელს 22 წლის პოლიციელმა D-მ, დაქორწინების მიზნით, მოიტაცა 17 წლის C (მომჩივნების ნათესავი). ვინაიდან C იყო მუდმივი საფრთხის ქვეშ, მან დაიწყო D-სთან თანაცხოვრება. იმავე წლიდან C და მისი ოჯახის წევრები გახდნენ D-ის მხრიდან რეგულარული სიტყვიერი და ფიზიკური შეურაცხყოფის სამიზნეები. ის იმუქრებოდა, რომ მოკლავდა C-ს და მის მშობლებს, მიუთითებდა პოლიციელის სტატუსზე, რომ ჰქონდა ძლიერი კავშირები პოლიციაში. ამიტომ, ძირითადად, C-ს ოჯახის წევრებს უმინოდათ ინციდენტების შესახებ პოლიციაში განცხადება, თუმცა მაინც მოახერხეს და რამდენიმე ყველაზე ძალადობრივი შემთხვევის შესახებ განაცხადეს. ადამიანის უფლებათა ევროპული

მკვლელობას,²⁸⁵ რაც განაპირობა სამართალდამცავი ორგანოების პასიურმა და შემგუებლურმა დამოკიდებულებამ.²⁸⁶ ქუთაისის საქალაქო სასამართლომ D დამნაშავედ ცნო ოჯახის წევრის განზრახ მკვლელობისთვის და 11 წლით თავისუფლების აღკვეთა მიუსაჯა. მართალია, ეროვნულმა სასამართლოებმა აღიარეს სამართალდამცავი ორგანოების წარუმატებლობა გენდერული ნიშნით დისკრიმინაციის აღკვეთისა და C-ის სიცოცხლის დასაცავად ზომების მიღების კუთხით, თუმცა ევროპული სასამართლო აღნიშნავს, რომ სასამართლოში საქმის განხილვა და გადაწყვეტილება არ მოიცავდა რაიმე გამოკვლევას დანაშაულის ჩადენაში გენდერული ნიშნით დისკრიმინაციის შესაძლო როლის შესახებ. ეროვნულ სასამართლოებს ფართოდ არ შეუსწავლიათ, იყო თუ არა გენდერული სიძულვილი ოჯახში ძალადობის განმაპირობებელი. ასევე, სასამართლოებს არ განუხილავთ, იყო თუ არა სამართალდამცავი ორგანოების შესაბამისი თანამშრომლების მხრიდან უსიტყვო ან ფარული თანხმობის ნიშნები მათი კოლეგის, D-ის მიერ გენდერული მოტივით ჩადენილ ძალადობაში.²⁸⁷ გარდა ამისა, ევროპულმა სასამართლომ აღნიშნა, რომ სამართალდამცავი ორგანოების მიმართ მომჩივნების სამოქალაქო სამართალწარმოებისას შეთავაზებული ზიანის ანაზღაურება იყო არასაკმარისი.²⁸⁸ შესაბამისად, ევროპული სასამართლოს შეფასებით, ეროვნული სასამართლოების ზემოთ ხსენებული ხარვეზები არ შეესაბამება სახელმწიფოს ვალდებულებას, აღკვეთოს სიძულვილით მოტივირებული დანაშაულები.²⁸⁹

(42) ფერაძე და სხვები საქართველოს წინააღმდეგ (2022)

საქმის დასახელება/ნომერი	ფერაძე და სხვები საქართველოს წინააღმდეგ, 5631/16
საჩივრის წარდგენის თარიღი	12 იანვარი, 2016 წელი
გადაწყვეტილების თარიღი	15 დეკემბერი, 2022 წელი
მომჩივნები	ნატალია ფერაძე გიორგი მაქარაშვილი ელენე მალაშევსკი-ჯაყელი კონსტანტინე ჩაჩანიძე ვახტანგ ქარელი ანა მამულაშვილი ირაკლი მგალობლიშვილი
ადამიანის უფლებათა ევროპული კონვენციის დარღვეული უფლება	მე-11 მუხლი, მე-10 მუხლის გათვალისწინებით
სამართლიანი დაკმაყოფილება	ზიანი - 1 040 EUR (თითოეულს)

სასამართლოს 2022 წლის 10 თებერვლის გადაწყვეტილება საქმეზე „A და B საქართველოს წინააღმდეგ“ (CASE OF A. AND B. v. GEORGIA), 73975/16, პარ. 6, 8.

²⁸⁵ 2014 წლის 25 ივლისს D აედევნა C-ს ქუჩაში. მოულოდნელად D-მ ამოიღო თავისი ტაბელური იარაღი და ახლო მანძილიდან 5-ჯერ ესროლა C-ს. იქვე, პარ. 16-17.

²⁸⁶ C-მ რამდენჯერმე მიმართა პოლიციას, თუმცა - უშედეგოდ. პოლიცია ან არ რეაგირებდა, ან კიდევ C-ს უხსნიდნენ, რომ ცოლის ცემა ჩვეულებრივი მოვლენა იყო და ამისთვის დიდი მნიშვნელობის მინიჭება არ ღირდა. იქვე, პარ. 9-10.

2013 წლის 9 სექტემბერს D-მ პროკურატურის წინაშე დადო წერილობითი ვალდებულება, რომ ის აღარასოდეს მიაყენებდა სიტყვიერ ან ფიზიკურ შეურაცხყოფას C-ს ან მისი ოჯახის წევრებს. პროკურატურა ამით დაკმაყოფილდა და არ დაიწყო სისხლის სამართლის გამოძიება, თუმცა D აგრძელებდა C-ს შეურაცხყოფას. იქვე, პარ. 11-12.

²⁸⁷ იქვე, პარ. 45.

²⁸⁸ იქვე.

²⁸⁹ იქვე.

ეს საქმე ეხება საპროტესტო ბანერის გამო მომჩივნების დაკავებას და მათთვის პასუხისმგებლობის დაკისრებას. 2015 წლის 19 ივლისს საჯარო მანიფესტაციისას დააკავეს შვიდივე მომჩივანი და დააკისრეს ადმინისტრაციული სამართალდარღვევის კოდექსით გათვალისწინებული სანქცია წვრილმანი ხულიგნობისთვის.²⁹⁰ ევროპული სასამართლოს შეფასებით, ეროვნულმა სასამართლოებმა არ განიხილეს მომჩივანთა ქცევით გამოწვეული საზოგადოებრივი ცხოვრების დარღვევის დონე. ასევე, არ იმსჯელეს დაკავების წინმსწრებ ვიდეოჩანაწერებზე, რომლებშიც ჩანდა, რომ მომჩივანთა პროტესტი იყო მშვიდობიანი და პასიური.²⁹¹ გარდა ამისა, ეროვნული სასამართლოები ფოკუსირდნენ მხოლოდ ფორმაზე და გამიჯნეს სადავო განცხადების ვულგარული ხასიათი კონტექსტისა და აშკარა მიზნისგან. ამით მათ არ აღიარეს, რომ ევროპული კონვენციის მე-10 მუხლი (გამოხატვის თავისუფლება) გამოიყენება არა მხოლოდ იმ ინფორმაციის ან იდეების მიმართ, რომლებიც აღიქმება დადებითად, ან მიიჩნევა, როგორც უწყინარი ან უმნიშვნელო, არამედ ისეთი ინფორმაციის ან იდეების მიმართაც, რომლებიც შეურაცხმყოფელი, შოკისმომგვრელი ან შემაწუხებელია სახელმწიფოსა ან მოსახლეობის რომელიმე სექტორისთვის.²⁹² ევროპული სასამართლოს შეფასებით, მომჩივანთა მიერ უხამსი სიტყვის გამოყენება უკმაყოფილების გამოხატვის სტილისტური ინსტრუმენტია. საზოგადოებრივი ინტერესის საკითხზე აზრის გამოსახატად მათ მიერ არჩეული სადავო ფორმა კი, თავისთავად, ვერ ჩაითვლება საკმარისად საჯარო მანიფესტაციაზე სიტყვის შესაზღუდად, რამეთუ მიზანი საზოგადოებრივი ინტერესის საკითხისადმი ყურადღების მიქცევაა და პროვოკაციული ენა ხელს უწყობს დებატებს ამ თემაზე.²⁹³

(43) უგულავა საქართველოს წინააღმდეგ (2023)

საქმის დასახელება/ნომერი	უგულავა საქართველოს წინააღმდეგ, 5432/15
საჩივრის წარდგენის თარიღი	27 დეკემბერი, 2014 წელი
გადაწყვეტილების თარიღი	9 თებერვალი, 2023 წელი
მომჩივანი	გიორგი უგულავა
ადამიანის უფლებათა ევროპული კონვენციის დარღვეული უფლება	მე-5 მუხლის 1-ლი და მე-3 პუნქტები
სამართლიანი დაკმაყოფილება	ზიანი - 10 000 EUR

ეს საქმე შეეხება მომჩივნის მიმართ აღკვეთის ღონისძიების სახით პატიმრობის შეფარდების დასაბუთების, კანონიერების საკითხებს, პატიმრობის დაუსაბუთებელ/უკანონო განანგრძობას. სახელმწიფოს არგუმენტით, პატიმრობის 9-თვიანი ვადის ამოწურვის შემდგომ ხელახალი პატიმრობის შესახებ განჩინება აუცილებელი გახდა იმ პერიოდში მიღებული სხვადასხვა საგამოძიებო მოქმედების განხორციე-

²⁹⁰ ადამიანის უფლებათა ევროპული სასამართლოს 2022 წლის 15 დეკემბრის გადაწყვეტილება საქმეზე „ფერაძე და სხვები საქართველოს წინააღმდეგ“ (CASE OF PERADZE AND OTHERS v. GEORGIA), 5631/16.

²⁹¹ 2015 წლის 19 ივლისს ქ. თბილისის მერიის წინ მომჩივნებმა და მათმა თანამოაზრეებმა მოაწყვეს „პანორამა თბილისის“ მშენებლობის საპროტესტო აქცია, სადაც დააკავეს ერთ-ერთი მომჩივანი, რომელსაც ეჭირა ბანერი წარწერით „პანორამა არა, ყლე!“ . სოლიდარობის ნიშნად, სხვა მომჩივნებმაც დააწერეს ბანერს ეს სიტყვები, რის შემდეგაც ისინიც დააკავეს (იხ. იქვე, პარ. 8-14). 2015 წლის 23 ივლისის გადაწყვეტილებით, თბილისის საქალაქო სასამართლომ შვიდივე მომჩივანი დამნაშავედ ცნო უწყსრიგო ქმედებების გამო, რაც გამოიხატებოდა იმაში, რომ ისინი იდგნენ ჩუმად და ხელში ეჭირათ შემოადინებული უხამსლოზუნგიანი ბანერები, ხოლო სააპელაციო სასამართლომ სრულად უცვლელად დატოვა პირველი ინსტანციის სასამართლოს დასაბუთება (იქვე, პარ. 20, 22).

²⁹² იქვე, პარ. 43. კონკრეტულად, მომჩივნებს წყნარად ეჭირათ იმპროვიზებული ბანერები, არ ავლენდნენ აგრესიას პოლიციელების ან გამველელების მიმართ.

²⁹³ იქვე, პარ. 45.

²⁹⁴ იქვე.

ლების გამო, რამაც 2015 წლის 13 მარტს მომჩივნისთვის შეცვლილი ბრალდების წაყენება განაპირობა. თუმცა, ევროპული სასამართლოს შეფასებით, ეს გარემოება არ გამოძინარეობს თბილისის საქალაქო და სააპელაციო სასამართლოების 2015 წლის 15 და 20 მარტს მიღებული გადაწყვეტილებებიდან.²⁹⁴ ევროპული სასამართლოს განმარტებით, ეროვნულ სასამართლოებს არ უმსჯელიათ, იყო თუ არა ახალი პატიმრობის შესახებ განჩინების მიღება გამოწვეული სისხლის სამართლის გამოძიებისას გამოვლენილი გარემოებებით.²⁹⁵ მეტიც, სასამართლოებმა არ იმსჯელეს მომჩივნის არგუმენტებზე, რომ არ არსებობდა პატიმრობის საჭიროება, არც იმაზე, თუ რა იდო სასწორზე, როდესაც კონსტიტუციით დადგენილი წინასწარი პატიმრობის 9-თვიან ვადას და ფაქტო ახანგრძლივებდნენ.²⁹⁶ საქმეში არსებული გარემოებების მხედველობაში მიღებით, ეროვნულ სასამართლოები ვალდებული იყვნენ, წინასწარი პატიმრობის შესახებ გადაწყვეტილების მიღებამდე განესაზღვრათ პატიმრობაში ყოფნის საჭიროება, რაც მათ არ გაუკეთებიათ.²⁹⁷

(44) ოჩიგავა საქართველოს წინააღმდეგ (2023)

საქმის დასახელება/ნომერი	ოჩიგავა საქართველოს წინააღმდეგ, 14142/15
საჩივრის წარდგენის თარიღი	11 მარტი, 2015 წელი
გადაწყვეტილების თარიღი	16 თებერვალი, 2023 წელი
მომჩივანი	აკაკი ოჩიგავა
ადამიანის უფლებათა ევროპული კონვენციის დარღვეული უფლება	მე-3 მუხლი
სამართლიანი დაკმაყოფილება	ზიანი - 20 000 EUR

ეს საქმე ეხება ციხეში მომჩივნის მიმართ არაერთგზის არასათანადო მოპყრობას და ამ ფაქტების არაეფექტიან გამოძიებას. 2011 წლის 2 ივნისს მომჩივანი აკაკი ოჩიგავა დააკავეს.²⁹⁸ გლდანის ციხეში ყოფნისას, კონკრეტულად, 2011 წლის ივნისიდან 2012 წლის აგვისტომდე პერიოდში, ასევე, 2012 წლის 29 ოქტომბერსა და 5 დეკემბერს მომჩივანი იყო 11 პირის მხრიდან არასათანადო მოპყრობის მსხვერპლი.²⁹⁹ ფიზიკური ძალადობის შედეგად, აკაკი ოჩიგავამ მიიღო ხერხემლის მძიმე ტრავმა.³⁰⁰ 2012 წლის ნოემბერში ჩატარებულმა სამედიცინო გამოკვლევებმა დაადასტურა, რომ მომჩივანი იყო ინფიცირებული C ჰეპატიტით (HCV), ჰქონდა ღვიძლის ციროზი და მრავალი მოტეხილობისგან მისი თითები იყო დეფორმირებული.³⁰¹ 2018 წლის 6 თებერვალს თბილისის საქალაქო სასამართლომ გლდანის ციხის 7 ოფიცერი და მნაშავედ ცნო პატიმართა მიმართ სისტემატური არასათანადო მოპყრობისთვის.³⁰²

²⁹⁴ ევროპული სასამართლოს 2023 წლის 9 თებერვლის გადაწყვეტილება საქმეზე „უგულავა საქართველოს წინააღმდეგ“ (UGULAVA v. GEORGIA), 5432/15, პარ. 82.

²⁹⁵ იქვე.

²⁹⁶ იქვე.

²⁹⁷ იქვე.

²⁹⁸ ადამიანის უფლებათა ევროპული სასამართლოს 2023 წლის 16 თებერვლის განჩინება საქმეზე „ოჩიგავა საქართველოს წინააღმდეგ“ (CASE OF OCHIGAVA v. Georgia), 14142/15, პარ. 5

²⁹⁹ იქვე, პარ. 10.

³⁰⁰ იქვე, პარ. 19.

³⁰¹ იქვე, პარ. 20.

³⁰² იქვე, პარ. 34.

თბილისის საქალაქო სასამართლომ დაადგინა, რომ მომჩივნებთან მიმართებით გამოვლინდა არასათანადო მოპყრობის 5 ფაქტი: 1. 2011 წლის ივნისში, ე.წ. „საკრანტინო პროცედურის“ დროს, შვილმა ციხის ოფიცერმა მომჩივანს სცემა რეზინის ხელკეტებით, რის შედეგადაც, მომჩივანს გაუტეხეს წინა კბილები და ნეკნები; 2. 2011 წლის ნოემბრის შუა რიცხვებში ორმა ციხის ოფიცერმა მომჩივანს

მათ 3-9 წლამდე თავისუფლების აღკვეთა მიესაჯათ.³⁰³ 2015 წლის 18 ნოემბერს მომჩივანმა სამოქალაქო სარჩელით მიმართა თბილისის საქალაქო სასამართლოს და იმ დროს მოქმედი სასჯელაღსრულებისა და პრობაციის სამინისტროსგან ზიანის ანაზღაურება მოითხოვა.³⁰⁴ თბილისის საქალაქო სასამართლოს შეფასებით, მიუხედავად იმისა, რომ აკაკი ოჩიგავას სამედიცინო საქმით დასტურდებოდა ციხეში მისი ჯანმრთელობის მდგომარეობის გაუარესება, მომჩივანმა ვერ დაასაბუთა, რომ ეს იყო ციხის ადმინისტრაციის წარმომადგენლების უკანონო ქმედების შედეგი.³⁰⁵ მომჩივანმა პირველი ინსტანციის სასამართლოს გადაწყვეტილება სააპელაციო და საკასაციო სასამართლოებში გაასაჩივრა, თუმცა - უშედეგოდ.³⁰⁶

ევროპული სასამართლო განსაკუთრებულ მნიშვნელობას ანიჭებს იმ ფაქტს, რომ ევროპული სამოქალაქო სამართალწარმოებისას აკაკი ოჩიგავამ ვერ მიიღო კომპენსაცია. ევროპული სასამართლოს შეფასებით, მიუხედავად იმისა, რომ მომჩივნის მიმართ არასათანადო მოპყრობის გამო მსჯავრი დაედო 7 პირს, პროცესუალურად ხარვეზიანი³⁰⁷ სისხლის სამართლის საქმის წარმოების შედეგები ვერ ჩაითვლება მომჩივნისთვის საკმარის მაკომპენსირებელ ღონისძიებად.³⁰⁸

(45) ჩხარტიშვილი საქართველოს წინააღმდეგ (2023)

საქმის დასახელება/ნომერი	ჩხარტიშვილი საქართველოს წინააღმდეგ, 31349/20
საჩივრის წარდგენის თარიღი	19 ივნისი, 2020 წელი
გადაწყვეტილების თარიღი	11 მაისი, 2023 წელი
მომჩივანი	ლაშა ჩხარტიშვილი
ადამიანის უფლებათა ევროპული კონვენციის დარღვეული უფლება	მე-11 მუხლი, მე-10 მუხლის გათვალისწინებით
სამართლიანი დაკმაყოფილება	ზიანი - 1 200 EUR

ხელებში ჩაარტყეს ბეისბოლის კეტი, რის გამოც, ამ უკანასკნელმა მოიტყუა თითები ორივე ხელზე; 3-2011 წლის დეკემბრის დასაწყისში შვიდმა ციხის ოფიცერმა კვლავ სასტიკად სცემა მომჩივანს; 4. 2011 წლის აგვისტოში სამმა ციხის ოფიცერმა სცემა მომჩივანს; 5. 2011 წლის სექტემბერში, საკანში ხმადალი საუბრის გამო, ციხის ორმა ოფიცერმა მომჩივანი დასაჯა - სამხაპე ოთახში მისი გამოშვლებით, ხელკეტებითა და წიხლებით ცემით (იხ. იქვე, პარ. 35).

³⁰³ იქვე, პარ. 36.

³⁰⁴ იქვე, პარ. 37.

³⁰⁵ იქვე, პარ. 38.

³⁰⁶ იქვე, პარ. 39.

³⁰⁷ ევროპული სასამართლოს შეფასებით, აკაკი ოჩიგავას საქმესთან დაკავშირებით განხორციელებული მართლმსაჯულება იყო გაჭიანურებული. მომჩივანს დაზარალებულის სტატუსი მიენიჭა 2017 წელს, რომლის გარეშეც მას არ ჰქონდა უფლება, მიეღო ინფორმაცია მიმდინარე გამოძიების შესახებ (იქვე, პარ. 33, 29). 2012-2016 წლებში გამოიკვეთა აუხსნელი უმოქმედობა საგამოძიებო ორგანოების მხრიდან და კომპეტენტურ ორგანოებს დასჭირდათ 5 წელზე მეტი დრო, რათა დაედგინათ დამნაშავეები და შეეფარდებინათ მათთვის შესაბამისი სასჯელი (იხ. იქვე, პარ. 58). მიუხედავად იმისა, რომ ციხის ოფიცერებს სასჯელის სახით თავისუფლების აღკვეთა შეეფარდათ, არ იყო გამოძიებული სხვა მნიშვნელოვანი ინციდენტები: მომჩივნის სავარაუდო ცემა 2011 წლის ნოემბრის დასაწყისში; მომჩივნის ცემა სამხაპე ოთახში, რომლის შედეგადაც, მას წაუვიდა გული და გონს მოვიდა ციხის მორგში; თვითნებური გადაწყვეტილებით, მომჩივნის სავარაუდო მოთავსება დამამცირებელ პირობებში კარცერსა და ძალიან მცირე ზომის საკანში (fuks), დისციპლინური სასჯელის საკნებში. ევროპული სასამართლოს შეფასებით, მომჩივანი მუდმივად და დამაკრებლად აცხადებდა ევროპული ორგანოების წინაშე, რომ მის მიმართ არასათანადო მოპყრობაში მონაწილეობდნენ ციხის სხვა მაღალი თანამდებობის პირებიც, თუმცა ხელისუფლების ორგანოებმა თვალი დახუჭეს დამნაშავეებსა და ციხის სხვა მაღალი თანამდებობის პირებს შორის არსებულ მჭიდრო კავშირზე (იხ. იქვე, პარ. 59).

³⁰⁸ იქვე, პარ. 59.

ეს საქმე ეხება საპროტესტო აქციაზე დაკავებული დემონსტრანტისთვის პასუხისმგებლობის დაკისრებას სათანადო დასაბუთების გარეშე. 2019 წლის 29 ნოემბერს საჯარო მანიფესტაციისას დააკავეს მომჩივანი - აქტივისტი ლაშა ჩხარტიშვილი.³⁰⁹ ეროვნულმა სასამართლოებმა მას, სამართალდამცავი ორგანოების თანამშრომელთა შეურაცხყოფისა და მათი კანონიერი ბრძანებების დაუმორჩილებლობისთვის, ადმინისტრაციული სახდელის სახით, 8-დღიანი ადმინისტრაციული პატიმრობა შეუფარდეს.³¹⁰

მაშინ, როდესაც თავისუფლების აღკვეთა განსაკუთრებით ფრთხილ მიდგომას საჭიროებს,³¹¹ ეროვნული სასამართლოებისთვის მომჩივნის „პიროვნება“ და მის მიერ ჩადენილი საქციელის „სერიოზულობა“, საკმარისი საფუძველი იყო, რათა შემდგომი განხილვის გარეშე 8-დღიანი ადმინისტრაციული პატიმრობა თანაზომიერ სახდელად მიჩნეულიყო. ევროპული სასამართლოს შეფასებით, მიუხედავად იმისა, რომ მითითება მომჩივნის „პიროვნებაზე“, შესაძლოა, ეხებოდეს წარსულში ადმინისტრაციული სამართალდარღვევების გამო მის ნასამართლობას, მოქმედი სამართლებრივი დებულებები არ იძლეოდა ერთ წელზე ძველი ადმინისტრაციული სახდელის გათვალისწინების უფლებას. შესაბამისად, ევროპული სასამართლოს შეფასებით, მხოლოდ ეს ულემენტი, სათანადო დასაბუთების გარეშე, არ იყო საკმარისი მომჩივნის არაძალადობრივი, თუნდაც, ხელისშემშლელი ქცევის გამო პატიმრობის შეფარდების გასამართლებლად.³¹² მომჩივნის ქცევის „სერიოზულობა“ ეხებოდა, ზოგადად, სასჯელის დაკისრების აუცილებლობას და არა - არჩეული სასჯელის თანაზომიერებას. აქედან გამომდინარე, ევროპული სასამართლოს შეფასებით, ეს არ შეიძლება ჩაითვალოს საკმარისად პატიმრობის 8-დღიანი ვადის დაწესების გასამართლებლად, მომჩივნის გამოხატვისა და შეკრების თავისუფლების უფლებათა განხორციელების კონტექსტში.³¹³

(46) გაიდუკევიჩი საქართველოს წინააღმდეგ (2023)

საქმის დასახელება/ნომერი	გაიდუკევიჩი საქართველოს წინააღმდეგ, 38650/18
საჩივრის წარდგენის თარიღი	9 აგვისტო, 2018 წელი
გადაწყვეტილების თარიღი	15 ივნისი, 2023 წელი
მომჩივანი	ალბინა გაიდუკევიჩი
ადამიანის უფლებათა ევროპული კონვენციის დარღვეული უფლებები	მე-2 მუხლი, მე-14 მუხლთან ერთობლიობაში
სამართლიანი დაკმაყოფილება	ზიანი - 20 000 EUR ხარჯები და დანახარჯები - 12 600 EUR

ეს საქმე ეხება ოჯახში ძალადობას, კონკრეტულად, სახელმწიფო ორგანოების მარცხს, დაეცათ მომჩივნის ქალიშვილი მისი პარტნიორის მხრიდან განხორციელებული სისტემური ძალადობისგან, რასაც, შედეგად, მომჩივნის ქალიშვილის

³⁰⁹ ადამიანის უფლებათა ევროპული სასამართლოს 2023 წლის 11 მაისის გადაწყვეტილება საქმეზე „ჩხარტიშვილი საქართველოს წინააღმდეგ“ (CASE OF CKHARTISHVILI v. GEORGIA), 31349/20, პარ. 5.

³¹⁰ მომჩივანი ესროდა პოლიციელებს ლობიოს მარცვლებს და თან ყვიროდა „მონების საკვები პოლიციელებისთვის“ (იხ. იქვე, პარ. 7). 2019 წლის 29 ნოემბერს თბილისის საქალაქო სასამართლომ მომჩივანი დამნაშავედ ცნო სამართალდამცავი ორგანოების თანამშრომლების შეურაცხყოფისა და მათი კანონიერი ბრძანებების დაუმორჩილებლობისთვის, ხოლო თბილისის სააპელაციო სასამართლომ უცვლელად დატოვა ქვემდგომი სასამართლოს გადაწყვეტილება (იქვე, პარ. 18, 23).

³¹¹ იქვე, პარ. 60.

³¹² იქვე.

³¹³ იქვე.

სიკვდილი მოჰყვა.³¹⁴ სასამართლო პროცესისა და მსჯავრდების ფარგლებში არ მომხდარა დანაშაულის ჩაღწევაში გენდერული ნიშნით დისკრიმინაციის შესაძლო როლის გამოკვლევა.³¹⁵ ევროპული სასამართლოს შეფასებით, უზენაესმა სასამართლომ განიხილა ოჯახში ძალადობის მხოლოდ 1 ეპიზოდი, რითაც უგულებელყო მომჩივნის შვილის მიმართ წლების განმავლობაში განხორციელებული ძალადობის ფაქტები.³¹⁶ ევროპული სასამართლო აღნიშნავს, რომ ოჯახში ძალადობა იშვიათად არის ერთჯერადი შემთხვევა. ჩვეულებრივ, ის მოიცავს ოჯახის წევრისა ან პარტნიორის მიმართ განხორციელებულ ერთობლივ და ურთიერთდაკავშირებულ ფიზიკურ, სიტყვიერ შეურაცხყოფას, ფსიქოლოგიურ, სექსუალურ, ემოციურ, ფინანსურ ზეწოლას და სცილდება ცალკეული შემთხვევის ფარგლებს. შესაბამისად, ის შეიძლება მივიჩნიოთ უწყვეტი დანაშაულის კონკრეტულ ფორმად, რომელშიც თითოეული ინციდენტი არის ფართო სტრუქტურის შემადგენელი ნაწილი. ამის გათვალისწინებით, ევროპული სასამართლოს თანახმად, უზენაესი სასამართლოს ზემოაღნიშნული მიდგომა შეუსაბამოა ევროპული სასამართლოს პრეცედენტულ სამართალთან.³¹⁷

(47) ბაქრაძე საქართველოს წინააღმდეგ (2024)

საქმის დასახელება/ნომერი	ბაქრაძე საქართველოს წინააღმდეგ, 20592/21
საჩივრის წარდგენის თარიღი	24 იანვარი, 2020 წელი
გადაწყვეტილების თარიღი	7 ნოემბერი, 2024 წელი
მომჩივანი	მაია ბაქრაძე
ადამიანის უფლებათა ევროპული კონვენციის დარღვეული უფლება	მე-14 მუხლი, მე-10 და მე-11 მუხლებთან ერთობლიობაში
სამართლიანი დაკმაყოფილება	ზიანი - 4 500 EUR

ეს საქმე შეეხება იუსტიციის უმაღლესი საბჭოს მხრიდან, **მოსამართლეების დანიშვნის პროცესში, ყოფილი მოსამართლის დისკრიმინაციას მისი კრიტიკული მოსაზრებების გამო და ამ შემთხვევაზე არასათანადო სასამართლო კონტროლს.** მომჩივანი არის ყოფილი მოსამართლე და არასამთავრობო ორგანიზაცია „მოსამართლეთა ერთობის“ დამფუძნებელი.³¹⁸ მან 2015-2016 წლებში მოსამართლეთა შესარჩევ 2 კონკურსში მიიღო მონაწილეობა, თუმცა არცერთ შემთხვევაში მოსამართლედ არ დანიშნულა.³¹⁹ იუსტიციის უმაღლეს საბჭოში გასაუბრებისას მისთვის დასმული შეკითხვები იყო მიკერძოებული და ფოკუსირებული არა მისი პროფესიული უნარების შეფასებაზე, არამედ იუსტიციის უმაღლესი საბჭოს მიმართ მის მიერ გამოთქმულ კრიტიკულ შეფასებებზე.³²⁰ ამასთანავე, დისკრიმინაციის ფაქტის დასადასტურებლად მომჩივანმა წარმოადგინა სტატისტიკური მონაცემები, რომელთა

³¹⁴ ადამიანის უფლებათა ევროპული სასამართლოს 2023 წლის 15 ივნისის გადაწყვეტილება საქმეზე „გაიდუკევიჩი საქართველოს წინააღმდეგ“ (CASE OF GAIDUKEVICH v. GEORGIA), 38650/18, პარ. 1.

გარდაცვალებამდე ოთხი წლის განმავლობაში, მომჩივნის ქალიშვილმა მინიმუმ 16-ჯერ გამოიძახა პოლიცია მისი პარტნიორის ძალადობრივი ქცევის გამო, თუმცა - უშედეგოდ. პოლიცია შემაკავებელი ორდერების გამოცემით შემოიფარგლებოდა, თუმცა, იყო შემთხვევები, როდესაც შემაკავებელი ორდერი არ გამოცემულა, რაც ახსნეს იმ გარემოებით, რომ თავად დაზარალებულმა არ მოითხოვა შემაკავებელი ორდერის გამოცემა. იქვე, პარ. 6-21.

³¹⁵ იქვე, პარ. 68.

³¹⁶ იქვე, პარ. 67.

³¹⁷ იქვე.

³¹⁸ ევროპული სასამართლოს 2024 წლის 7 ნოემბრის გადაწყვეტილება საქმეზე „ბაქრაძე საქართველოს წინააღმდეგ“ (BAKRADZE v. GEORGIA), 20592/21, პარ. 5-6.

³¹⁹ იქვე, პარ. 8-13.

³²⁰ იქვე, პარ. 73, 75.

მიხედვითაც, „მოსამართლეთა ერთობის“ წევრები იშვიათად ინიშნებოდნენ მოსამართლეებად, რაც მათი კრიტიკული პოზიციებით იყო გამოწვეული.³²¹ გარდა ამისა, მისი სხვა მტკიცებულებები მოიცავდა, მათ შორის, იუსტიციის უმაღლესი საბჭოს არამოსამართლე წევრისა და საქართველოს სახალხო დამცველის შეფასებებს იუსტიციის უმაღლეს საბჭოში დისკრიმინაციული მიდგომების შესახებ.³²²

ევროპულმა სასამართლომ მიიჩნია, რომ ეროვნულ სასამართლოებში მომჩივანმა *prima facie* დაამტკიცა დისკრიმინაციის არსებობა, რის შემდეგაც ეროვნულ სასამართლოებს მტკიცების ტვირთი იუსტიციის უმაღლეს საბჭოზე უნდა გადაეტანათ.³²³ სწორედ იუსტიციის უმაღლეს საბჭოს უნდა ემტკიცებინა, რომ განსხვავებულ მოპყრობას ჰქონდა ობიექტური და გონივრული გამართლება.³²⁴ ეროვნულ სასამართლოებს ეს არ გაუკეთებიათ და მომჩივნის სარჩელი დისკრიმინაციასთან დაკავშირებით დაუსაბუთებლად მიიჩნიეს.³²⁵ შესაბამისად, ევროპული სასამართლოს შეფასებით, დისკრიმინაციის ფაქტზე არასათანადო სასამართლო კონტროლი განხორციელდა.³²⁶

(48) რომანჩენკო და ხარაზიშვილი საქართველოს წინააღმდეგ (2025)

საქმის დასახელება/ნომერი	რომანჩენკო და ხარაზიშვილი საქართველოს წინააღმდეგ, 33067/22, 37832/22
საჩივრის წარდგენის თარიღი	33067/22 - 29 ივნისი, 2022 წელი 37832/22 - 26 ივლისი, 2022 წელი
გადაწყვეტილების თარიღი	18 თებერვალი, 2025 წელი
მომჩივნები	ანა რომანჩენკო (33067/22) ნიკა ხარაზიშვილი (37832/22)
დარღვეული უფლებები	მე-8 მუხლი
სამართლიანი დაკმაყოფილება	ზიანი - 1 500 EUR (თითოეულს) ხარჯები და დანახარჯები - 73 EUR (თითოეულს)

საქმე ეხება სისხლის სამართლის საქმის წარმოების პროცესში კომპანიის იურისტისა და მისი მუდლის სატელეფონო საუბრების მოსმენა-ჩაწერას. ფარული საგამოძიებო მოქმედების ჩატარების საფუძველია მოსამართლის განჩინება, რომელიც აუცილებლად უნდა შეიცავდეს დასაბუთებას ამ საგამოძიებო მოქმედების საჭიროებისა და პროპორციულობის შესახებ.³²⁷ ადამიანის უფლებათა ევროპული სასამართლოს შეფასებით, საქმეში არსებული განკარგულებით არ იყო დასაბუთებული ამ ღონისძიების გამოყენება კონკრეტული პირების მიმართ.³²⁸ ასევე, ეროვნულმა სასამართლომ არ შეაფასა, იყო თუ არა განმცხადებელთა მიმართ ჩატარებული ფარული საგამოძიებო მოქმედება პროპორციული ლეგიტიმური მიზნის მისაღწევად. ის, უბრალოდ, დაეყრდნო კანონმდებლობაში მითითებულ ზოგად ფორმულირებებს და მიუთითა, რომ მოთხოვნილი ფარული საგამოძიებო მოქმედებით მოპოვებული ინფორმაცია არსებითი მნიშვნელობის იყო გამოძიებისთვის

³²¹ იქვე, პარ. 73-74.
³²² იქვე, პარ. 73, 80.
³²³ იქვე, პარ. 82.
³²⁴ იქვე.
³²⁵ იქვე.
³²⁶ იქვე, პარ. 84-85.
³²⁷ ადამიანის უფლებათა ევროპული სასამართლოს 2025 წლის 18 თებერვლის გადაწყვეტილება საქმეზე „რომანჩენკო და ხარაზიშვილი საქართველოს წინააღმდეგ“ (CASE OF ROMANCHENKO AND KHARAZISHVILI v. GEORGIA), 33067/22, 37832/22, პარ. 53.
³²⁸ იქვე, პარ. 54.

და სხვა საშუალებებით მათი მიღება შეუძლებელი იქნებოდა ან საჭიროებდა არა-გონივრულად დიდ ძალისხმევას. თუმცა, სასამართლოს არ განუმარტავს, როგორ მივიდა ამ დასკვნამდე.³²⁹

ამასთანავე, ევროპული სასამართლოს თანახმად, ეროვნულმა სასამართლოებმა სათანადოდ არ შეაფასეს ადვოკატისა და კლიენტის ურთიერთობის კონფიდენციალურობა. მეტიც, თბილისის სააპელაციო სასამართლომ იცოდა განმცხადებლის ადვოკატის სტატუსი და აღნიშნა, რომ ფარული საგამოძიებო მოქმედებების ჩატარებისას პრაქტიკოსი ადვოკატები არ სარგებლობენ იმუნიტეტით. ევროპული სასამართლოს შეფასებით, ასეთი პრაქტიკა, ფაქტობრივად, ძირს უთხრის ადვოკატისა და კლიენტის ურთიერთობის კონფიდენციალურობას.³³⁰

³²⁹ იქვე, პარ. 56.

³³⁰ იქვე, პარ. 60.

3. ეროვნულ დონეზე საქმეთა განხილვაში მონაწილე მოსამართლეები

1. აკობია ნატრული - პირველი ინსტანციაში იყო მოსამართლე შემდგომში ევროპულ სასამართლოში გასაჩივრებულ საქმეზე: კლანდია საქართველოს წინააღმდეგ.

2016 წლის თებერვლიდან არის ზუგდიდის რაიონული სასამართლოს მოსამართლე. 2019 წლის თებერვლიდან თანამდებობაზე განწესებულია უვადოდ, კანონით დადგენილი ასაკის მიღწევამდე, ხოლო 2022 წლის ივნისიდან დანიშნულია ზუგდიდის რაიონული სასამართლოს თავმჯდომარის თანამდებობაზე.³³¹

2. არდაზიშვილი ხატია - პირველ ინსტანციაში იყო მოსამართლე შემდგომში ევროპულ სასამართლოში გასაჩივრებულ საქმეზე: ფერაძე და სხვები საქართველოს წინააღმდეგ.

2019 წლის ივნისიდან არის თბილისის სააპელაციო სასამართლოს ადმინისტრაციულ საქმეთა პალატის მოსამართლე.³³²

3. ბადრიამიშვილი გელა - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: ბაქრაძე საქართველოს წინააღმდეგ.

2012 წლის ივლისიდან არის თბილისის სააპელაციო სასამართლოს მოსამართლე.³³³

4. ბარბაქაძე ნათია - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეებზე: მამალაძე საქართველოს წინააღმდეგ; დლონტი და სხვები საქართველოს წინააღმდეგ.

2015 წლის დეკემბრიდან არის თბილისის სააპელაციო სასამართლოს მოსამართლე.³³⁴

5. ბებიამიშვილი მიხეილ - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: ტლამაძე და კაკაშვილი საქართველოს წინააღმდეგ.

2024 წლის 7 ოქტომბრიდან არის ზესტაფონის რაიონული სასამართლოს მაგისტრტი მოსამართლე თერჯოლის მუნიციპალიტეტში.³³⁵

6. ბეჟანიშვილი თამარ - პირველ ინსტანციაში იყო მოსამართლე შემდგომში ევროპულ სასამართლოში გასაჩივრებულ საქმეზე: ხავებოვა საქართველოს წინააღმდეგ.

2017 მაისიდან არის ბათუმის საქალაქო სასამართლოს სისხლის სამართლის საქმეთა კოლეგიის მოსამართლე, ხოლო 2019 წლის ოქტომბრიდან თანამდებობაზე განწესებულია უვადოდ, კანონით დადგენილი ასაკის მიღწევამდე.³³⁶

7. ბუგანიშვილი ბესიკ - პირველ ინსტანციაში იყო მოსამართლე შემდგომში ევროპულ სასამართლოში გასაჩივრებულ საქმეზე: მამალაძე საქართველოს წინააღმდეგ.

³³¹ იხ. <http://hcoj.gov.ge/ka/ნატრული-აკობია1.html> [14.11.2024].

³³² იხ. <http://hcoj.gov.ge/ka/ხატია-არდაზიშვილი.html> [07.11.2024].

³³³ იხ. <http://hcoj.gov.ge/ka/გელა-ბადრიამიშვილი.html> [14.11.2024].

³³⁴ იხ. <http://hcoj.gov.ge/ka/ნათია-ბარბაქაძე.html> [07.11.2024].

³³⁵ იხ. <http://hcoj.gov.ge/ka/მიხეილ-ბებიამიშვილი.html> [07.11.2024].

³³⁶ იხ. <http://hcoj.gov.ge/ka/თამარ-ბეჟანიშვილი.html> [07.11.2024].

2019 წლის ივნისიდან დანიშნულია თბილისის სააპელაციო სასამართლოს სისხლის სამართლის საქმეთა პალატის მოსამართლედ უვადოდ, კანონით დადგენილი ასაკის მიღწევამდე.³³⁷

8. გაბინაშვილი მერაბ - უზენაეს სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: უგულავა (N2) საქართველოს წინააღმდეგ.

2019 წლის დეკემბრიდან არჩეულია საქართველოს უზენაესი სასამართლოს მოსამართლედ უვადოდ, ორგანული კანონით დადგენილი ასაკის მიღწევამდე, ხოლო 2020 წლის სექტემბრიდან არის საკვალიფიკაციო პალატის წევრი და თავმჯდომარე.³³⁸

9. გიგიტაშვილი ნაირა - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეებზე: ენუქიძე და გირგვლიანი საქართველოს წინააღმდეგ; მეგრელიშვილი საქართველოს წინააღმდეგ.

2013 წლის ივნისიდან არის ხაშურის რაიონული სასამართლოს მოსამართლე. 2019 წლის ივნისიდან თანამდებობაზე განწესებულია უვადოდ, კანონით დადგენილი ასაკის მიღწევამდე.³³⁹

10. ერემაძე მირანდა - უზენაეს სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: წულუკიძე და რუსულაშვილი საქართველოს წინააღმდეგ.

2019 წლის დეკემბრიდან არჩეულია საქართველოს უზენაესი სასამართლოს მოსამართლედ უვადოდ, კანონით დადგენილი ასაკის მიღწევამდე. 2019 წლის დეკემბრიდან არის უზენაესი სასამართლოს სადისციპლინო პალატის წევრი.³⁴⁰

11. ვაჩაძე მაია - უზენაეს სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეებზე: მიქიაშვილი საქართველოს წინააღმდეგ; ბაქრაძე საქართველოს წინააღმდეგ.

2019 წლის დეკემბრიდან არჩეულია უზენაესი სასამართლოს მოსამართლედ უვადოდ, კანონით დადგენილი ასაკის მიღწევამდე.³⁴¹

12. თადემაძე მალვა - უზენაეს სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეებზე: უგულავა (N2) საქართველოს წინააღმდეგ; კუზურაშვილი საქართველოს წინააღმდეგ.

2019 წლის დეკემბერში აირჩიეს საქართველოს უზენაესი სასამართლოს მოსამართლედ უვადოდ, კანონით დადგენილი ასაკის მიღწევამდე. ასევე, უზენაესი სასამართლოს თავმჯდომარის მოადგილე, სისხლის სამართლის საქმეთა პალატის თავმჯდომარე. ამჟამად ის აღარ არის მოქმედი მოსამართლე, ვინაიდან 2024 წლის 30 დეკემბრიდან დაინიშნა საქართველოს შინაგან საქმეთა მინისტრის მოადგილედ.³⁴²

13. თავართქილაძე ლაშა - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: მაქარაშვილი და სხვები საქართველოს წინააღმდეგ.

2018 წლიდან მოსამართლის თანამდებობაზე დანიშნულია უვადოდ, კანონით და-

³³⁷ <http://hcoj.gov.ge/ka/ბესიკ-ბუგინიშვილი.html> [07.11.2024].

³³⁸ იხ. <http://hcoj.gov.ge/ka/მერაბ-გაბინაშვილი.html> [07.11.2024].

³³⁹ იხ. <http://hcoj.gov.ge/ka/ნაირა-გიგიტაშვილი.html> [07.11.2024].

³⁴⁰ იხ. <http://hcoj.gov.ge/ka/მირანდა-ერემაძე.html> [07.11.2024].

³⁴¹ იხ. <http://hcoj.gov.ge/ka/მაია-ვაჩაძე1.html> [14.11.2024].

³⁴² იხ. <http://hcoj.gov.ge/ka/მალვა-თადემაძე1.html> [07.11.2024].

დგენილი ასაკის მიღწევამდე, ხოლო 2021 წლის მარტიდან არის თბილისის სააპელაციო სასამართლოს სამოქალაქო საქმეთა პალატის მოსამართლე.³⁴³

14. თევზაძე ლევან - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: უგულავა საქართველოს წინააღმდეგ.

2021 წლის ივლისიდან არჩეულია საქართველოს უზენაესი სასამართლოს მოსამართლედ უვადოდ, კანონით დადგენილი ასაკის მიღწევამდე.³⁴⁴

15. თეთრაული მათა - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეებზე: ტლამაძე და კაკაშვილი საქართველოს წინააღმდეგ; მეგრელიშვილი საქართველოს წინააღმდეგ.

2012 წლიდან არის თბილისის სააპელაციო სასამართლოს სისხლის სამართლის საქმეთა პალატის მოსამართლე. 2017 წლის ოქტომბრიდან თანამდებობაზე განწესებულია უვადოდ, კანონით დადგენილი ასაკის მიღწევამდე.³⁴⁵

16. იმერლიშვილი მარინე - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეებზე: გელენიძე საქართველოს წინააღმდეგ; კლანდია საქართველოს წინააღმდეგ.

2005 წლიდან არის ქუთაისის სააპელაციო სასამართლოს სისხლის სამართლის საქმეთა პალატის მოსამართლე.³⁴⁶

17. კაკაბაძე ვლადიმერ - უზენაეს სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: წულუკიძე და რუსულაშვილი საქართველოს წინააღმდეგ.

2019 წლის დეკემბრიდან არჩეულია საქართველოს უზენაესი სასამართლოს მოსამართლედ უვადოდ, კანონით დადგენილი ასაკის მიღწევამდე.³⁴⁷

18. კაპანაძე მანუჩარ - პირველი ინსტანციის სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: მოლაშვილი საქართველოს წინააღმდეგ. სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეებზე: მამალაძე საქართველოს წინააღმდეგ; უგულავა საქართველოს წინააღმდეგ; დლონტი და სხვები საქართველოს წინააღმდეგ.

2010 წლიდან არის თბილისის სააპელაციო სასამართლოს სისხლის სამართლის საქმეთა პალატის მოსამართლე, ხოლო 2018 წლის თებერვლიდან თანამდებობაზე განწესებულია უვადოდ, კანონით დადგენილი ასაკის მიღწევამდე.³⁴⁸

19. კაპანაძე მურთაზ - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეებზე: გელენიძე საქართველოს წინააღმდეგ; კლანდია საქართველოს წინააღმდეგ.

2017 წლის მაისიდან არის სამტრედიის რაიონული სასამართლოს მოსამართლე, ხოლო 2019 წლის ოქტომბრიდან თანამდებობაზე განწესებულია უვადოდ, კანონით დადგენილი ასაკის მიღწევამდე.³⁴⁹

³⁴³ იხ. <http://hcoj.gov.ge/ka/ლაშა-თავართქილაძე.html> [14.11.2024].

³⁴⁴ იხ. <http://hcoj.gov.ge/ka/ლევან-თევზაძე3.html> [14.11.2024].

³⁴⁵ იხ. <http://hcoj.gov.ge/ka/მაია-თეთრაული.html> [14.11.2024].

³⁴⁶ იხ. <http://hcoj.gov.ge/ka/მარინე-იმერლიშვილი.html> [14.11.2024].

³⁴⁷ იხ. <http://hcoj.gov.ge/ka/ვლადიმერ-კაკაბაძე.html> [14.11.2024].

³⁴⁸ იხ. <http://hcoj.gov.ge/ka/მანუჩარ-კაპანაძე.html> [14.11.2024].

³⁴⁹ იხ. <http://hcoj.gov.ge/ka/მურთაზ-კაპანაძე.html> [14.11.2024].

20. კახეთელიძე გერონტი - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: გაიდუკევიჩი საქართველოს წინააღმდეგ.

2012 წლის იანვრიდან არის თბილისის სააპელაციო სასამართლოს მოსამართლე.³⁵⁰

21. კვიციანი ვიქტორია - პირველ ინსტანციაში იყო მოსამართლე შემდგომში ევროპულ სასამართლოში გასაჩივრებულ საქმეზე: საჭაპურიძე და ხაჩიძე საქართველოს წინააღმდეგ.³⁵¹

2020 წლის 3 აპრილს საქართველოს უზენაესი სასამართლოს პლენუმის დადგენილებით დაინიშნა საქართველოს საკონსტიტუციო სასამართლოს წევრად.³⁵²

22. ლომიძე მერაბ - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: ბაქრაძე საქართველოს წინააღმდეგ.

2018 წლის თებერვლიდან თანამდებობაზე განწესებულია უვადოდ, კანონით დადგენილი ასაკის მიღწევამდე. 2019 წლის ივნისიდან უფლებამოსილებას ახორციელებს თბილისის სააპელაციო სასამართლოს სამოქალაქო საქმეთა პალატაში.³⁵³

23. მამულაშვილი ლეილა - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: მიქიაშვილი საქართველოს წინააღმდეგ.

2019 წლის ივლისიდან არის თბილისის სააპელაციო სასამართლოს ადმინისტრაციულ საქმეთა პალატის მოსამართლე.³⁵⁴

24. მაჭავარიანი კახაბერ - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: უგულავა საქართველოს წინააღმდეგ.

2012 წლის ივლისიდან არის თბილისის სააპელაციო სასამართლოს სისხლის სამართლის საქმეთა პალატის მოსამართლე.³⁵⁵

25. მიქაბერიძე ლევან - უზენაეს სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: წულუკიძე და რუსულაშვილი საქართველოს წინააღმდეგ.

2019 წლის დეკემბრიდან არჩეულია საქართველოს უზენაესი სასამართლოს მოსამართლედ უვადოდ, კანონით დადგენილი ასაკის მიღწევამდე. 2020 წლის 8 მაისიდან არის საკვალეფიკაციო პალატის წევრი. 2021 წლის 26 მაისს მოსამართლეთა კონფერენციამ ის საქართველოს იუსტიციის უმაღლესი საბჭოს წევრად აირჩია.³⁵⁶

26. მურუსიძე ლევან - იყო მოსამართლე შემდგომში ევროპულ სასამართლოში გასაჩივრებულ საქმეებზე: ენუქიძე და გირგვლიანი საქართველოს წინააღმდეგ; გელენიძე საქართველოს წინააღმდეგ; მიქიაშვილი საქართველოს წინააღმდეგ; მაქარაშვილი და სხვები საქართველოს წინააღმდეგ; ტურავა და სხვები

³⁵⁰ იხ. <http://hcoj.gov.ge/ka/გერონტი-კახეთელიძე.html> [14.11.2024].

³⁵¹ იხ. <https://www.radiotavisupleba.ge/a/იყენებს-თუ-არა-იუსტიციის-უმაღლესი-საბჭოს-მდივანი-თანამდებობას-ბოროტაძე/29507026.html> [14.11.2024].

³⁵² იხ. https://www.constcourt.ge/ka/court/justices/current_justices/ვიქტორია-კვიციანი.html [14.11.2024].

³⁵³ იხ. <http://hcoj.gov.ge/ka/მერაბ-ლომიძე.html> [14.11.2024].

³⁵⁴ იხ. <http://hcoj.gov.ge/ka/ლეილა-მამულაშვილი.html> [14.11.2024].

³⁵⁵ იხ. <http://hcoj.gov.ge/ka/კახაბერ-მაჭავარიანი.html> [14.11.2024].

³⁵⁶ იხ. <http://hcoj.gov.ge/ka/ლევან-მიქაბერიძე1.html> [14.11.2024].

საქართველოს წინააღმდეგ; მოლაშვილი საქართველოს წინააღმდეგ; ტლაშაძე და კაკაშვილი საქართველოს წინააღმდეგ; როსტომაშვილი საქართველოს წინააღმდეგ.³⁵⁷

2016 წლის იანვრიდან არის თბილისის სააპელაციო სასამართლოს ადმინისტრაციულ საქმეთა პალატის მოსამართლე. 2018 წლის დეკემბრიდან თანამდებობაზე განწესებულია უვადოდ, კანონით დადგენილი ასაკის მიღწევამდე. 2022 წლის 23 ოქტომბერს მოსამართლეთა კონფერენციამ იუსტიციის უმაღლესი საბჭოს წევრად აირჩია.³⁵⁸

27. ნადოი რეზო - პირველ ინსტანციაში იყო მოსამართლე შემდგომში ევროპულ სასამართლოში გასაჩივრებულ საქმეზე: ტლაშაძე და კაკაშვილი საქართველოს წინააღმდეგ.

2020 წლის დეკემბრიდან არის მცხეთის რაიონული სასამართლოს მაგისტრატი მოსამართლე დუშეთის მუნიციპალიტეტში.³⁵⁹

28. როინიშვილი ვასილ - უზენაეს სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეებზე: გელენიძე საქართველოს წინააღმდეგ; ბაქრაძე საქართველოს წინააღმდეგ.

2020 წლის 29 მაისს დაინიშნა საქართველოს საკონსტიტუციო სასამართლოს წევრად, ხოლო ამავე წლის 25 ივნისს საქართველოს საკონსტიტუციო სასამართლოს **პლენუმმა** ის აირჩია საკონსტიტუციო სასამართლოს თავმჯდომარის მოადგილედ და პირველი კოლეგიის თავმჯდომარედ.³⁶⁰

29. სილაგაძე პაატა - უზენაეს სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეებზე: გელენიძე საქართველოს წინააღმდეგ; მამალაძე საქართველოს წინააღმდეგ; ხავშაბოვა საქართველოს წინააღმდეგ; მიქიაშვილი საქართველოს წინააღმდეგ; ტლაშაძე და კაკაშვილი საქართველოს წინააღმდეგ; დლონტი და სხვები საქართველოს წინააღმდეგ.

2019 წლის ივნისში დაინიშნა თბილისის სააპელაციო სასამართლოს საგამოძიებო კოლეგიის მოსამართლედ უვადოდ, კანონით დადგენილი ასაკის მიღწევამდე. 2021 წლის სექტემბრიდან არის თბილისის სააპელაციო სასამართლოს სისხლის სამართლის საქმეთა პალატის თავმჯდომარე, ხოლო 2021 წლის 31 ოქტომბერს მოსამართლეთა კონფერენციამ საქართველოს იუსტიციის უმაღლესი საბჭოს წევრად აირჩია.³⁶¹

30. სირაძე მარინა - პირველ ინსტანციაში იყო მოსამართლე შემდგომში ევროპულ სასამართლოში გასაჩივრებულ საქმეებზე: გელენიძე საქართველოს წინააღმდეგ; კალანდია საქართველოს წინააღმდეგ.

2012 წლიდან არის ქუთაისის სააპელაციო სასამართლოს სისხლის სამართლის საქმეთა პალატის მოსამართლე, ხოლო 2019 წლის ოქტომბრიდან თანამდებობაზე განწესებულია უვადოდ, კანონით დადგენილი ასაკის მიღწევამდე.³⁶²

³⁵⁷ საქმეთა ნაწილი ილენტიფიცირდა საიას ხელთ არსებული მასალებით, ვინაიდან ეს საქმეები საიამ აწარმოვა, ხოლო დანარჩენ საქმეთა ილენტიფიცირება შესაძლებელი გახდა საჯაროდ გამოქვეყნებული წყაროებიდან, იხ. <https://transparency.ge/ge/post/levan-murusizis-5-gadacqvetileba-ze-strasburgis-sasamartloshi-dargveva-dadginda> [14.11.2024].

³⁵⁸ იხ. <http://hcoj.gov.ge/ka/ლევან-მურუსიძე1.html> [14.11.2024].

³⁵⁹ იხ. <http://hcoj.gov.ge/ka/რეზო-ნადოი.html> [14.11.2024].

³⁶⁰ იხ. https://constcourt.ge/ka/court/justices/current_justices/ვასილ-როინიშვილი.html [14.11.2024].

³⁶¹ იხ. <http://hcoj.gov.ge/ka/პაატა-სილაგაძე2.html> [14.11.2024].

³⁶² იხ. <http://hcoj.gov.ge/ka/მარინა-სირაძე.html> [14.11.2024].

31. სხირტლაძე ნუგზარ - უზენაეს სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: ბაქრაძე საქართველოს წინააღმდეგ.

2019 წლის დეკემბრიდან არჩეულია უზენაესი სასამართლოს მოსამართლედ უვადოდ, კანონით დადგენილი ასაკის მიღწევამდე.³⁶³

32. ფარქოსაძე დიანა - პირველ ინსტანციაში იყო მოსამართლე შემდგომში ევროპულ სასამართლოში გასაჩივრებულ საქმეზე: ბაქრაძე საქართველოს წინააღმდეგ.

2015 წლის მაისიდან არის თბილისის საქალაქო სასამართლოს ადმინისტრაციულ საქმეთა კოლეგიის მოსამართლე. 2018 წლის მაისიდან თანამდებობაზე განწესებულია უვადოდ, კანონით დადგენილი ასაკის მიღწევამდე. 2018 წლის მაისიდან არის თბილისის საქალაქო სასამართლოს სპიკერ-მოსამართლე.³⁶⁴

33. ფილიძევილი ვალერიანე - პირველ ინსტანციაში იყო მოსამართლე შემდგომში ევროპულ სასამართლოში გასაჩივრებულ საქმეებზე: მინდაძე და ნემსიწვერიძე საქართველოს წინააღმდეგ; ბოხონკო საქართველოს წინააღმდეგ; მაქარაშვილი და სხვები საქართველოს წინააღმდეგ; ჩხარტიშვილი საქართველოს წინააღმდეგ.

2019 წლის ივლისიდან არის თბილისის საქალაქო სასამართლოს ადმინისტრაციულ საქმეთა კოლეგიის მოსამართლე, ხოლო 2018 წლის დეკემბრიდან თანამდებობაზე განწესებულია უვადოდ, კანონით დადგენილი ასაკის მიღწევამდე.³⁶⁵

34. ქათამაძე ჰაატა - უზენაეს სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეებზე: მამალაძე საქართველოს წინააღმდეგ; ხავშაბოვა საქართველოს წინააღმდეგ; გაიდუკვიჩი საქართველოს წინააღმდეგ.

2020 წლის დეკემბრიდან არის თბილისის სააპელაციო სასამართლოს სამოქალაქო საქმეთა პალატის მოსამართლე.³⁶⁶

35. ყაველაშვილი შორენა - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: ჩხარტიშვილი საქართველოს წინააღმდეგ.

2013 წლიდან არის თბილისის სააპელაციო სასამართლოს მოსამართლე. 2019 წლის ოქტომბრიდან თანამდებობაზე განწესებულია უვადოდ, კანონით დადგენილი ასაკის მიღწევამდე.³⁶⁷

36. შავლიაშვილი გიორგი - უზენაეს სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეებზე: მამალაძე საქართველოს წინააღმდეგ; ხავშაბოვა საქართველოს წინააღმდეგ; უგულავა (N2) საქართველოს წინააღმდეგ; გაიდუკვიჩი საქართველოს წინააღმდეგ; დლონტი და სხვები საქართველოს წინააღმდეგ.

2010 წლის ივნისიდან არის საქართველოს უზენაესი სასამართლოს მოსამართლე.³⁶⁸

³⁶³ იხ. <http://hcoj.gov.ge/ka/ნუგზარ-სხირტლაძე.html> [14.11.2024].

³⁶⁴ იხ. <http://hcoj.gov.ge/ka/დიანა-ფარქოსაძე.html> [14.11.2024].

³⁶⁵ იხ. <http://hcoj.gov.ge/ka/ვალერიანე-ფილიძევილი.html> [14.11.2024].

³⁶⁶ იხ. <http://hcoj.gov.ge/ka/ჰაატა-ქათამაძე1.html> [14.11.2024].

³⁶⁷ იხ. <http://hcoj.gov.ge/ka/შორენა-ყაველაშვილი.html> [14.11.2024].

³⁶⁸ იხ. <http://hcoj.gov.ge/ka/გიორგი-შავლიაშვილი.html> [14.11.2024].

37. შენგელია ირაკლი - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: ფერაძე და სხვები საქართველოს წინააღმდეგ.

2016 წლის ივლისიდან არის თბილისის სააპელაციო სასამართლოს ადმინისტრაციულ საქმეთა პალატის მოსამართლე. 2016 წლის აგვისტოდან არის თბილისის სააპელაციო სასამართლოს ადმინისტრაციულ საქმეთა პალატის თავმჯდომარე. 2017-2021 წლებში საქართველოს მოსამართლეთა კონფერენციაზე არჩეული იყო საქართველოს იუსტიციის უმაღლესი საბჭოს წევრად. 2019 წლის ოქტომბერში აირჩიეს საპროკურორო საბჭოს წევრად. 2021 წლის ივლისიდან არის თბილისის სააპელაციო სასამართლოს თავმჯდომარის მოადგილე.³⁶⁹

38. შოშიაშვილი მათა - პირველი ინსტანციის სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: უგულავა საქართველოს წინააღმდეგ.

2020 წლიდან არის რუსთავის საქალაქო სასამართლოს მაგისტრტი მოსამართლე გარდაბნის მუნიციპალიტეტში.³⁷⁰

39. ცანავა ლელა - პირველი ინსტანციის სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: კაკაბაძე და სხვები საქართველოს წინააღმდეგ.

2016 წლიდან არის სოხუმისა და გაგრა-გუდაუთის რაიონული სასამართლოს მოსამართლე. 2017 წლის ივნისიდან, მივლინების საფუძველზე, მოსამართლის უფლებამოსილებას ახორციელებს თბილისის საქალაქო სასამართლოს სამოქალაქო საქმეთა კოლეგიაში. 2018 წლის თებერვლიდან თანამდებობაზე განწესებულია უვადოდ, კანონით დადგენილი ასაკის მიღწევამდე.³⁷¹

40. ცისკაძე მარიამ - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: ბაქრაძე საქართველოს წინააღმდეგ.

2017 წლის მაისიდან დაინიშნა თბილისის სააპელაციო სასამართლოს ადმინისტრაციულ საქმეთა მოსამართლედ.³⁷²

41. ჭიჭილეიშვილი ნანა - სააპელაციო სასამართლოში იყო მოსამართლე შემდგომში ევროპულ სასამართლოში გასაჩივრებულ საქმეზე: მიქიაშვილი საქართველოს წინააღმდეგ.

2019 წლის სექტემბრიდან არის თბილისის სააპელაციო სასამართლოს ადმინისტრაციულ საქმეთა პალატის მოსამართლე.³⁷³

42. ხუჯაძე ნატო - პირველი ინსტანციაში იყო მოსამართლე შემდგომში ევროპულ სასამართლოში გასაჩივრებულ საქმეზე: მეგრელიშვილი საქართველოს წინააღმდეგ.

2021 წლის სექტემბრიდან არის თბილისის საქალაქო სასამართლოს საგამოძიებო და წინასასამართლო სხდომის კოლეგიის მოსამართლე.³⁷⁴

³⁶⁹ იხ. <http://hcoj.gov.ge/ka/ირაკლი-შენგელია1.html> [14.11.2024].

³⁷⁰ იხ. <http://hcoj.gov.ge/ka/მათა-შოშიაშვილი.html> [14.11.2024].

³⁷¹ იხ. <http://hcoj.gov.ge/ka/ლელა-ცანავა.html> [14.11.2024].

³⁷² იხ. <http://hcoj.gov.ge/ka/მარიამ-ცისკაძე.html> [14.11.2024].

³⁷³ იხ. <http://hcoj.gov.ge/ka/ნანა-ჭიჭილეიშვილი.html> [14.11.2024].

³⁷⁴ იხ. <http://hcoj.gov.ge/ka/ნატო-ხუჯაძე1.html> [14.11.2024].

4. ძირითადი მიზნები

გადაწყვეტილების დაუსაბუთებლობა

კვლევაში განხილული გადაწყვეტილებების მიხედვით, გარკვეულ შემთხვევებში, სასამართლოს მიერ გადაწყვეტილების დასაბუთება არის ზოგადი, თვითნებური და არ პასუხობს მხარეების არგუმენტებს; სასამართლოს მიერ არასათანადოდ ან საერთოდ არ არის გამოკვლეული მნიშვნელოვანი გარემოებები.³⁷⁵ კვლავ გამოწვევაა სასამართლოს გადაწყვეტილებების არასათანადოდ დასაბუთება.³⁷⁶ ადამიანის უფლებათა ევროპული კონვენციის მე-6 მუხლი მოიცავს ეროვნული სასამართლოების ვალდებულებას, საკმარისად დაასაბუთონ საკუთარი გადაწყვეტილება. სასამართლო ვალდებულია, უპასუხოს მხარის მთავარ არგუმენტებს.³⁷⁷ ასევე, განსაკუთრებული გულისხმიერებით უნდა გამოიკვლიოს შუამდგომლობები, რომლებიც კონვენციით და მისი დამატებითი ოქმებით დაცული უფლებების დარღვევას შეეხება.³⁷⁸

მხარეთა თანასწორობისა და შეჯიბრებითობის პრინციპის დარღვევა

კვლევაში განხილულ საქმეებში, ზოგ შემთხვევაში, დაირღვა მხარეთა თანასწორობის პრინციპი, რაც გამოიხატა მხარისთვის არასათანადოდ განმარტების მიცემაში,³⁷⁹ მხარის არგუმენტების გაუთვალისწინებლობასა და მტკიცებულებების გამოკვლევაზე უარში,³⁸⁰ ბრალდების თვითნებურ გადაკვალიფიცირებაში.³⁸¹ მხარეთა თანასწორობისა და შეჯიბრებითობის პრინციპის დარღვევა კვლავ მნიშვნელოვანი გამოწვევაა სასამართლოსთვის. საიას სისხლის სამართლის პროცესების მონიტორინგის N17 ანგარიშის მიხედვით, რამდენიმე გახმაურებულ საქმეში გამოიკვეთა მოსამართლის მხრიდან ამ პრინციპის დარღვევა.³⁸² აღსანიშნავია, რომ მხარეთა თანასწორობის პრინციპი სამართლიანი პროცესის განუყოფელი ნაწილია. ეს გულისხმობს, რომ თითოეულ მხარეს უნდა მიეცეს საკუთარი პოზიციის, მათ შორის, მტკიცებულებების წარდგენის გონივრული შესაძლებლობა ისეთ პირობებში, რომლებიც მას, ოპონენტთან შედარებით, არახელსაყრელ მდგომარეობაში არ აყენებს.³⁸³

³⁷⁵ მაგ. იხ. „მოლაშვილი საქართველოს წინააღმდეგ“, „ენუქიძე და გირგვლიანი საქართველოს წინააღმდეგ“, „როსტომაშვილი საქართველოს წინააღმდეგ“, „კიკაბიძე საქართველოს წინააღმდეგ“.

³⁷⁶ მაგალითად, საიას სისხლის სამართლის პროცესების მონიტორინგის N18 ანგარიშის მიხედვით, მაღალია გირაოსა და პატიმრობის დაუსაბუთებლად ან არასათანადოდ დასაბუთებით გამოყენების მაჩვენებელი. ანგარიშის მიხედვით, სასამართლომ 16 (25%) პირის მიმართ გამოიყენა პატიმრობა დაუსაბუთებლად ან/და არასათანადოდ დასაბუთებით (იხ. საია, სისხლის სამართლის პროცესის მონიტორინგის ანგარიში N18, 2024, 9, https://admin.gyla.ge/uploads_script/publications/pdf/18_geo.pdf_01722590039.pdf [05.11.2024]).

³⁷⁷ ადამიანის უფლებათა ევროპული სასამართლოს 2006 წლის 7 მარტის გადაწყვეტილება საქმეზე „დონაძე საქართველოს წინააღმდეგ“ (DONADZE v. GEORGIA), 74644/01, პარ. 35.

³⁷⁸ ადამიანის უფლებათა ევროპული სასამართლოს 2007 წლის 28 ივნისის გადაწყვეტილება საქმეზე WAGNER AND J.M.W.L. v. LUXEMBOURG, 76240/01, პარ. 96.

³⁷⁹ იხ. „ბართაია საქართველოს წინააღმდეგ“.

³⁸⁰ იხ. „მოლაშვილი საქართველოს წინააღმდეგ, ჭიჭინაძე საქართველოს წინააღმდეგ“.

³⁸¹ იხ. „გელენიძე საქართველოს წინააღმდეგ“.

³⁸² საია, სისხლის სამართლის პროცესების მონიტორინგის ანგარიში N17, 2024, 67, https://admin.gyla.ge/uploads_script/publications/pdf/%E1%83%A1%E1%83%90%E1%83%A1%E1%83%90%E1%83%9B%E1%83%90%E1%83%A0%E1%83%97%E1%83%9A%E1%83%9D%E1%83%A1%20%E1%83%9B%E1%83%9D%E1%83%9C%E1%83%98%E1%83%A2%E1%83%9D%E1%83%A0%E1%83%98%E1%83%9C%E1%83%92%E1%83%98%2017.pdf_01722587844.pdf [05.11.2024].

³⁸³ ადამიანის უფლებათა ევროპული სასამართლოს 2013 წლის 12 ნოემბრის გადაწყვეტილება საქმეზე JOKŠAS v. LITHUANIA, 25330/07, პარ. 55.

გაჭიანურებული მართლმსაჯულება

კონვენციის მე-6 მუხლი განსაზღვრავს საქმის გონივრულ ვადაში განხილვის უფლებას. „გონივრული დრო“ კონკრეტული საქმის გარემოებების შესაბამისად, შემდეგი კრიტერიუმებით უნდა შეფასდეს: საქმის კომპლექსურობა; მომჩივნის და სახელმწიფოს ქცევა; რა არის დავის მოსალოდნელი შედეგი მომჩივნისთვის.³⁸⁴ აღსანიშნავია, რომ ევროპული სასამართლოს განმარტებით, საქმეების ქრონიკული დაგროვება არ არის გადამეტებული დაყოვნების დასაბუთებული ახსნა, ამასთანავე, სახელმწიფო ვალდებულია, იზრუნოს სასამართლოს ორგანიზებაზე ისე, რომ უზრუნველყოფილი იყოს ყოველი მოქალაქის უფლება, დაიცვან საკუთარი უფლებები გონივრულ ვადაში.³⁸⁵ კვლევაში განხილულ საქმეებში, ევროპულმა სასამართლომ, ზოგიერთ შემთხვევაში, დარღვევა დაადგინა გაჭიანურებული მართლმსაჯულების გამო. ეს ეხება როგორც სისხლის სამართლის,³⁸⁶ ისე სამოქალაქო³⁸⁷ საქმეებს. გაჭიანურებული მართლმსაჯულება დღემდე მნიშვნელოვან პრობლემად რჩება. საიას სისხლის სამართლის პროცესების მონიტორინგი ავლენს არაერთ გახმაურებულ საქმეს, რომელთა განხილვა პირველი ინსტანციის სასამართლოებში წლობით მიმდინარეობს, ისე, რომ კონკრეტული შედეგი არ დამდგარა.³⁸⁸ გაჭიანურებული სამართალწარმოების ხარისხი დაბალია, რთულდება მოწმეების მიყვანა, მათი მეხსიერება შეიძლება გაუარესებული იყოს და არ ახსოვდეთ საქმის გარემოებები ისე დეტალურად, როგორც გამოკითხვის დროს და ა.შ.³⁸⁹ მართლმსაჯულების გაჭიანურების კონტექსტში მნიშვნელოვანი გამოწვევაა სასამართლოების გადატვირთულობა და საქმეების დაგროვება. ევროპული კომისიის შეფასებით, საქმეთა დიდი რაოდენობით გამოწვეული გაჭიანურება და საერთო სასამართლოების გადატვირთულობის არაეფექტიანი მენეჯმენტი უარყოფითად მოქმედებს მართლმსაჯულების ხარისხზე.³⁹⁰

³⁸⁴ ადამიანის უფლებათა ევროპული სასამართლოს 2006 წლის 8 ივნისის გადაწყვეტილება საქმეზე *SÜRMELI v. GERMANY*, 75529/01, პარ. 128.

³⁸⁵ ადამიანის უფლებათა ევროპული სასამართლოს 2009 წლის 10 თებერვლის გადაწყვეტილება საქმეზე „ხარიტონაშვილი საქართველოს წინააღმდეგ“ (*CASE OF KHARITONASHVILI v. GEORGIA*), 41957/04, პარ. 44.

³⁸⁶ იხ. „კობელიანი საქართველოს წინააღმდეგ“.

³⁸⁷ იხ. „ხარიტონაშვილი საქართველოს წინააღმდეგ“.

³⁸⁸ ქართული მართლმსაჯულების გაჭიანურების ერთ-ერთი ყველაზე თვალსაჩინო მაგალითი ბათუმის ციხის ყოფილი უფროსების საქმეა, რომელსაც ბათუმის საქალაქო სასამართლო 2014 წლიდან განიხილავს და 2019 წლის 1-ელ იანვარს უნდა დასრულებულიყო. ამ დროისთვის, უკვე მეთათე წელია, საქმის განხილვა კვლავ არ დასრულებია. ამ საქმეში ცალსახად იკვეთება სამართლიანი სასამართლოს უფლების დარღვევა. გარდა ამისა, ისევ არ დასრულებულა ისეთი გახმაურებული სისხლის სამართლის საქმეები, როგორებიცაა: ე.წ. 7 ნოემბრის საქმე, ე.წ. პიჯაკების საქმე, ბადრი პატარკაციშვილის მკვლელობის მომზადების საქმე, ბუტა რობაქიძის საქმე (ზურაბ ადგიშვილისა და ირაკლი ოქრუაშვილის ბრალდების ნაწილი), კარტოგრაფების საქმე, ისნის საოლქოს საქმე, ნიკა მელიას ბრალდების საქმე. იხ. საია, სისხლის სამართლის პროცესების მონიტორინგის ანგარიში N17, 2024, 51-53, https://admin.gyla.ge/uploads_script/publications/pdf/f/%E1%83%A1%E1%83%90%E1%83%A1%E1%83%90%E1%83%9B%E1%83%90%E1%83%A0%E1%83%97%E1%83%9A%E1%83%9D%E1%83%A1%20%E1%83%9B%E1%83%9D%E1%83%9C%E1%83%98%E1%83%A2%E1%83%9D%E1%83%A0%E1%83%98%E1%83%9C%E1%83%92%E1%83%98%2017.pdf_01722587844.pdf [05.11.2024].

³⁸⁹ საია, სისხლის სამართლის პროცესების მონიტორინგის ანგარიში N17, 2024, 52, https://admin.gyla.ge/uploads_script/publications/pdf/f/%E1%83%A1%E1%83%90%E1%83%A1%E1%83%90%E1%83%9B%E1%83%90%E1%83%A0%E1%83%97%E1%83%9A%E1%83%9D%E1%83%A1%20%E1%83%9B%E1%83%9D%E1%83%9C%E1%83%98%E1%83%A2%E1%83%9D%E1%83%A0%E1%83%98%E1%83%9C%E1%83%92%E1%83%98%2017.pdf_01722587844.pdf [05.11.2024].

³⁹⁰ COMMISSION STAFF WORKING DOCUMENT Georgia 2024 Report, SWD(2024) 697 final, Brussels, 30.10.2024, 35, https://neighbourhood-enlargement.ec.europa.eu/document/download/7b6ed47c-ecde-41a2-99ea-41683dc2d1bd_en?filename=Georgia%20Report%202024.pdf [04.11.2024].

უდანამაულობის პრეზუმფციის დარღვევა

კვლევაში განხილულ საქმეებთან მიმართებით, ზოგ შემთხვევაში, ევროპულმა სასამართლომ დაადგინა, რომ დაირღვა უდანამაულობის პრეზუმფცია, რაც ხელისუფლების წარმომადგენლებისა³⁹¹ და უზენაესი სასამართლოს თავმჯდომარის³⁹² განცხადებებით იყო განპირობებული. უდანამაულობის პრეზუმფცია გულისხმობს, რომ სასამართლოს არ უნდა ჰქონდეს წინასწარ განწყობა ბრალდებულის მიერ დანაშაულის ჩადენის თაობაზე.³⁹³ მტკიცების ტვირთი ეკისრება პროკურატურას, ხოლო ყველა ეჭვი უნდა გადაწყდეს ბრალდებულის სასარგებლოდ.³⁹⁴ უდანამაულობის პრეზუმფციის დარღვევა კვლავ გამოწვევად რჩება როგორც სასამართლოს, ისე ხელისუფლების სხვა წარმომადგენლების ქმედებების გამო, რაც, მათ შორის, იდენტიფიცირებულია საიას სისხლის სამართლის პროცესების მონიტორინგის N17 და N18 ანგარიშებში.³⁹⁵

ადმინისტრაციული სამართალდარღვევისთვის პასუხისმგებლობის დაკისრება სათანადო დასაბუთების გარეშე

გადაწყვეტილების დასაბუთების და მხარეებს შორის მტკიცების ტვირთის განაწილების წინა მიგნებებში განხილული სტანდარტების საწინააღმდეგოდ, როგორც კვლევაში გაანალიზებული საქმეებიდან იკვეთება, ადმინისტრაციული პასუხისმგებლობის დაკისრების პროცესში განსაკუთრებით პრობლემურია სასამართლოების მიდგომა, როდესაც არ ფასდება სადავო ქცევა და მისი კონტექსტი,³⁹⁶ ასევე, დაკისრებული პასუხისმგებლობის პროპორციულობა,³⁹⁷ ან მომეტებული მნიშვნელობა ენიჭება პოლიციელთა ჩვენებებს, რაც, ფაქტობრივად, იწვევს მტკიცების ტვირთის გადატანას პირის საწინააღმდეგოდ.³⁹⁸

არსებული მდგომარეობით, მწვავე პრობლემაა ის, რომ ადმინისტრაციულ სამართალდარღვევათა კოდექსს სახელმწიფო აქტიურად იყენებს პროტესტის ჩასახშობად. გამოწვევაა სასამართლოს მიერ ადმინისტრაციულ სამართალდარღვევათა საქმეებზე მიღებული დადგენილებების დასაბუთების ხარისხიც.³⁹⁹ როგორც წესი, დადგენილებებში არ არის მოცემული ექსპლიციტური განმარტება მთავარ კითხვაზე, რა ქმედებით ჩაიდინეს პირებმა სამართალდარღვევა.⁴⁰⁰ შესაბამისად, სასამართლოს დასაბუთება მოკლებულია საქმისთვის გადამწყვეტი მნიშვნელობის მქონე არგუმე-

³⁹¹ იხ. „მამალაძე საქართველოს წინააღმდეგ“, „მოლაშვილი საქართველოს წინააღმდეგ“.

³⁹² იხ. „მოლაშვილი საქართველოს წინააღმდეგ“.

³⁹³ ადამიანის უფლებათა ევროპული სასამართლოს 2002 წლის 27 ივლისის გადაწყვეტილება საქმეზე JANOSEVIC v. SWEDEN, 34619/97, პარ. 97.

³⁹⁴ იქვე.

³⁹⁵ საია, სისხლის სამართლის პროცესების მონიტორინგის ანგარიში N18, 2024, 15, https://admin.gyula.ge/uploads_script/publications/pdf/18_geo.pdf_01722590039.pdf [05.11.2024], საია, სისხლის სამართლის პროცესების მონიტორინგის ანგარიში N17, 2024, 67-68, https://admin.gyula.ge/uploads_script/publications/pdf/%E1%83%A1%E1%83%90%E1%83%A1%E1%83%90%E1%83%9B%E1%83%90%E1%83%A0%E1%83%97%E1%83%9A%E1%83%9D%E1%83%A1%20%E1%83%9B%E1%83%9D%E1%83%9C%E1%83%98%E1%83%A2%E1%83%9D%E1%83%A0%E1%83%98%E1%83%9C%E1%83%92%E1%83%98%2017.pdf_01722587844.pdf [05.11.2024].

³⁹⁶ იხ. „ფერაძე და სხვები საქართველოს წინააღმდეგ“.

³⁹⁷ იხ. „ჩხარტიშვილი საქართველოს წინააღმდეგ“.

³⁹⁸ იხ. „მაქარაშვილი და სხვები საქართველოს წინააღმდეგ“.

³⁹⁹ საია, საქართველო 2023 წელს, სამართლის უზენაესობისა და ადამიანის უფლებების მდგომარეობის შეფასება, 2024, 23, <https://gyula.ge/files/news/%E1%83%A4%E1%83%9D%E1%83%9C%E1%83%93%E1%83%98/%E1%83%A2%E1%83%A3%E1%83%A0%E1%83%9C%E1%83%98%E1%83%A0%E1%83%98/%E1%83%A1%E1%83%90%E1%83%A5%E1%83%90%E1%83%A0%E1%83%97%E1%83%95%E1%83%94%E1%83%9A%E1%83%9D%202023%20%E1%83%AC%E1%83%94%E1%83%9A%E1%83%A1.pdf> [11.05.2024].

⁴⁰⁰ იქვე.

ნტებზე მსჯელობას, რაც შეუთავსებელია როგორც ადგილობრივ კანონმდებლობასთან, ისე ადამიანის უფლებათა ევროპული სასამართლოს სტანდარტთან.⁴⁰¹

ადვოკატი სარგებლობის უფლების დარღვევა

ადვოკატი სარგებლობის უფლება სამართლიანი პროცესის ერთ-ერთი ფუნდამენტური მახასიათებელია.⁴⁰² როგორც წესი, ბრალდებულს ადვოკატის მომსახურებაზე წვდომა უნდა ჰქონდეს პოლიციის მიერ მისი დაკავების მომენტიდანვე.⁴⁰³ ამ კვლევაში განხილულ საქმეთა ნაწილში იდენტიფიცირებულია ფაქტები, როდესაც მომჩივანს არ მიეცა ადვოკატზე წვდომის შესაძლებლობა,⁴⁰⁴ რითაც, ცალკეულ შემთხვევებში, დაირღვა სამართალწარმოებაში მისი ეფექტიანი მონაწილეობის უფლება,⁴⁰⁵ ასევე, არ ჰქონდა საქმეში მის მიერ არჩეული ადვოკატის ჩართვის საშუალება,⁴⁰⁶ ან სასამართლოს არ უმსჯელია, რა გავლენა მოახდინა დაკავების საწყის საათებში ადვოკატზე ხელმისაწვდომობის შეზღუდვამ პროცესის ზოგად სამართლიანობაზე.⁴⁰⁷

მოსამართლეთა დანიშნასთან დაკავშირებული გამოწვევები

სასამართლოების გადატვირთულობის და საქმეთა განხილვის გაჭიანურების ერთ-ერთი მიზეზი მოსამართლეთა არასაკმარისი რაოდენობაა. მნიშვნელოვანია, მოსამართლეთა რაოდენობა გაიზარდოს, თუმცა იუსტიციის უმაღლესი საბჭოს გადაჭარბებული გავლენა იუსტიციის უმაღლეს სკოლასა და მოსამართლეთა კარიერის განმსაზღვრელ საკითხებზე აბრკოლებს სისტემაში ახალი კადრების შედინებას.⁴⁰⁸ ამ თანამდებობაზე უნდა დაინიშნონ კვალიფიციური პირები, თუმცა გამოიკვეთა შემთხვევები, როდესაც პირი იყო კვალიფიციური და, იუსტიციის საბჭოს მიმართ კრიტიკული პოზიციის გამო, მოსამართლედ არ დაინიშნა.⁴⁰⁹ დღესდღეობით, საფუძვლიანი კითხვები არსებობს სასამართლო სისტემაში მაღალ თანამდებობაზე დანიშნული/არჩეული პირების კეთილსინდისიერებასთან მიმართებით, თუმცა შესაბამისი შემოწმების მექანიზმის დანერგვას პოლიტიკური ხელისუფლება და სასამართლოს წარმომადგენლები კატეგორიულად ეწინააღმდეგებიან და საკითხს დახურულად აცხადებენ. ხოლო 10-მდე მოსამართლეს, რომლებმაც განსხვავებული მოსაზრება გამოხატეს, პოლიტიკური ხელისუფლების წარმომადგენლები მადისკრედიტირებელი კამპანიით/განცხადებით პასუხობენ.⁴¹⁰

⁴⁰¹ იქვე.

⁴⁰² ადამიანის უფლებათა ევროპული სასამართლოს 2008 წლის 27 ნოემბრის გადაწყვეტილება საქმეზე SALDUZ v. TURKEY, 36391/02, პარ. 51.

⁴⁰³ ადამიანის უფლებათა ევროპული სასამართლოს 2009 წლის 13 ოქტომბრის გადაწყვეტილება საქმეზე DAYANAN v. TURKEY, 7377/03, პარ. 31.

⁴⁰⁴ იხ. „მოლაშვილი საქართველოს წინააღმდეგ“.

⁴⁰⁵ იხ. „ბართაია საქართველოს წინააღმდეგ“.

⁴⁰⁶ იხ. „კიკაბიძე საქართველოს წინააღმდეგ“.

⁴⁰⁷ იხ. „რუსიშვილი საქართველოს წინააღმდეგ“.

⁴⁰⁸ კოალიცია დამოუკიდებელი და გამჭვირვალე მართლმსაჯულებისთვის, მართლმსაჯულების რეფორმების 10 წელი: გამოწვევები და პერსპექტივები, 2023, 9, https://gyla.ge/files/2020/%E1%83%99%E1%83%95%E1%83%9A%E1%83%94%E1%83%95%E1%83%94%E1%83%91%E1%83%98/untitled%20folder/%E1%83%9C%E1%83%98%E1%83%A3%E1%83%A1%E1%83%9A%E1%83%94%E1%83%97%E1%83%94%E1%83%A0%E1%83%98/%E1%83%9B%E1%83%90%E1%83%A0%E1%83%97%E1%83%9A%E1%83%9B%E1%83%A1%E1%83%90%E1%83%AF%E1%83%A3%E1%83%9A%E1%83%94%E1%83%91%E1%83%98%E1%83%A1_%E1%83%A0%E1%83%94%E1%83%A4%E1%83%9D%E1%83%A0%E1%83%9B%E1%83%90_GEO_1684843236.pdf [20.11.2024].

⁴⁰⁹ იხ. „ბაქრაძე საქართველოს წინააღმდეგ“.

⁴¹⁰ სამოქალაქო საზოგადოების ფონდი; GRASS; GFSIS; საია; ISFED; სასამართლოს გუმაგი; სოციალური

ასევე, გამოვლინდა შემთხვევა, როდესაც პირმა მოსამართლედ დანიშვნის შესახებ უარი გაასაჩივრა საკვალიფიკაციო პალატაში, რომელმაც საჩივარი არ განიხილა. ამით მომჩივანს შეუზღუდა სასამართლოზე წვდომის უფლება.⁴¹¹ მიუხედავად იმისა, რომ მნიშვნელოვნად გაუმჯობესდა სამოსამართლო კონკურსის ფარგლებში იუსტიციის უმაღლესი საბჭოს მიერ მიღებული გადაწყვეტილების გასაჩივრების მექანიზმი უზენაესი სასამართლოს საკვალიფიკაციო პალატაში, ჯერ კიდევ არ არსებობს ნორმა, რომელიც იმპერატიულად განსაზღვრავს იუსტიციის უმაღლესი საბჭოს წარდგინებაზე/განკარგულებაზე საჩივრის განმხილველი ორგანოს - უზენაესი სასამართლოს საკვალიფიკაციო პალატის - გადაწყვეტილების სავალდებულო ხასიათს.⁴¹² მართალია, იუსტიციის უმაღლესი საბჭოს წევრები ითვალისწინებენ უზენაესი სასამართლოს საკვალიფიკაციო პალატის გადაწყვეტილებას,⁴¹³ თუმცა მხოლოდ ეს არ არის საკმარისი, ვინაიდან ხსენებული ტერმინი არ გულისხმობს უზენაესი სასამართლოს გადაწყვეტილების პატივისცემასა და დაცვას, რაც სავალდებულოა.⁴¹⁴

დისციპლინური პასუხისმგებლობის გამოყენება მოსამართლეების წინააღმდეგ

წარმოდგენილ კვლევაში განხილულ საქმეებში, გარკვეულ შემთხვევებში, დაირღვა მოსამართლეთა უფლებაც სამართლიან პროცესზე, რაც გამოწვეული იყო მათ წინააღმდეგ მიეკრძაბული დისციპლინური წარმოებით.⁴¹⁵

2021 წლის დეკემბერში საქართველოს პარლამენტმა დაჩქარებული წესით, საზოგადოების ჩართულობის და მოსამართლეებთან კონსულტაციების გარეშე, მიიღო საკანონმდებლო ცვლილებები, რომლითაც, ინდივიდუალურ მოსამართლეთა დამოუკიდებლობის გარანტიების შემცირების პარალელურად, კიდევ უფრო გაიზარდა იუსტიციის უმაღლესი საბჭოს ძალაუფლება.⁴¹⁶ შესაბამისად, გაძლიერდა სისტემაში არსებული შიდა კორპორატივიზმი და არაფორმალური გავლენებიც.⁴¹⁷ ამ ცვლილებებმა განსაკუთრებით მწვავე კრიტიკა დაიმსახურა ვენეციის კომისიის მხრიდან. მოსამართლეთა ნაწილმა კი, ცვლილებების არაკონსტიტუციურად ცნობის მოთხოვნით, საქართველოს საკონსტიტუციო სასამართლოს სარჩელით მიმართა.⁴¹⁸ ეს ცვლილებები, მათ შორის, მოსამართლეთა მივლინების ახალი საკანონმდებლო მოწესრიგება მნიშვნელოვნად ზრდიდა

სამართლიანობის ცენტრი; IDFI; GMC; DRI; GDI; საფარი; 9 ნაბიჯი ევროკავშირისკენ, შესრულების მდგომარეობა 2023 წლის 8 ნოემბრიდან 2024 წლის 9 სექტემბრის ჩათვლით, 52.

⁴¹¹ იხ. „გლოველი საქართველოს წინააღმდეგ“.

⁴¹² სამოქალაქო საზოგადოების ფონდი; GRASS; GFSIS; საია; ISFED; სასამართლოს გუმაგი; სოციალური სამართლიანობის ცენტრი; IDFI; GMC; DRI; GDI; საფარი; 9 ნაბიჯი ევროკავშირისკენ, შესრულების მდგომარეობა 2023 წლის 8 ნოემბრიდან 2024 წლის 9 სექტემბრის ჩათვლით, 41.

⁴¹³ საქართველოს ორგანული კანონი საერთო სასამართლოების შესახებ, მუხლი 34³ (12, 13).

⁴¹⁴ Follow-up opinion on previous opinions concerning the Organic Law on Common Courts, adopted by the Venice Commission at its 136th Plenary Session (Venice, 6-7 October 2023), 2023, 8, par. 34-36.

⁴¹⁵ იხ. „მერაბ ტურაია და სხვები საქართველოს წინააღმდეგ“, „სტურუა საქართველოს წინააღმდეგ“.

⁴¹⁶ კოალიცია დამოუკიდებელი და გამჭვირვალე მართლმსაჯულებისთვის, მართლმსაჯულების რეფორმების 10 წელი: გამოწვევები და პერსპექტივები, 2023, 7, https://gyla.ge/files/2020/%E1%83%99%E1%83%95%E1%83%9A%E1%83%94%E1%83%95%E1%83%94%E1%83%91%E1%83%98/untitled%20folder/%E1%83%9C%E1%83%98%E1%83%A3%E1%83%A1%E1%83%9A%E1%83%94%E1%83%97%E1%83%94%E1%83%A0%E1%83%98/%E1%83%9B%E1%83%90%E1%83%A0%E1%83%97%E1%83%9A%E1%83%9B%E1%83%A1%E1%83%90%E1%83%AF%E1%83%A3%E1%83%9A%E1%83%94%E1%83%91%E1%83%98%E1%83%A1_%E1%83%A0%E1%83%94%E1%83%A4%E1%83%9D%E1%83%A0%E1%83%9B%E1%83%90_GEO_1684843236.pdf [25.11.2024].

⁴¹⁷ იქვე.

⁴¹⁸ იქვე. ასევე, იხ. კონსტიტუციური სარჩელი N1693, ეკა არეშიძე, ქეთევან მესხიშვილი, მადონა მაისურაძე, მამუკა წიკლაური და თამარ ხაქოშია საქართველოს პარლამენტის წინააღმდეგ, 2022 წლის 11 აპრილი, <https://constcourt.ge/ka/judicial-acts?legal=13488> [25.11.2024].

ინდივიდუალურ მოსამართლეებზე იუსტიციის უმაღლესი საბჭოს გავლენას, რაც, არსებული კონტექსტის გათვალისწინებით, შესაძლოა, უარყოფითად აისახოს მათ დამოუკიდებლობასა და მიუკერძოებლობაზე.⁴¹⁹

ალსანიშნავია, რომ 2024 წელს საერთო სასამართლოების შესახებ ორგანულ კანონში შევიდა ცვლილებები, რომლებიც შეეხება მოსამართლეთა დისციპლინური პასუხისმგებლობის შესახებ ვენეციის კომისიის მნიშვნელოვან რეკომენდაციას.⁴²⁰ კომისიის განმარტებით, ცვლილებები ასევე მოიცავს რამდენიმე მცირე პოზიტიურ ელემენტს იუსტიციის უმაღლესი საბჭოს გამჭვირვალობასა და მისი შემადგენლობის პერიოდულ განახლებასთან დაკავშირებით, თუმცა ეს არ არის მართლმსაჯულების სისტემის ჰოლისტური და ეფექტიანი რეფორმა.⁴²¹ ამ ცვლილებების მიხედვით, მოსამართლის დისციპლინურ პასუხისგებაში მიცემის შესახებ გადაწყვეტილების მისაღებად საჭიროა იუსტიციის უმაღლესი საბჭოს სრული შემადგენლობის 2/3-ის მხარდაჭერა,⁴²² თუმცა გადაწყვეტილების მიღების პროცესში მოსამართლე და არამოსამართლე წევრებს შორის ბალანსი კვლავ არ არის დაცული.⁴²³ შესაბამისად, ვენეციის კომისიის რეკომენდაცია, რომელიც გულისხმობს მინიმუმ სამი არამოსამართლე წევრის მონაწილეობით მოსამართლეთა დისციპლინურ საკითხზე გადაწყვეტილების მიღებას, გათვალისწინებული არ არის.⁴²⁴ ამასთანავე, 2023 წელს, 2 წლის დაგვიანებით, პარლამენტმა არამოსამართლე წევრებად ისეთ კანდიდატებს დაუჭირა მხარი, რომ ამან, პლურალიზმის ნაცვლად, გავლენიანი ჯგუფის გაძლიერებას შეუწყო ხელი. არადა, დამოუკიდებელი, კრიტიკული აზრის მქონე კანდიდატების დანიშვნა საბჭოში, შესაძლოა, მისი გაჯანსაღების საფუძველი გამხდარიყო, რაც ასევე დადებითად აისახებოდა მოსამართლეთა დისციპლინური პასუხისმგებლობის სისტემის გამართულად ფუნქციონირებაზე.⁴²⁵

⁴¹⁹ კოალიცია დამოუკიდებელი და გამჭვირვალე მართლმსაჯულებისთვის, მართლმსაჯულების რეფორმების 10 წელი: გამოწვევები და პერსპექტივები, 2023, 41, https://gyla.ge/files/2020/%E1%83%99%E1%83%95%E1%83%9A%E1%83%94%E1%83%95%E1%83%94%E1%83%91%E1%83%98/untitled%20folder/%E1%83%9C%E1%83%98%E1%83%A3%E1%83%A1%E1%83%9A%E1%83%94%E1%83%97%E1%83%94%E1%83%A0%E1%83%98/%E1%83%9B%E1%83%90%E1%83%A0%E1%83%97%E1%83%9A%E1%83%9B%E1%83%A1%E1%83%90%E1%83%AF%E1%83%A3%E1%83%9A%E1%83%94%E1%83%94%E1%83%91%E1%83%98%E1%83%A1_%E1%83%A0%E1%83%94%E1%83%A4%E1%83%9D%E1%83%A0%E1%83%9B%E1%83%90_GEO_1684843236.pdf [25.11.2024].

⁴²⁰ VENICE COMMISSION, GEORGIA FOLLOW-UP OPINION TO PREVIOUS OPINIONS CONCERNING THE ORGANIC LAW ON COMMON COURTS, CDL-AD(2023)033, 9 October 2023, [https://www.venice.coe.int/webforms/documents/default.aspx?pdffile=CDL-AD\(2023\)033-e](https://www.venice.coe.int/webforms/documents/default.aspx?pdffile=CDL-AD(2023)033-e) [06.11.2024].

⁴²¹ COMMISSION STAFF WORKING DOCUMENT Georgia 2024 Report, SWD(2024) 697 final, Brussels, 30.10.2024, 24, https://neighbourhood-enlargement.ec.europa.eu/document/download/7b6ed47c-ecde-41a2-99ea-41683dc2d1bd_en?filename=Georgia%20Report%202024.pdf [04.11.2024].

⁴²² მანამდე, 2021 წლის საკანონმდებლო ცვლილებების შესახებ კვორუმი 2/3-იდან უბრალო უმრავლესობამდე შემცირდა. იხ. კოალიცია დამოუკიდებელი და გამჭვირვალე მართლმსაჯულებისთვის, მართლმსაჯულების რეფორმების 10 წელი: გამოწვევები და პერსპექტივები, 2023, 44, https://gyla.ge/files/2020/%E1%83%99%E1%83%95%E1%83%9A%E1%83%94%E1%83%95%E1%83%94%E1%83%91%E1%83%98/untitled%20folder/%E1%83%9C%E1%83%98%E1%83%A3%E1%83%A1%E1%83%9A%E1%83%94%E1%83%97%E1%83%94%E1%83%A0%E1%83%98/%E1%83%9B%E1%83%90%E1%83%A0%E1%83%97%E1%83%9A%E1%83%9B%E1%83%A1%E1%83%90%E1%83%AF%E1%83%A3%E1%83%9A%E1%83%94%E1%83%91%E1%83%98%E1%83%A1_%E1%83%A0%E1%83%94%E1%83%A4%E1%83%9D%E1%83%A0%E1%83%9B%E1%83%90_GEO_1684843236.pdf [25.11.2024].

⁴²³ სამოქალაქო საზოგადოების ფონდი; GRASS; GFSIS; საია; ISFED; სასამართლოს გუშაგი; სოციალური სამართლიანობის ცენტრი; IDFI; GMC; DRI; GDI; საფარი; 9 ნაბიჯი ევროკავშირისკენ, შესრულების მდგომარეობა 2023 წლის 8 ნოემბრიდან 2024 წლის 9 სექტემბრის ჩათვლით, 47.

⁴²⁴ იქვე.

⁴²⁵ საია, იუსტიციის უმაღლესი საბჭოს მონიტორინგის ანგარიში №12, 2024, 7, 12.

მოსამართლის თანაშემწეთა მიუკერძოებლობის გარანტიები

დღესდღეობით, საქართველოში არ არსებობს მოსამართლის თანაშემწის ინტერესთა კონფლიქტის მარეგულირებელი წესები და პრაქტიკა. კვლევაში განხილულ ერთ-ერთ საქმეზე, ამ პრობლემის გამო, დადგინდა სამართლიანი სასამართლოს უფლების დარღვევა.⁴²⁶ აუცილებელია, სასამართლოს თანაშემწეებთან დაკავშირებით მოქმედებდეს ინტერესთა კონფლიქტის შესახებ რეგულაციები.⁴²⁷ მეტიც, ევროპის მოსამართლეთა საკონსულტაციო საბჭოს თანახმად, სახელმწიფოებმა უნდა იმსჯელონ ისეთი წესების შემოღებაზე, რომლებიც უზრუნველყოფს მოსამართლის თანაშემწეების მიმართ იმავე კრიტერიუმების გავრცელებას, რომლებიც მოსამართლის აცილების შემთხვევაში გამოიყენება.⁴²⁸

მოსამართლეთა მიუკერძოებლობა და დამოუკიდებლობა

კვლევაში განხილულ საქმეთა ნაწილში იკვეთება სასამართლოს მიერ მიუკერძოებლობისა და ადამიანის უფლებათა მნიშვნელობანი დარღვევები, რაც, სავარაუდოდ, საქმის პოლიტიკურ ბუნებასთან არის დაკავშირებული.⁴²⁹ სასამართლოს მიუკერძოებლობა მნიშვნელოვანი გამოწვევაა. ევროპული კომისიის შეფასებით, მართლმსაჯულების მიუკერძოებლობა პრობლემატურია და ყოვლისმომცველ რეფორმას საჭიროებს.⁴³⁰ აშშ-ის სახელმწიფო დეპარტამენტის შეფასებით, მოსამართლეები მოწყვლადები არიან პოლიტიკური წნეხის მიმართ, რომელიც როგორც სასამართლო სისტემის შიგნიდან, ასევე გარედან მომდინარეობს.⁴³¹ აღსანიშნავია, რომ ამერიკის შეერთებული შტატების სახელმწიფო დეპარტამენტის მიერ მოქმედ და ყოფილი მოსამართლეებს - მიხეილ ჩინჩალაძის, ლევან მურუსიძის, ვალერიან ცერცვაძისა და ირაკლი შენგელიას, მნიშვნელოვან კორუფციაში ჩართულობის გამო, ქვეყანაში შესვლაზე პერსონალური შეზღუდვები დაეკისრათ, რაც სასამართლო სისტემაში შექმნილ მძიმე ვითარებას ადასტურებს.⁴³²

კვლევის ფარგლებში იდენტიფიცირდნენ ის მოსამართლეები, რომელთა გადაწყვეტილებები უკავშირდება გახმაურებულ საქმეებზე ადამიანის უფლებების არსებით დარღვევებს და რომლებიც დღეს სასამართლო სისტემაში მაღალ თანამდებობებს იკავებენ. მათ შესახებ დეტალური ინფორმაცია მოცემულია მესამე თავში.

⁴²⁶ იხ. „წულუკიძე და რუსულაშვილი საქართველოს წინააღმდეგ“.

⁴²⁷ ევროპის მოსამართლეთა საკონსულტაციო საბჭოს დასკვნა no 22, 2019.

⁴²⁸ იქვე.

⁴²⁹ მაგ. იხ. „მოლაშვილი საქართველოს წინააღმდეგ“, „ენუქიძე და გირგვლიანი საქართველოს წინააღმდეგ“, „აკაბაძე და სხვები საქართველოს წინააღმდეგ“.

⁴³⁰ COMMISSION STAFF WORKING DOCUMENT Georgia 2024 Report, SWD(2024) 697 final, Brussels, 30.10.2024, 33, https://neighbourhood-enlargement.ec.europa.eu/document/download/7b6ed47c-ecde-41a2-99ea-41683dc2d1bd_en?filename=Georgia%20Report%202024.pdf [04.11.2024].

⁴³¹ US Department of State, 2023 Country Reports on Human Rights Practices: Georgia, 13 <https://www.state.gov/wp-content/uploads/2024/03/528267-GEORGIA-2023-HUMAN-RIGHTS-REPORT.pdf> [05.11.2024].

⁴³² Public Designations of Mikheil Chinchaladze, Levan Murusidze, Irakli Shengelia, and Valerian Tsertsvadze, Due to Involvement in Significant Corruption, Press Statement, U.S. Department of State, 5 April 2023, available at: <https://www.state.gov/public-designations-of-mikheil-chinchaladze-levan-murusidze-irakli-shengelia-and-valerian-tsertsvadze-due-to-involvement-in-significant-corruption/>, accessed: 2.10.24.